

**SEVENTH LEGISLATIVE ASSEMBLY OF MIZORAM  
(TWELFTH SESSION)**

**LIST OF BUSINESS**

FOR SIXTH SITTING ON TUESDAY, THE 21<sup>st</sup> MARCH, 2017  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu R. LALZIRLIANA**, Minister to lay on the Table of the House a statement of correction on the reply given on the 15<sup>th</sup> March, 2017 to Starred Question No. 100, Ballot No.8 asked by **Pu Lalruatkima** regarding “Buh thar chungchang”.
3. **Pu ZODINTLUANGA**, Minister to lay on the Table of the House the following :
  - i) “The Mizoram Water Supply (Control) (Amendment) Rules,2016”.
  - ii) “The Aizawl Municipal Corporation Building (Amendment) Regulations, 2016”.
4. **Pi VANLALAWMPUII CHAWNGTHU**, to lay on the Table of the House a copy of Statement on Action taken on the further recommendations of Subject Committee-II contained in the Fourth Report 2016, relating to Environment, Forests & Climate Change Department.

**PRESENTATION OF REPORTS**

5. **Pi VANLALAWMPUII CHAWNGTHU**, to present to the House the following Reports of Subject Committee-II :
  - i) Sixth Report on Action Taken by the Government on the recommendations contained in the Third Report of Subject Committee-II of the Seventh Legislative Assembly of Mizoram relating to Border Area Development Programme under Rural Development Department.
  - ii) Seventh Report on Action Taken by the Government on the recommendations contained in the Second Report of Subject Committee-II of the Seventh Legislative Assembly of Mizoram relating to Tlawva Small Hydel Project under Power & Electricity Department.

- iii) Eighth Report on Action Taken by the Government on the recommendations contained in the Fifth Report of Subject Committee-II of the Seventh Legislative Assembly of Mizoram relating to Mizoram Houses (New Delhi, Kolkata, Guwahati) under General Administration Department.

**FINANCIAL BUSINESS**

6. **GENERAL DISCUSSION ON THE ANNUAL BUDGET FOR THE YEAR 2017-2018.**

General Discussion on the Budget for the year 2017-2018 (to be concluded).

NGURTHANZUALA  
Secretary

.....

**SPEAKER** : “ Mi rethei khawngaih chuan Lalpa a puktir a ni a, A thltih that chu a rul ang.”  
Thufingte 19:17.

Zawhna kan la leh ang a, Starred Question No.44 na zawt turin a neitu Er.Lalrinawma MLA zahawm tak ilo sawm ang.

**Er.LALRINAWMA** : Pu Speaker, ka lawm e. Health & Family Welfare changtu Minister zahawm tak hnena ka zawhna Starred Question No.44 na:-

- a) Tun dinhmunah Mizoram State Health Care scheme hnuaiah chhungkua engzatnge in ziaak lut awm?
- b) Kum 2015-2016 chhungin damlo engzatnge he scheme hnuaiah hian enkawl an nih? Cheng engzatnge senral a nih tih ka zawt e.

**SPEAKER** : Health Department changtu Minister zahawm tak Pu Lal Thanzara chhang turin ilo sawm ang.

**Pu LAL THANZARA, MINISTER** : Pu Speaker, MLA zahawm tak Er.Lalrinawma zawhna chhanna te chu –

- a) Kum 2016-2017 State Health Care Scheme hnuaia chhungkaw in ziaak lut zat chu 115221 a ni.
- b) Kum 2015- 2016 chhungin he scheme hnuaiah hian damlo 5258 hnenah `12,80,26,231/- senral a ni.

**SPEAKER** : Zawhbelhna a neitu Pu Lalrinawma.

**Er. LALRINAWMA** : Pu Speaker, ka lawm e. Nimina kan ngaihthlak ang khan Health Care rate hi a tlawm khawp mai a, 2008-a siam tawh kha a ni tih kan sawi tawh a. Tichuan, he Health Care rate hi tun dinhmunah ennawn tumna a awm em tih kha ka zawhna pakhatna ni ta se? A pahnihna ah chuan heng kan bill hi thla li dan vel bawrah pek an ni thin a, thla li leh thla nga danah, hei hi tun aia hmaa pek theih dan a awm em tih ni ta se. A dawt leh atan chuan RSBY leh Health Care hi hmun khatah pawh khawm a ni a, hei hi a tih loh dan a awm lawm ni? Kawng zawn theih a ni em tih kha ka zawhna a ni e.

**SPEAKER** : Pu Ruatkima'n zawt nghal se, Pu Pianmawia nen.

**Pu LALARUATKIMA** : Pu Speaker, ka lawm e. Mizoram Health Care Scheme pawisa tur Asian Development Bank atangin engtikahnge puk a nih a, engzatnge puk a

nih? Rate of interest engzatnge, tih leh a rulh dan tur engtinnge ruahmanna siam a nih? tih ka zawh belh e.

**SPEAKER** : Pu Pianmawia'n zawt law law se, zawhbelhna kha chu a tam viau tawh a nia. Khai le, zawt rawh.

**Pu R.L PIANMAWIA** : Pu Speaker, ka zawhbelhna chu tun ministry chhungah hian Health Care Scheme sum leh pai hi tihchingpen a awm em? tih a ni a. Tin, a pahnihna chu, damdawi in a damlo admit Smart Card nei si bill sak theih loh awm thin hi bill sak vek theih dan a awm ang em? Entirnan, Durtlang damdawi in ah khian khatiang nei kha 8 awm ta sela, 4 ang vel chauh bak kha an bill sak thei lo a ni. Chuvangchuan damlo khatiang beiseia lut ve, nei si te kha, an bill vek theih dan tur a awm thei ang em?

**SPEAKER** : Ngawi rawh aw, tam viau tawh mahse Pu S.Dinga khan a phar leh a, han zawt law law mai se, i duh tawh mai ang.

**Pu S.LALDINGLIANA** : Pu Speaker, Minister zahawm takin a chhang thei tho turah ka ngai a, TATA Mumbai-ah khuan Mizoram sorkar tunah khuan vaibelchhe khat leh tlem pawisa kan ba mek a, cancer bik enkawl na tur atan. Ka kal hnuhnun ber khan 'hei hi min rawn clear sak theih chuan credit facility hi kan pe leh thei dawn che u a,' tiin min hrilh a, tichuan kan leiba te pawh chu rawn hawn chungin kan Finance Minister zahawm tak hnenah hian ka thehlut tawh nghe nghe a, hei hi rulh theih dan a awm ang em? Rulh theih a nih chuan cancer damlo harsa tak tak tan hian awmze nei takin enkawl na an dawng leh thei dawn niin ka hria a, kan Minister zahawm tak hi kan zawt a ni e.

**SPEAKER** : Awle, Minister zahawmtak a chhang turin sawm ila, zawhbelhna kha chu duh tawh ang.

**Pu LAL THANZARA, MINISTER** : Pu Speaker, zawhna neitu Er.Lalrinawma zawhbelhna atang khan, Health Care Scheme hi Asian Development Bank loan a interest atanga enkawl a ni a, kum khata bank interest hrang hrang, bank hrang hrangah fixed deposit-a dah a ni a, nimina kan ngaihthlak ang khan, interest hi a tlangpui thu in cheng vaibelchhe sawmpahnih vel a lo ni a, hemi pung zat hi limit nei a nih avangin Health Care Scheme hnuiaia bill theih pawh natna thlan bik, critical illness chauh APL tan chuan bill phal a ni. Tin, pawisa hi a limit avangin, bill pawh hospital ten an bill ang zat zat pek

a ni lo, package rate 2008 kuma kan adopt kha kan la hmang reng a, he package rate hi kan hman loh chuan heng interest hian min daih dawn lo a ni. Bank interest zir zela pek a nih avang khan kan lo ti danglam ngawt hleithe i lo, package rate pawh kan revise ngamlo, damlo te bill kan semzai a ngai si a, damlo mamawhtu an tam si a. Tin, nikum November atang khan central sorkar-in bank interest an tihniam lehngal a. Tihpun lam aiin an tihniam takah chuan engtia kalpui tur nge tih te pawh hi ngaihtuah a ngai hle a ni. Tin, tihpun lam pawh hi Finance hote nen kan officer ten an sawi tawh thin a, corpus fund hi tlem a zawng, return sang deuh hlek awm theihna, mutual fund a invest te kan sawiho tawh a. Chutiang zelin sorkar hian corpus fund hi augment thei sela cheng vaibelchhe sawmli sawmnga hian corpus fund-ah plan fund atangin han dah belh thei se tih rawtna te pawh a awm tawh a, helam zawnga rawtna hi a puitlin theih chuan a tihpun dan te pawh a awm mahna.

Tin, Pu Ruatkima zawhna, hemi hi engtik atanga hman nge tih hi, ka lo chiang chiah lo a. Hun hmasa lama hman tan tawh a ni a, hei hi chiang zawkin nakinah kan la inhriattir dawn nia .

Tin, Pu Piana zawhna Health Care sum hi khawih chingpen an awm em tih kha, health care sum hi kan hriat chinah chuan khawih chingpena a awmin kan hre lo a. Tin, mi pariat admit a mi pali chauh bill theih tih kha, Synod-ah RSBY bed reservation an siam avangin khami a reservation bak kha chu a bill theih loh a ni. Tin, bill hi hospital lam ten tun aia rangin an rawn thawn theih chuan a rang lama pek theih thin tum a ni.

**SPEAKER** : Pu Dinga zawhna kha.

**Pu LAL THANZARA, MINISTER** : Kha kha Finance lamte nena la sawiho tur chi a ni a, Pu Dinga hian a vanduai avanga a zu in enkawlnaah he thu hi an lo sawi a, ani pawhin ka hnenah a sawi tawh a, Finance lamah pawh kan sawi tawh a, kan lo bawhzui dawn nia.

**SPEAKER** : Starred Question No.45 na ah kan kal ang a, question neitu Pi Vanlalawmpuii Chawngthu zawt turin i lo sawm ang.

**Pi VANLALAWMPUII CHAWNGTHU** : Pu Speaker, ka lawm e. Ka zawhna Health & Family Welfare Department changtu Minister zahawm tak chhan atan Starred Question No.45 na – East Lungdar PHC ah doctor dah vat theih a ni em? Ka lawm e.

**SPEAKER** : Minister zahawm tak chhang turin i lo sawm ang.

**Pu LAL THANZARA, MINISTER** : Pu Speaker, Pi Vanlalawmpuii Chawngthu Starred Question No.45-na chhanna chu East Lungdar PHC ah hian tun dinhmunah doctor dah vat theih a ni rihlo a ni tih a ni a. Nimin lam khan Medical Officer post 26 lak phalna sorkar hnena thlen chu nimin lam khan kan Chief Minister zahawm tak leh House Leader ni bawkin min remtih sak tawh a, tun atanga reiloteah M.O post 26 hi hnawhkhah thuai theih kan in beisei a, chutih hunah chuan la ngaihtuah thei turah kan inngai a ni.

**SPEAKER** : Zawhbelhna zawng zawng pawh chhan fai vek a ni em? Starred Question No 46-na neitu Dr. K. Beichhua, MLA zahawm tak zawt turin i sawm ang.

**Dr. K. BEICHHUA** : Pu Speaker, ka lawm e. Health and Family Welfare Department changtu Minister zahawm tak hnena ka zawhna chu :-

- a) Siaha-a General Nursing Mid-wifery (GNM) School sak mek hi physical leh financial achievement engzatnge?
- b) Hemi school sak nan hian pawisa cheng engzatnge ruahman a nih?
- c) Central atangin engzatnge dawn a nih tawh? Contractor hnenah cheng engzatnge pek a nih tawh?
- d) Tunge contractor tih a ni e.

**SPEAKER** : Department neitu Minister zahawm tak Pu Lal Thanzara chhang turin sawm ila.

**Pu LALTHANZARA, MINISTER** : Pu Speaker, member zahawm tak Dr. K. Beichhua Starred Question No. 46-na chhanna chu hetiang hi a ni e :-

- a) “Physical achievement 50% a ni a, financial achievement pawh 50% a ni. Civil Work for Administrative cum Teaching Block-a kha tuna kan thawh lai mek a ni.
- b) “Siaha General nursing Mid-wifery (GNM) School sak nan hian vaibelchhe 10 ruahman a ni. Chu chu State matching share 15% nena belh khawmin a ni.
- c) “Central atangin first installment atan cheng vaibelchhe ` 4,25,00,000 dawn tawh a ni a. Mahse hei hi civil work vek atan a ni lo

va. Second instalment atan ` 2,50,75,000 January 2017-ah khan dawn leh a ni a. Contractor hnenah hian ` 3,10,68,885 pek tawh a ni.

d) Pu Lalparmawia, Chanmari, Aizawl a ni.

**SPEAKER** : Zawh belhna. An pahnih khan an zawt nghal dawn nia.

**Dr. K. BEICHHUA** : Pu Speaker, Siaha Civil Hospital saw an sa tha viau a, hna pawh a chak a, Siaha mipui kan lawm viau a ni. Lawmthu ka sawi bawka. Chutih rual chuan tuna school kan rawn sawi saw kum nga a ni deuh dawn der tawh mai a. Chuvang chuan he contract hna hi wawi engzatnge extend sak an nih tih ka zawh belh a. Chu bakah engtika hawn theih nge sorkar hian a inbeisei tih kha ka zawh belhna a ni e.

**SPEAKER** : Pu Rinawma khan zawt nghal mai se.

**Er. LALRINAWMA** : Pu Speaker, ka lawm e. Crore 10 vel man a ni tih kan hria a. Engtingge Health Department-in he hna hi a ken kawh mai theih? Finance Department-in Delegation of Financial Power a chhuah a, Health Department hian E.E chin a nei a, Financial Rule bawhchhiat a awm a ni lo maw tih lai kha min hrilhfiat theih chuan a lawmawm khawpin ka ring a. Chutianga Health Department ten hna an kenkawh mai theihna dan kha ka'n zawt a ni e.

**SPEAKER** : Department neitu Minister zahawm tak Pu Lal Thanhawla chhang turin sawm ila.

**Pu LAL THANZARA, MINISTER** : Er. Lalrinawma zawh belhna kha chhang hmasa ila. He project hi National Health Mission hnuiaia mi a nih angin Health Department hma lakna a ni.

Tin, zawhna neitu Dr. K. Beichhua zawhna wawi engzatnge extend a nih tawh tih leh hawn hun tur tih kha tunah hian ka sawi mai thei lova, kan progress azir leh kan extend tawh zat chu nakinah kan la hriattir dawn nia.

**SPEAKER** : Zawh belhna a awm tawh lova. Zawhna dangah kan kal ang a. Zawhna 47-na, neitu Dr. Ngurdingliana, MLA zahawm takin zawt se, i sawm ang.

**Dr. NGURDINGLIANA** : Pu Speaker, ka lawm e. Starred Question No. 47-na, Tourism Department changu Minister zahawm tak chhan atan 'Vanzau Tourist Resort

`4.197 crore senga sak zawh tawh kum nga dawn lai mai hman lohva awm reng hi Department-in eng ruahmanna nge a neih tih ka zawt e.

**SPEAKER** : Department neitu Minister zahawm tak Pu John Rotluangliana chhang turin i lo sawm ang.

**Pu JOHN ROTLUANGLIANA, MINISTER** : Pu Speaker, member zahawm tak Dr. Ngurdingliana Starred Question 47-na chhanna chu ‘Vanzau Tourist Resort sak zawh tawh hi furniture leh furnishing item leina tur Department-in sum a neih loh avangin hawn a la ni lova, central sorkar atanga 2<sup>nd</sup> instalment beisei a nih mek laiin a scheme ‘Product Development for Destination & Circuit’ chu tihtawp a lo ni a. Hei hi central sorkarin Tourism Department hi a de-link vang a ni. 2<sup>nd</sup> instalment hi release turin dil a ni a, Government of India in a rawn release a nih chuan Vanzau Tourist Lodge hi hawn tura hma lak leh a ni a. Hei hi Pu Speaker, central lamah pawh nasa takin kan zuk dil tawh a. Kan mang a an avangin tunah hian state sorkarah pawh Planning Department-ah dilna kan thehluh leh mek a ni. Ka lawm e.

**SPEAKER** : Zawh belhna a awm lova, a lawmawm e. E hetah, aw Pu Rinthanga, zawt rawh. Vanzau lam daih a nih avang khan khawthlang lam kha kan lo beisei lo lutuk a ni.

**Pu K. LALRINTHANGA** : Pu Speaker, Serlui B Hydel Project bulah khuan Tourist Destination a awm ve a. Khu khu a hawn lai awm ka hre lova. Amaherawhchu Receptionist erawh thung chu an awm ve a. Eng anga kalpui nge a nih tih kha kan zawt chiang duh a ni.

**SPEAKER** : Vanzau nen chuan inhlath viau mah se Minister zahawm tak khan a chhang thei tho ang chu maw!

**Pu JOHN ROTLUANGLIANA, MINISTER** : Pu Speaker, Serlui B ram ami khu kan la zawh fulfill loh avangin kan la hawng lova. Amaherawhchu khutiang reng ruang kan dah tawl mai kan hlauh avangin tunah khuan Receptionist angin MR pakhat kan indah ve ringawt mai a ni.

**SPEAKER** : A dawt lehah kan kal thei ta e. Zawhna No.48-na neitu Pu K. Sangthuama, MLA zahawm tak zawt turin i sawm ang.



**Pu K. SANGTHUAMA** : Pu Speaker, ka lawm e. Ka Zawnha Starred Question No. 48-na Home Minister zahawm tak chhan atan -

Sairang Police Station (Thana) leh Quarters sak that tumna a awm em tih hi ka zawnha a ni e.

**SPEAKER** : Department neitu Home Minister zahawm tak Pu Zira chhang turin sawm ila.

**Pu R. LALZIRLIANA, MINISTER** : Pu Speaker, ka lawm e. MLA zahawm tak Pu K. Sangthuama zawnha chhanna chu, ‘Sairang Police Station (Thana) leh Quarters sak that tumna a awm rih lo.’

**SPEAKER** : Zawhbelhna.

**Pu K. SANGTHUAMA** : Sairang Police Thana leh Quarters khu a tha lo khawp mai a. Pu Speaker, session apiang hian sak that hi a theih lawm ni tih ka sawi a. Chuvangin kan Home Minister zahawm tak hian Aizawl atanga 20 kms chauh a nia. Khuti tak maia quarters leh Thana thalo khu chu a sak dan ngaihtuah hram sela. Tunah hian kan sa thei ang tih kha min tiam mai thei em?

**SPEAKER** : Zawhbelhna a tam. Pu Chalrosanga’n zawt law law se.

**Pu CHALROSANGA RALTE** : Pu Speaker, kan Home Minister zahawm takin a chhan atan supplement-a ka rawn zawh chu Lunglei-ah sawn Police Station sak tumna a awm tih kan hria a, a ban te an lai vek tawh a. Saw saw tunah hian chawlh a ni a. Hei hi engnge an chawlh chhan khawngaihmin min chhang thei ang em tih hi ka rawn zawnha a ni e.

**SPEAKER** : Aw, Pu Pianmawia’n zawt law law se.

**Pu R.L. PIANMAWIA** : Pu Speaker ka zawnha chu Police Station hrang hrang atan hian Xerox khawl pek theih dan a awm ang em tih a ni.

**SPEAKER** : Pu S.Dinga’n a zawt leh ang a tikha chuan i duhtawk tawh ang u aw. A tam tawh e.

**Pu S.LALDINGLIANA** : Pu Speaker, kan Minister zahawm tak hian a chhang thei tho in ka ring a. A hminga ka bial ve Lunglei South, Hrangchawkawn piah lamah sawn khaw 11 a awm a. Lawngtlai District khawpui atanga 32kms Khawmawi tiam sawn khaw 11 a awm a. Sawlai tlangdungah sawn Police Beat Post emaw, Outpost emaw hi a

la awm lo a. Term hmasa atang khan kan Home Minister zahawm tak hi ka ngen thin a, tun thleng hian ka la hmu thei lo a.

Amaherawhchu tun tumah hian Finance Department atangin sum leh pai te pawh Home Dept. thumthatna turin an dawng tam deuh dawn ni te pawhin a lang a. Khawngaih takin sawlai tlangdung ah sawn Tawi South-ah emaw, Thingfal-ah emaw, a remchanna apiangah Police Beat Post emaw, Outpost emaw min dahsak ve thei ang em tih ka zawt e.

**SPEAKER :** Minister zahawm tak sawm ila, a chhan theih theih chhang sela. A inkarkik em em a, hriat vek sen a nih loh pawhin hrethiam ila.

**Pu R. LALZIRLIANA, MINISTER :** Pu Speaker, ka lawm e. MLA zahawm tak Pu K. Sangthuama, zawhna neitu in a rawn ngaih pawimawh kha a ngaihpawimawhawm khawp mai a. A bial hi a ngaihtuah khawp mai a, kan senior MLA a ni bawk a. Han sak that theih hi chu amah ang hian kan duh tho mai a. Amaherawhchu sum leh pai harsatna avangin, MPF-Police modernization scheme kha tunah hian a tawp tawh bawk si a. Keimahni budget atang lo hi chuan tihngaihna a awm tawh si lo a.

Tin, helai hi 2005-2006-a MPF scheme atanga sak kha a ni a, kum 11 vel emaw a la ni chauh mai thei a. Khatih lai khan kan lo sa tha lutuk lo em ni aw tih ka ngaihtuahnaah a awm a, a paw ka ti khawp mai a.

Engpawh ni se, kan hre reng a, sum awmdan azirin kan ngaihpawimawh hle a ni tih khawngaihmin min lo hriatsak mai se la. Hetia a zawh hian a bialte chuan a bial chung a ngaihtuah a ni tih hi chu an Chiang hle in ka ring.

Tin, MLA zahawm tak Pu Chalrosanga khan ‘Lunglei Police Station sak tum a ni tih kan hria a,’ a ti a, a dik a. Helai hi sak kan han tum a, pawisa pawh kan nei vek tawh a, tender te koh a ni a, PWD lamah pawisa hi transfer a ni a. A contractor te an thlang a, hna kha an va tan tawh zawk a, a ban te an va lai a.

Amaherawhchu, a hmun lai saw vantlang hmun pawimawh tak mai atan Lunglei khawpui NGO te leh keimahni mi leh sa ngei te pawhin an it em em a ni a. Sawlai hmun saw Police rama kan ram tha deuh mai, field te kan tih, a tlang ami zawl zau tak nen sawmi let thum aia zau saw a ni ang chu, chumi nen chuan thleng min rawn dil a.

Sports lamah cricket, tennis khelhna tur atana tih a ni a. Hmasawna zel ania lawm mawle kan ti a, kan inthleng sak a. Tah chuan kan duh a hman kan han tum khan Chhim bial changtute khan hma an rawn la a, an phal leh ta tlat lo mai a.

Police Department tan chuan a runthlak khawp mai a. Khilai ami nen khan inthleng let leh ang u han tih dawn chuan a ni mang bawk si lo a. Sorkar pumpa ve lemin a khatia han tih ngawt kha thil tih chi ah kan ngai lo a. Han sak luih hram chu kan han tum a. Amaherawhchu, dodalna te a lo awm chho ve zel a. A dodaltute hlauh vang ni lovin ngaihtuahna helai Aizawl atang hian min pe thui khawp mai a. Helaihan hian han sawichhuah remchang tak a ni ang a, House Committee hian an garage hnuai vel khu eng eng emaw fair tih nan te, flower show tih nan te an han hman ve thin lai a ni a. Chu chu House Committee in helaihan hian mipui nena inchim lutuk hi chu a remlo e tiin an lo phal ta si lo a. Khatiang ang tihna reng reng kha Aizawl-ah pawh hian kan nei ta lo a.

Tunah hian fair te leh eng eng emaw, kut hnathawktuten an neih ang ang te, an tharchhuah te, inzawrhchhuahna ve tur khan SARAS fair te kan han ti a. Flower show te leh exhibition tih ang chi te kha khilai Transport Department building khi an lo la luah lo hlauh a, khilai khi kan hmang ta tawk tawk a. Aizawl-ah pawh chu chu kan buaina a nih si chuan Lunglei-ah pawh an buaina ve tho tur a ni a. Chuvangin kan police hmun saw ui hle mah ila sawlai saw public point-a an hman theih turin cheibawl ila, Thana nen a inhnaih tho a. Chutiang chuan police ta a ni reng ang a, Home department thuhnuaihan awm tho siin saw aia tha deuh zawk sawn chei ta ila a tha ang e tiin sorkar kha chu a inhnuk hniam ta zawk a. Kan police department-te, kan DGP leh a thawhpuite nen kan han ngaihtuah a.

Chuvangin sawlaihan sawn sak ni lo mai sela. Kan transfer dawn a nih rau rau chuan, location transfer a nih rau rau chuan Siaha police station saw a chhe em em a, a bang te pawh hetia han sawi in MLA zahawm tak hian min hrilh a, an silai dahna te pawh a nging dur dur thei a ti a.

Mipuiin han bawh deuh sela chuan mi 10 pawhin, 10 pawh a ngai lo, amah pawhin a nemthlu thei mai dawn niawm tak a nia. Chuvang chuan sawlai sak nan sawn transfer mai ni se kan ti ta a ni.

A rawn diltute pawh kha sawlaihan kan VC te an lo kal a, in phalna ziaik rawh u ka ti a, an phalna an ziaik thlap a. Chuvangin sawlaihan transfer a nih pawhin Vairengte

ami a sakna kum 5-8 vel chauh la ni Saitual-a kan transfer ang em em kha chuan Lunglei khawpui te pawhin engmah buaina an siam turah kan ngai lo a. Chuvangin Siaha-ah transfer kan lo tum tawh a ni tih kha kan chhanna a ni a. Tin, chumi ka sawi pah chuan kan House Committee zahawm tak Chairman te pawh hi kan ngen duh a, Speaker te pawh. Helai hi chu hmun dang kan la neih hma hi chuan khawngaihtakin khulaiah kan session lai lo hi chuan garage a kan hman a nih a, a rush tehchiam lo bawh a. Tin, thil dang hlauhawm a awm pawhin police duty te nasa zawkin kan dah mai thei a ni.

Tiang chuan khawngaih takin review lo nei sela. Helaiyah a thlang lawkah khuan Agriculture office khu hmun zau tak a ruak kan la nei a. Tuna an office khu PWD lam atanga kan hriat dan chuan a luah ngam tawh loh e, hei hi chu thiah a ngai tawh a ni tih te pawh kan hria a. Khumi khu chhutchhiat a zawl zau tak siam theih a ni a. Khulai khu exhibition-na hmun tur te, thil dang tangkaia kan hman hun tur nghak hian tih hram hram ni sela. Chu chu kan nu te ho, kan nu han tihah kan hmeichhe ho aiawhin, a bik in Self Help Group aiawh te, flower exhibition tih ang chi te atan khan review turin an hmingin ka ngen sak a ni tih kha House zahawm tak hian min hriat sak sela, committee te pawh an thut leh hun ah chuan a ni tak a lawm maw, min tih sak thei se ka lawm khawp ang.

Tichuan Pu Pianmawia, MLA zahawm tak khan xerox khawl Police station tinah hian min pe thei ang em tih kha, an nei tawh der lawm ni, ka hre lova. Engpawhnise a tul ang ang hi chu kan hotuten an ngaihtuah zel a ni tih kha ka chhanna ni se.

Tin, MLA zahawm tak Pu S. Laldingliana khan Hrangchalkawn piaah lamah khaw 32 lai a awm a ti a, Beat-post emaw, Outpost emaw khawilai hmun remchangah hi chuan min dahsak se a tih kha a dik reng mai a.

Khawtin deuhthawah hian Police Outpost emaw, Beat-post emaw hi min dahsak rawh u ti hian an rawn dil a, ka lawm khawp mai a, kan police te achievement ropui tak, mipuiin rinna an nghah lan tirna a ni a, in chawimawina te pawh a ni zawk mah mah em aw kan ti a. Amaherawhchu Outpost te han dah tur hian post creation te a ngai a, tuna kan neih sa hi nakinah zawhna te pawh a la chhuak ang a, sanghnih chuvingin kan short tawh a, vacant post hi a awm tawh a. Chuvang chuan a thara tih loh hi chuan sum leh pai te a lo ngai a, kan ti thei meuh lo a ni e tih kha ka chhanna a ni e.

**SPEAKER :** I duhtawk tawh ang aw. Assembly lam a rawn kangkai dawn tlat mai hei hi chu. Duhtawk phawt mai ang.

Zawhna 49-naah kal tawh ila, zawhna neihtu Pu Lalthanliana zawt turin sawm ang.

**Pu LALTHANLIANA :** Pu Speaker, ka lawm e. Social Welfare Department changtu Minister zahawm tak chhan atana ka starred Question No. 49-na chu:-

- a) Tun hnaiah Anganwadi Building chhia thawm that tumna a awm em?
- b) Tui free connection pek tumna a awm hnai em?

Ka lawm e.

**SPEAKER :** Awle, chhang turin Department neitu Minister zahawm tak Pu P.C. Lalthanliana sawm ila.

**Pu P.C. LALTHANLIANA, MINISTER :** Pu Speaker, member zahawm tak Pu Lalthanliana zawhna chhanna chu :-

- a) Awm e.
- b) Awm lo.

**SPEAKER :** Zawhbelhna.

**Pu LALTHANLIANA :** Pu Speaker, zawhbelhna ka han zawt teh ang, building chhia thawm that tum te hi a location emaw, a hmun vel kha min hriattir thei ang em le?

**SPEAKER :** Minister zahawm tak khan a chhang thei tho em? Sawm ila.

**Pu P.C. LALTHANLIANA, MINISTER :** Pu Speaker, Anganwadi centre hi wawikhat kan sak bak hi repair a har thin khawp a. 2015-2016 ah khan Article 275 atangin nuai 225, reconstruction & repair atan min pe a, project tinah repair ngai leh khatiang kha la khawmin kan repair a. Tichuan tunah hian repair ngai hi 703, project tin ten repair tul an tih a thlalak te nen repair ngai tiin kan thawn thla mek a, a list leh an rawn lak khawm kha ka hre mai thei lova, chutiang chuan repair turin 703 lai a thlalak nen central-ah kan thawn leh a ni.

**SPEAKER :** Awle, duhtawk ila. Aw, Pu Nihar Kanti.

**Pu NIHAR KANTI CHAKMA :** Pu Speaker, ka lawm e. Ka zawhna chu, ka bialah hian hmun hrang hrangah Angawadi Centre an din nual a, mahse building hi tun thlengin sak loh in a awm a, vantlangin temporary deuhin an siam a, ka bial chhungah min tih sak ve thei ang em tih kha ka zawhbelhna a ni e. Ka lawm e.

**SPEAKER** : Chhang turin a changtu Minister zahawm tak sawm ila.

**Pu P.C. LALTHANLIANA, MINISTER** : Pu Speaker, Anganwadi centre thar hi 250 vel kum hmasa lamah kan hmu thar a, a sakna a awm hma hi chuan khawtlangin remchang ang anga building an lo sak ve a ngai a. Amaherawhchu, tunah hian kan sa dawn a, central-in dan thar a nei a, RD Department nena convergence-a tih tur a ni a. Tunah hian Gov't. of India RD lam atangin nuai 172 released tawh a ni a. Tichuan, keini ICDS lam atang hian Anganwadi centre tinah nuai 2 contribution kan pe ang a, chutiang chuan BDO te kaihhraina hnuaiyah heng kan la sak loh hrim hrim hi chu kan sa vek dawn a ni. Amaherawhchu, sanction lo kal dan a zir zela, a in tahtawla sak tur a ni.

**SPEAKER** : Tunah chuan zawhna 50-na ah kan kal thei e. Zawhna neitu MLA zahawm tak Pu Lalruakima sawm ila.

**Pu LALRUATKIMA** : Pu Speaker, ka Starred Question 50-na, UD&PA changtu Minister zahawm tak chhan atan ka zawt e.

**SPEAKER** : Awle, department neitu Minister zahawm tak Pu Zodintluanga chhang tur in sawm ila.

**Pu ZODINTLUANGA, MINISTER** : Pu Speaker, member zahawm tak Pu Lalruakima zawhna chhanna chu :-

Aizawl convention centre sak tum a ni. Circuit House awmna hmun hluiyah sak mek a ni. Special Plan assistance 2014-2015 hnuaiyah a sakna tur sum hi hmuh a ni. Estimated amount hi ` 2499.99 lakhs a ni. Contractor hi tender hmanga thlan a ni. Class 1 contractor Pu P. Lalbiaka, Luangmual, Aizawl hnenah pek a ni. Agreement ang chuan April 2019-a sak zawh tura ruahman a ni.

**SPEAKER** : Zawh belhna, a neitu Pu Ruatkima.

**Pu LALRUATKIMA** : Pu Speaker, ka lawm e. Kan convention centre sak mekah hian vanduaithlak takin a chhak lamah Bible House building te tih danglam a lo ngai ta a, zangnadawmna pek tum a ni em? A nih dawn chuan engtinngge ruahmanna siam a nih tih ka zawt e.

**SPEAKER** : Pu Pianmawia'n zawt law law se.

**Pu R.L. PIANMAWIA** : Pu Speaker, ka zawhna chu he lai convention centre ni lo, mipui punkhawmna tur YMA emaw, kohhran emaw, political party pawh

ina hman theih tur, min dawl zo tur khawpa centre sak tura kan lo sawi thin kha tun hunah hian hmalak zuina a awm reng em tih ka zawt e.

**SPEAKER :** Pu K. Sangthuama'n zawt law law se.

**Pu K. SANGTHUAMA :** Vanapa Hall khi chei that emaw, sak that tumna a awm em tih ka zawt e.

**SPEAKER :** Khalam kha chu a in kungkaih tho em ka hre lova, Minister zahawm takin min lo chhan sak sela, i sawm ang.

**Pu ZODINTLUANGA, MINISTER :** Pu Speaker, Mizoram ah hian sorkar programme lian te, VVIP te an lo thlen chang hian khual tha dawnsawna tur hi kan nei lo em em a, tin an lo thlen tum pawh hian kan meeting hall kan neih ang te hi a darh sarh em em mai a, mipui tan harsatna traffic jam ah te nasa tak kan siam thin a, chuang chuan sorkar in convention centre siam ni se an ti a. Chutah chuan Circuit House hlui saw kan thlang a, sawtah sawn presidential suite kan ti a, central minister te emaw, president te emaw, chung te pawh chu rawn thleng thei tura ruahman a ni a, VIP room 9, deluxe room 19 a ni a, meeting room mi 50 awm theih na tur, official ho a bika an meeting na tur 50 awm theihna hi pahnih a awm, Auditorium hi mi 336 awm theihna tur pakhat a awm dawn a, chuan hmeichhia leh mipa a hranin dormitory, entirnan, group a rawn thleng an awm pawha an thlen khawm theihna tur, mi 21 ve ve leng chutiang ang chu siam a ni. Car parking hi 89 a leng ang a, two wheeler hi 120 a hnuiah a leng ve thung dawn a ni. Tin, hei hi Aizawl cheimawitu tur ang ni tura ruahman a ni a, chung chu circuit house a kan member zahawm tak Pu Ruatkima sawi ang khan, a chhak lam Bible House zawn khi kawngpui a khi kan hmu tlat mai a, Aizawl District Chairman-na hnuai District Management hnuai a te uluk taka ven a ni a. A hnathawh dan te pawh Aizawl District Management-na hnuai a pawh engemaw chen kha kal a ni a. Aizawl Bible House saw Committee ten thiah a tul an ti a, tunah sawn thiah mek a ni a. Bible House hi Mizo te ta a ni a, kan C.M te kan Home Minister te in an ngai pawimawh em em a, tuna an sak na saw sorkar-in a hmun saw a lo pek tawh a ni a, tunah pawh hian Bible House awmna tur hi sorkar-in ruahmanna a siam mek a ni tih hi ka chhanna a ni e.

Tin, kan member zahawm tak Pu Piana zawhna kha a bik takin kan C.M te kan Home Minister leh kan Finance Minister hian Aizawl khawpuiah Sports lamah

chuan stadium puitling Rajiv Gandhi Stadium te, Dengthuama Hall te, Hawla Stadium te sak zawh tawh a ni a. Zai lama tui mi ten concert an neih theihna tur te leh mipui punkhawmna hrim hrim hi an mamawh a ni tih te term hmasa atang khan ngaihtuahna an seng tawh thin a. Tunah hian ruahmanna kan seng mek a Pu Speaker, a hmun tur tak hi la final chiah a nih loh avang hian he House-ah hian ka sawi lo mai ang a. Amaherawhchu, YMA General Conference te, Political Party te, Kohhran hrang hrang ten khawmpui an neih te dawl zo tur leh tunlai khawvel thang thar zel ten a khawvel huapa concert lian te, fashion show emaw rock group emaw chutiang dawl zo thei tur chu ruahmanna kan siam mek a, chutiang ang sakna tur atan tunkum financial year-ah pawh NEDP atangin pawisa pawh dah a ni tawh a, a hmun hi Pu Speaker, kan final ve leh puan theih turin kan rawn sawi dawn a ni.

Tin, kan member zahawm tak Pu K. Sangthuama zawhna, Vanapa Hall chei that tur kha kan NEDP atanga hmanni a file-a ka hmuhah chuan Vanapa Hall chei thatna tur hian cheng nuai za engmaw zat hi dah a ni tih hi ka hmu ve tih hi ka chhanna ni rawh se. Ka lawm e.

**SPEAKER** : Kan duh tawh dawn nia. 51-na kan kal dawn mi.

**Pu LAL THANHAWLA, CHIEF MINISTER** : Kan sawi ve lawk ang e. Ni e, Vanapa Hall hi a hlui tawh a, tin, a old fashion deuh tawh a, a him vak hi a rinawm tawh lova. Amaherawhchu, Convention Hall sakna tur hi kan zawng rei tawh khawp a, Basic mual-ah te hian kan zawng a kan duh zau si a, a lo rem hlei thei lova. Tin, Brigade hmunah sawn kan zawng a, kan dap nasa a, mimal ramin a lo khat deuh vek tawh ti tih a, hmun a awm thei lova, chuvangin Circuit House kan neih saw ui takin Convention House kan neih si loh avangin kan hotuten thiat mai ang an tih avangin saw ti sawn kan ti ta a chutiang chuan ruahman a ni.

Tin, Convention Hall chu kan neih hun tur hriat anih si loh avangin Vanapa Hall saw thiat lovin chei that tum a ni a, tunah hian NEDP Fund atang hian Sanction tawh a ni a, PWD-in a chei that hna an thawk dawn a ni. Tin, Convention Hall sak vang a nih leh nih loh saw tu man an finfiah thei lova. Disaster lam te pawn Bible House chhiatna chhan saw an en tawh a an finfiah hlei thei lo a ni Kohhran hrang hrang hruaitute leh kan Home Minister te pawn an inspect vek tawh a, chu mai ni lovin expert committee te pawn an en tawh a, mahse, chuti chungin Bible House saw Kohhran hrang



hrang ta a ni a, a hmun tur a tha a ngaih sorkar-in a pe dawn a. Tin, chu chu PWD estimate-ah hian cheng vaibelchhe li zet a ni dawn a, chungte thleng chuan kan sorkar hian kan tih chhiat anih leh nih loh lam ai mahin a pawimawhna avang hian tih sak a tum a ni.

**SPEAKER** : Awle, a lawmawmin a bengvarthlak hle. Zawhna No. 51-naah kan kal thei tawh a. A neitu Pu Er. Lalrinawma i lo sawm ang a zawt turin.

**Er. LALRINAWMA** : Pu Speaker, ka lawm e. Fisheries Department changtu Minister zahawm tak laka ka zawhna 5a-na :-

- a) Kum 2016-2017 chhungin Fisheries Department huai hawtin Fish-mela vawi engzatnge neih a nih?
- b) Fish-mela atan hian Mizoram Fish Farmer-te hnen atangin sangha quintal engzatnge lei sak an nih? Cheng engzat man nge tih ka zawt e.

**SPEAKER** : Awle, a Department changtu Pu B.D. Chakma chhang turin i lo sawm ang.

**Pu B.D.CHAKMA** : Member zahawm tak Er. Lalrinawma zawhna Starred Question 51-na chhanna chu:-

- a) Kum 2016-2017 chhungin Fisheries Department huai hawtin Fish mela vawikhat neih a ni.
- b) Fish mela atan hian Mizoram Fish Farmer te hnen atangin sangha quintal 37.1 leisak an ni a, cheng 6,47,675/- a ni.

**SPEAKER** : Zawhbelhna a neitu Er. Lalrinawma.

**Er. LALRINAWMA** : Pu Speaker, ka lawm e. Ka zawhbelhna chu hemi atan hian sum engzatnge ruahman a nih a, engzatnge senso a nih? Sangha te hi duh khawp lei tur kan hmu em tih a ni e.

**SPEAKER** : Zawhbelh tur nei kan awm em?

**Lt. Col. Z.S.ZUALA** : Tunlai hian sawi neuh neuh a awm a, formalin hi sangha State dang atanga an lak luh preserve nan hian an hmang an ti a, hei hi a hlauhawm lo tih hi prove-na kha a awm chiah em? tih kha ka zawt e.

**SPEAKER** : Awle, a changtu Minister zahawm tak khan han chhang sela.

**Pu B.D. CHAKMA, MINISTER** : Pu Speaker, Er. Lalrinawma zawhbelhna hi a amount kha ` 25 lakhs a ni a. Hei hi chu National Fisheries Development Board lam

atanging cheng nuai sawmhnih panga kan hmu tawh a ni. Tin, senso hi khatiang ang tho kha a ni a, khami hisap zel kha kan kal dan tur a ni. Tin, Pu Z.S.Zuala zawhna hi formalin lampang kha chu Facebook-ah te Whatsaap-ah te kan hmu theuh tihna ania, mahse, Mizoram-ah hian khatiang formalin pawlhtu sangha zuar chanchin hi ka la hre miah lo a ni. Ice plant atanging preservation tha tak kan nei a chuang chuanin hemi formalin adulteration chungchangah hian Mizoram chuan tun thlengin complaint hi kan la nei lo chuan kan hria a ni. Ka lawm e.

**Pu LALRUATKIMA** : Pu Speaker, khawngaihin. Fish Farmer te hnen atang khan sangha hi Kg-ah `170-in kan lei tihna a ni a. Engzatin nge mipui hnenah hralh chhuah a nih? tih hi ka zawh leh na ni sela. A dawt leh ah chuan NFDB atang khan `25 lakhs kha kan hmuh a ni a. Khalaia tum khat mela neih nana nuai 25 kan sengso kha a mak hle mai a. Eng atan em em nge maw an hman le min hrih thei em a hmanna tlangpui?

**SPEAKER** : Pu Lalrinawma, a tawp nan ti tawh se.

**Er. LALRINAWMA** : Pu Speaker khawngaihin Minister zahawm tak khan Sangha kha duh khawp kan hmu em tih kha kan zawt leh duh a ni. Nichina ka zawhna a ni a, kan zawt nawn leh a nih chu. ka zawhna pakhat kha min la chhang kim lo.

**SPEAKER** : Minister khan han chhang sela.

**Pu B.D. CHAKMA, MINISTER** : Pu Speaker, zawhna neitu hmasa kha kan chhang ang a. Sangha hi duh khawp nei turin perisable goods hnuaia awm thin a ni a. Chuvangin, fish mela chungchangah zau deuhvin ka sawi duh a ni. Hei hi vawikhatna anih angin perisable hnuaia awm anih avangin nikhatah hian duh tawkin ka pe thei tawh lo a ni. Risk chuan tunge pe ang tih kha kan ngaihtuah thin a ni Fisheries Department lam atanging. Mahse, second day atanga third day thlengin hetiang shortage hi awm lovin kan hria a. Tin, a piece chungchangah hei hi vawikhatna anih avangin kan Chief Minister zahawm tak hemi thilah hian khuallian atan kan sawm tawh a. Tin, Home Minister zahawm tak chu khuallian atan kan sawm tawh bawk a. Kan rulling MLA te chu Vanapa

Hall an kim vek a ni, amaherawhchu, opposition lam atangin tu hmel mah ka hmu lo. Chuvangin next lamah chuan anmahni pawh duh tawkin tel teh se tih kha kan ngen deuh a ni.

Tin, Sangha zawrhna lamah hian Pu Lalruatkima zawhna hi Fish farmers Kolasib leh Mamit lam atangin kan lei sak a ni, 37.1 quintal a kha farmers hnen atangin 175-in ka lei sak a, tin a selling price chu `150 a ni. Lost-a kan hralhna chhan chu Fish farmer te motivate nan kha kha chu kan lei sak a ni, fish ngawt nilovin fish food pawh khatiang subsidy rate-a hralh kha chu keimahni Fish Department lam atanga kan hmalakna avang a ni kan ti a.

Tin, nikhat chauha cheng nuaikhat senso kha chu ka awihlo a ni, nithum chhung ni riat ni sawm chhung kha kan nei tawh a ni. An hralh theih loh avangin ni khat chauh em ni tih kha a dik lo a, ni thum chhung kha an hmang ve tawh a ni khami nuai 25-in, kan hisap a nithum chhunga nuai 25 chu ni thum chhung chu a daih tawk lo a ni, lost a ni. Chuvangchuan, khami nuai 25 kha income leh outcome anga kan hisap deuh avangin khami ni thum chhung chu khatianga ruahmanna kha kan siam tawh a ni. Pu Speaker, ka lawm e.

**SPEAKER** : Opposition lam kha zawhbelhna a siam zawk che u a. Zawhna No. 52-na zawhna neitu Dr. K. Beichhua, MLA zahawm tak sawm ila.

**Dr. K. BEICHHUA** : Pu Speaker, Health & Family Welfare Department changtu Minister zahawm tak hnena ka zawhna -

a) Mizoram State Health Care Society hian Aizawl Civil Hospital-a hepatitis 'C' enkawlna man tlawm zawka kalpui turin remna thuthlung (MoU) siampui a nei em ?

b) Hepatitis 'C' enkawlna complete course atan cheng engzatnge sen ngai, tun dinhmunah Civil Hospital Aizawl-ah hian tih a ni e.

**SPEAKER** : Department enkawltu Minister zahawm tak Pu Lal Thanzara chhang turin i lo sawm ang.

**Pu LAL THANZARA, MINISTER** : Pu Speaker, Member zahawm tak Dr. K. Beichhua-a Starred Question No. 52-na

a) Mizoram State Health Care Society hian Aizawl Civil Hospital-a hepatitis 'C' enkawlna man tlawm zawka kalpui turin remna thuthlung (MoU) siampui a nei em tih chhanna chu, Nei e, tih a ni.

b) Hepatitis 'C' enkawlna complete course atan cheng engzat nge sen ngai, tun dinhmunah Civil Hospital Aizawl-ah hian tih zawhna chhanna chu, Health Care hnuai in register damlo tan pawisa sen a ngailo tih a ni e Pu Speaker.

**SPEAKER :** Zawhbelhna, a neitu Dr. K. Beichhua.

**Dr. K. BEICHHUA :** Pu Speaker, hepatitis 'C' kan tih hi HIV (Aids) nasa taka kan inthlah chhawn ang hian Mizoramah tunah hian kan inthlah chhawng a ni. Chuvangchuan, he enkawlna hi pawimawh hlein ka hria a, khawi company nen nge MoU hi an sign tih ka zawhna pakhatna ni se.

Tin, hepatitis 'C' Aizawl Hospital-a enkawlah hian Health Care Scheme neilo te tan man tlawm zawka enkawl dan ruahman a ni em tih hi ka zawhbelhna a ni e.

**SPEAKER :** Awle, han zawt law law sela Pu Lalruatkima.

**Pu LALRUATKIMA :** Pu Speaker ka zawhbelhna chu, Aizawl Civil Hospital tia kan hriat thin hi District Hospital, Aizawl tiin hming thlak a ni em? Anih chuan engtikah nge thlak a nih a, engvanga thlak nge anih tih kha ka zawhbelhna a ni e.

**SPEAKER :** Er. Lalrinawma.

**Er. LALRINAWMA :** Pu Speaker, ka lawm e. Hepatitis 'C' tana hmalak ang hian Hepatitis 'B' tan hian hmalak ve theih a ni em tih ka zawt e, Hepatitis 'B' tan ve thung.

**SPEAKER :** Pu R.L. Pianmawian han zawt ve law law sela.

**Pu R.L. PIANMAWIA :** Pu Speaker, ka zawhbelhna chu Aizawl Civil Hospital tihchangtlun nan hian hma thar engte nge lak anih tih a ni e.

**SPEAKER :** Awle, Minister zahawm takin chhang tawh sela, i sawm ang.

**Pu LAL THANZARA, MINISTER :** Pu Speaker, Hepatitis 'C' enkawlna tur atana MoU kan sign pui chu, Mylan Laboratories Limited, Bangalore te an ni. Hei hi tender lova thlan an ni a. Tin, Health Care hnuaiia Hepatitis 'C' enkawlna chu a lo tlawm zawk theih nan hetiang hian ruahmanna siam a ni. MoU pawh hi he

company leh Mizoram Health Care Society ten Hepatitis ‘C’ enkawlna damdawi leh a man hi a danglam zin em avangin thla ruk chhung atan chauh sign rih phawt a ni.

Tin, Health Care Scheme hnuai in register lote tan hei hi man tlawm zawka tih theih dan a awm em tih hi ka chianglo na-a tuna man neilova kan tih sak tepawh hi cheng singthum Civil Hospital-in an lo pek sak a, chumi hnuah Health Care atanga an realize leh a ni a. Chutiang chu an kalpui dan a ni a, helai hi kan la sawi leh tur nisela.

Pu Lalruatkima zawhna Civil Hospital hi engtik atanga Aizawl District Hospital tih a thlak nge tih kha, kum 2006, February thla atanga Civil Hospital khi Aizawl District Hospital tia thlak a ni. Hei hi administration leh Medical College kan neih tumna atanga remchang zawk a nih avanga ruahmanna hi siam a ni.

Tin, Member zahawm tak Er. Lalrinawma zawhna kha ‘B’ tan hian tih ve theih a ni em tih chu tunah hian ka chiang lo mai lova, kan inzawt chiang ang a, kan la inhriattir leh dawn nia.

Tin, Member zahawm tak Pu R.L. Pianmawia khanin Aizawl Civil Hospital chang ni lo, District Hospital zawng zawng hi NEDP hnuai atangin tihchangtlun tum a ni a. Hmanrua thar tha tak takte lei tuma hma lak mek a ni.

**Pu LAL THANZARA, MINISTER** : Pu Speaker, i remtihna in member zahawm tak Dr.Beichhua hi Medical doctor anihna ang in kan department tan hian thahnem a ngai a, zawhna pawh a siam tam hle a. A zawhna hrim hrimah hian intih mualpho tumna aiin thahnem min ngaihpuina lampang niin ka hria a, a chungah hian lawmthu sawi tur kan neiin ka hria a. Hmanni ah khanin kan House Leader zahawm tak khan a sawi tawhna a, Department changtu Minister ka nihna angin vawiin a kan sawi duh chu, 20<sup>th</sup> Feb.2017 khan Saiha Hospital ah pumpui pawp zai ngai a awm a, chutihlai chuan kan Medical Superintendent Surgeon ni bawk Siaha ami chu Aizawl lama training a kal bo hlan anih avangin zai tur an awm lova. Tichuan Dr.K.Beichhua hian tlawmngaiin he damlo hi min zai sak a, tha takin a zai dam ani. Chuvangin vawiinah hian House hriatpuina in lawmthu kan sawi a ni.

Tin, Pu Speaker, i phalna bawkin member zahawm tak Pu Lalruatkiman Health Care Scheme engtik atanga kalpui tan nge a tih kha, kum 2008 atanga kal pui a ni tih kha kan sawi leh duh bawk a ni e. Ka lawm e.

**Dr. NGURDINGLIANA :** Pu Speaker, ka lawm e. Member zahawm tak Pi Vanlalawmpuii Chawngthu starred question 45-na ah kha kan Minister khan a rawn chhang tawh bawk a, a next question hi kan senior zawhna a ni a kei chuan hun ka la tawh lo mai ang nge.

**Pu K.SANGTHUAMA :** Pu Speaker, ka lawm e. ka starred question 54-na Health & Family Welfare Department Minister zahawm tak chhan atan - Sairang Damdawi In sak zawh a ni tawh em ? tih hi ka zawhna a ni e.

**Pu LAL THANZARA, MINISTER :** Pu Speaker, ka lawm e. Starred Question No. 54-na chhanna chu – Sairang Damdawi In sak zawh a la ni lo.

**SPEAKER :** Zawhbelhna hun i lo hawng ang.

**Pu K.SANGTHUAMA :** Pu Speaker, ka lawm e. Lawmthu tlem han sawi ka duh a. Kan Home Minister ai kha chuan a ti tha hretin ka hria a. Health lamah chuan hmasawna kan nei a a, lawmawm khawp a, Damdawi In thar tur khu kan han sa zo ang a, reiloteah kan hawng ve mai thei turah ngai ila. Chuvangin kan Health Minsiter chungah hian lawmthu kan sawi a hetiang ang bawk hian, kan Home Minister hnenah pawh kan session leh ah chuan lawmthu sawi turin kan lo inring dawn nia. Ka lawm e.

**SPEAKER :** Awle, question hour chu lawmthu sawina nen a tawp ta a. Pu JH Rothuama leh Pu Hmingdailova Kiangte ten chawlh an dil a kan phal a ni tih kha kan sawi duh a.

Tunah chuan tarik ni 15.3.2017- a starred question No.100 ballot No.8-na Member zahawm tak Pu Lalruatkima zawhna chhanna chungchangah “statement of correction corrigendum neih” Home Minister zahawm tak hian neih a duh a chumi copy chu House ah lay turin amah i sawm ang.

**Pu R.LALZIRLIANA, MINISTER :** Pu Speaker, ka lawm e. i phalna in 15.3.2017 a starred question no.100-na ballot no. 8-na Member zahawm tak Pu Lalruatkima zawhna Buhthar chungchang ah khan hetiang hian correction ka rawn

siam a. Tun dinhmunah hian WRC ram enkawl mek hi Mizoram pumah hectare 16922 a awm mek tih hi nilovin, 16862 tih zawk tur a ni a. Tin (c) naah khan – kum 2012 – 2016 chhung khan RKVY hnuai WRC siamna atan sum cheng nuai 2777.684 tih nilovin Nuai 2776.24 tih tur a ni e, ka lawm e.

**SPEAKER** : A lawmawm e, he House hi thudik lanna a ni tih a chiang hle a. A copy kha lo sem rawh u le. Tunah kan Minister zahawm tak Pu Zodintluanga paper lay turin i lo sawm ang.

**Pu ZODINTLUANGA, MINISTER** : Pu Speaker, ka lawm e. I phalna leh he House remtihna tihna in - “The Mizoram Water Supply (Control) (Amendment) Rules, 2016 and “The Aizawl Municipal Corporation Building (Amendment) Regulations, 2016, hi he House zahawm takah ka rawn lay e.

**SPEAKER** : A copy kha sem leh nise.

**Pu LALRINLIANA SAILO** : Pu Speaker, Unstarred question 16-na ah hian Hnahthial sub-division Lunglei District hnuai kum 2012-2017 chhunga Health and Family Welfare Department hmalak tawhna hrang hrang construction works with estimates amount tih leh hmalakna te hi min pe thei em tih zawhnaah hian. P & E in a rawn chhang daih mai a hei pawh hi House zahawm tak zahawmna vawn nun zel nan correction siam leh a va tha awm ve.

**SPEAKER** : Tunah hian Paper lay tur bawkin Pi Vanlalawmpuii Chawngthu i lo sawm ang.

**Pi VANLALAWMPUII, CHAWNGTHU** : Pu Speaker, ka lawm e. I remtihna leh Subject Committee-II in min authorized ang in – Statement on Action taken on the further recommendations of Subject Com mitteeII contained in the Fourth Report 2016, relating to Environment, Forests & Climate Change Department chu he house zahawm takah ka rawn lay e, ka lawm e.

**SPEAKER** : A copy kha sem leh ni se. Tunah chuan Presentation of Reports kan nei leh ang a. Pi Vanlalawmpuii Chawngthu in report pathum rawn present se la house-ah hian.

**Pi VANLALAWMPUII CHAWNGTHU** : Pu Speaker, ka lawm e. Vawiinah hian Subject Committee II Chairman ka nihna angin Action Taken Report pathum he house zahawm takah hian ka rawn present dawn a. Chungte chu - Sixth Report of

Subject Committee II on Action Taken Report relating to Border Area Development Programme leh Seventh Report of Subject Committee II on Action Taken Report relating to Tlawva Small Hydel Project leh Eighth Report of Subject Committee II on Action Taken Report relating to Mizoram Houses (New Delhi, Kolkata, Guwahati) te hi i remtihna in he house zahawm takah hian ka rawn present e, ka lawm e.

**SPEAKER** : Awle, a copy kha sem ni se. Tunah chuan Financial Business-ah kan kal thei tawh a. Annual Budget 2017-2018 sawihona niminah kan nei tawh a. Nimin khan MLA zahawm tak 10 in an sawi tawh a. Vawiin bak hi sawihona hun kan nei lo va. Tunah chian sawiho kan tan leh ang a. Nimin ang khan mipakhat tan minute 10 kan in pe leh ang a. Sawi tan tawh ang u. Tunge sawi hmasa ber ang? Naktuk tih khek te kha kan awm nual kha, ding tawh ila, Pu K.Sangthuama.

**Pu K.SANGTHUAMA** : Pu Speaker, naktuk a nghah leh chi vak tawh si lo va, kan sawi hmasa mai ang a. A hmasa lam hi a tha duh zawk a, chawhnu lamah phei chuan kan tlem deuh thin a. Chuvangin thusawi hriat kim theih kha a ni a. A hmasa lam apiang hi tha zawk turah ngai ta ila. Sawi duh tam tak a awm rualin tam tak kan sawi hman leh lo ang a.

A hmasa bera ka sawiduh chu Health Care Scheme hi a ni a. Mizoramah hian tunah chuan mihring nuai 12 vel awm angah han in ngai ta ila. Khawpui-ah hian 33% vel awm angah ngai ila. A chiah chiah chu ni lo mahse nuai 12 velah hian nuai 8 vel chu thingtlanga awmah ngai ila. Chu chu 67% vel a ni a, khawpuiah hian 33% vel turah kan ngai a. Khawpui han tihah District khawpui 8-ah hian, chu chu a tlangpuiin a dik thawkhat ka ring a. Hetilaiah hian thingtlang lama kan mite hi an harsat zia te, an retheih zia te kan hre vek a, sawi nawn ngai lovin. Hengho tana Health Care Scheme kan ruahman hi tun aia tam zawk deuh, tun aia sum an hmuh theih zawkna turin damlo an in enkawlnaah hian pawisa te hi dah tam ila a tha ang a tih hi ka rilru a lian ber a ni a.

Hei damloh thilah hian phai lamah te kan han kal a, harsa tak tak thingtlang atanga lokal te tam tak sum leh pai nei lo ve leh chhawng te an lo kal hian an khawngaihthlak em em in ka hria a. Hetiang atanga tanpuina cheng nuai 3 lai lo dawng thei te pawh eng emaw zat an awm. Chung avanga kal thlak (kidney transplant) te pawh eng emaw zat an awm a. Chu chu nuai 3 te an dawn theih avangin an tangkaipui em em a. Chuvangin hemi kawngah hian tun aiin sorkar hian tan la chho se. Sum te pawh hi dah



tam theih nisela. Puk a ngaih pawhin puk mai ni se, puk atanga interest lo awm thei ang a kan han enkawl te hi a tha em em a ni.

Chuvangin, thingtlang lama 67% lai awm te hi harsat namen lovin an harsa a. In enkawl na nei lovin, ei leh bar zawn ngai bawk si. Damdawi In a an awmin khulchhuah ngai tam tak an awm a, MLA chuan kan hre theuh ang a. Damdawi In a awm te hi mi tam tak chuan a khul pawh an khul chhuakin ka ring kan MLA te hian. Chutiang ang khawpa harsatna tawk tam tak an awm a. Chung mite dawmkan nan leh an harsat zual pui han phuhruk theih nan Health Care Scheme hi tun aia awmze nei leh zual zawka sorkar hian tan la a enkawl thei turin vawiinah hian ka ngaihtuahnaah chuan a lian ber a.

A dang kan sorkar hnathawh leh thildang tam tak hi chu a lian hle na chungin mihring hi kan hrisel loh chuan engmah a ni lo a. Sum pawh hi nei ila, hausa viau mah ila kan hrisel tlat loh chuan kan hmang thei chuang lo va, a hlawkna a awm chuang lo. Chuvangin, mihring hriselna a pawimawh a ni tih hi he house hian kan hriat vek rual hian, hre leh zual ta ila. Kan Health Minister te, kan Chief Minister zahawm tak te, kan Home Minister te rilruah hian lian deuh hlek sela tih hi kan duh deuh a. A ngen pawh kan ngen duh a ni.

Chuvangin, harsatna chi hrang hrang India rama damlo damdawi in chi hrang hranga kal te hi tam tak nitin in an awm a. Vellore-ah pawh khuan a tlangpuiin damlo 50 atanga 100 hi nitin awm ang an ni a. Mi tam tak chuan sorkar atanga bill theih te an nei a. Amaherawhchu mi tam tak chu bill theih nei lem lo va kal ngai tlat si. Cancer te, kal thlak ngai te, natna chi hrang hrang Hepatitis C kan tih ang chi te, mi tam takin an pan a. Vellore ringawt pawh khu nitin damlo 50 atanga 100 inkar hi awm reng ang an ni a. Chuvangin, Aizawl a tih theih loh damdawi in hla pan ngai Kolkata te, Delhi te, Mumbai te, Vellore te, Madras thlengin. Chutiang ang chu mirethei zawk tam tak an awm avangin helai hi ngai pawimawh leh zual turin vawiinah hian kan chah mawlh mawlh duh a ni.

Medical Re-imburement-ah hian sorkar hnathawk tan kum tin vaibelchhe 80 vel kan dah a. Hei hi a tha khawp mai a. Sorkar hnathawk pawh hian a dik chiah chuan a vai hian an bill leh thei chiah chuang lova, 50% vel hi a tlangpuiin bill theih a ni chauh a ni. Mi in nuai 10 te a sen chuan a tlangpuiin nuai 5 vel a

bill ve thei chauh a. Tichuan kumin ah pawh hian crore 80 vel chuang hret dah awm in ka'n hria a, a tha a hengte pawh hi. Chuvangin sorkar hna an thawhnaa nilo baksaka engemaw damdawiin a an zu hmang a nih lem loh chuan an phu hle tho a ni sorkar hnathawkte pawh hian. Chuvangin ren zawka hman theih na sorkarin a ngaihtuah pawn a tha tho a. Sum hi sorkarin a renchem tura tihna ang a kan tih theih chuan sorkar hnathawk tan te pawh a daih tam zawk dawn a. Chuvangin hetilai kawngah te pawh hian sorkar hi damlo chungchangah hian tun aia ngaihtuahna zau zawk hmang leh turin vawiin ah hian ka'n sawi leh duh a ni.

Tin, chubakah Health ah hian doctor leh nurse hi an indaihlo em em a. Chuvangin hei hi ngaipawimawh ila, thingtlang lamah te kan mi harsa zawk te enkawl turin dawmdawi thiam zawk te tun aia tam kan tirhchhuah theih nan hian Health lamah hian doctor leh nurse te lak tam theih dan hi ngaihtuah mawlh turin vawiin ah hian ka'n ngen ngawih ngawih duh a. A chhan chu hei MCS kan tih te, MPS kan tih te Pu Speaker, heng hi kumtin kan lak theih chuan engatinge doctor te, nurse te hi kumtin kan lak theih loh bik lem ang ni? Kan ram tana pawimawh a ni a, a pawimawhna ang hian helamah pawh hian chak zawkin hma la ta selangin. DP&AR in a kum tin a MCS te, MPS te leh officer dang an lak hi a tha lo tih na nilovin Pu Speaker, tawi te. Helaiyah hi chuan administration ah hi chuan kan indaih deuh hlekin ka hria a, Secretariat ah kal ila Under Secretary te, Deputy Secretary te, Joint Secretary te, Secretary te hi an tam em em a ni. Chuvangin doctor erawh hi chu thingtlangah hian an tlem em em a kan hre theuh a, chuvangin District damdawiin ah te, tin District ah kher lo te pawh Sub-Centre ah te leh hmun dang dangah doctor tam tak leh nurse tam tak kan mamawh a. Heng kan mamawh ang puhruk thei tur hian helam DP&AR in kumtina MCS te leh officer dang police lam an lak te leh officer dang an lak te hi tlemin chawl hret thei sela, hetiang lamah hian ngaihtuahna chak zawkin hmang sela tih hi vawiinah hian ka'n sawi duh bawk a ni.

Pu Speaker, sawi tur tam tak a awm a hun a tlem si a thil pakhat chauh khawngaih in, minute khat emaw chauh a ni ang, min lo ngaidam la. Hei NEDP hi kan hmu a, kum in kalta ah hian vaibelchhe 270 dah a ni a. Hetilaiyah

hian NEDP hi a thawm a awm lo hle mai a, eng angin nge an hman? Nichinah khan building sak nan te leh eng eng emaw atan khan an rawn sawi a ni a. Vaibelchhe 270 NEDP a dah hi kumin chhung hian a thawm kan hre meuh lova, heng hi eng angin nge an dah contract thawh nan nge a nih a, eng siam nan nge an hman a, eng atan nge an hman? tih te hi sawi a awm lo viau mai a. Chuvangin vawiin lamah te pawh sawi hawng thei in awm chuan hriatzau nan a tha a. Engnge ni mimal tana contract in pe ta mai mai nge ni engnge ni khang kha vawiin ah hian kan hre meuh lo a chuvangin hengte pawh hi, vaibelchhe 270 lai hmanna te pawh hi, tunah chuan mipui leh House ah pawh hian kan hre meuh lo a ni. Chuvangin helaiah hian ngaihtuahna te leh hmanna te kha nakinah in sawi zau theih chuan a tha khawpin ka ring. Pu Speaker, ka lawm e, chu chu ka sawi theih tawk ni mai rawh se.

**SPEAKER :** Awle, kan vaia hriat atan. Thusawitu thusawi lai leh Chair inkarah tupawh kal rih loh tur. Entirnan Pu Ruatkiman thu a sawi lai mek khan Pu Zawma hi a rawn lut dawn ta a, chulamah chuan a thu rih a, a sawi zawh hma khan a nghak reng a, a sawi zawh khan a rawn thu a ni. A chhan chu Chair leh thusawitu inkara kal a ngaih avangin. Chutiang chuan he House tizahawm tur chuan thusawi mektu kha loh theih loh a nih loh chuan an inkar a nih chuan helam atang khan hel tur a ni a, helna kha ngaihtuah tur. Chu chu nakin zel atan House a hriat atan ka'n puang a ni.

Awle, sawi leh tur midang Pu Z.S. Zuala.

**Lt. Col. Z.S. ZUALA :** Pu Speaker, ka lawm e. Kan Finance Minister speech atang khan Police lampang hi a department a lang in a han sawi a, motor siamna atana cheng nuai 76 a han pek belh te hi a ni a. Tin, TA tan nasa takin department ah pek belh a ni a, tin, uniform a ni a. Police hi kan hriat angin kan under-strength nasa khawp mai a, chuvangin a awm sa hi chu uluk taka kan thuam kan enkawl hi chu a pawimawh reng a. Hei kan hriat angin Mizoram hi ( Speaker : Kan han inthlak lawk ang e. ) (Deputy Speaker : Awle, chhunzawm rawh le) Manipur leh international boundary Bangladesh te karah kan awm a. Heng State leh heng ramah hian hel an awm thuah tun tih kan hria a, englaipawh hian min tibuai thei reng a.

Tin, mi pawh an tibuai zeuh zeuh a Manipur atang a ni emaw, Assam a ni emaw hmanni lawkah pawh khan kan hriat angin Kanhmun ah kan forest staff ho te pawh an rawn vau a ni a. Hetiang hnuaia kan awm avang hian kan police te hi kan train that leh zual a ngai hle in ka hria a. Chutiang realize a pawisa han pe tam pawh a nih ka ring a.

Tin, police modernization scheme ang kha tunah hian kan nei ta si lova. Kan sipai te hian hemi hel beihna tura han in practice na leh exercise han tihna tan a expenditure hi kan nei lo ang tluk a ni a. Practice ammunition te pawh hi kan nei tlem em em a, kan force te a tha tur an nih chuan kan trained that a ngai a. An training naah pawisa tam tak leh tha tam tak kan hman a ngai a ni. An sawifo kan hria a training naa thlan a sat tam leh thisen kan safe tam a ni tih ang deuh khan. Chutiingin kan police te hi an tha em em a, Mizo te hi sipai tha kan ni a, hetiang lampangah hian hmalakna tur hian pawisa hi la tih belh leh thei ila chu a tha khawpin ka ring.

Tin, kan intelligent service te pawh hi boost-up a ngai khawp mai a, entirnan hel in a changin an duh leh kan in te an rawn blast a, a changin office te an blast a khatiang ang vel atanga in hum himna atan khan intelligence a pawimawh a. Hengah te pawh hian Secret Service ah hian pawisa a aia tam hi la pe thei ila. Tunlai khawvelah hel beih leh indo te pawh hi financial power pawhin nasa takin hmelma te an beih theih a. Hel hotute man tur chuan pawisa tam tak sen a ngai a, a tul a nih chuan pawisa power a man chu an awl deuh ang. Khatiang kha a nih avangin Police a abik taka an han tih pun te pawh hi a tha hle in ka hria. Excise Department hi chutiang bawkin kan hriat ang in, nakin lawkah resolution ah te pawh kan la debate dawn ni te pawhin a lang a. Hetah hian in prohibition emaw, control emaw kan tih hian kan force te nasa taka kan tih chak a ngai. Tin, man power pawh hi tam zawk kan in pek a ngai, chutiang a nih loh chuan control na lamah hma duh angin a lak theih loh a, chuangin hetiang lampangah pawh hian kan sawrkar hian Excise leh Police ah hian nasa zawkin financial backing hi pe se kan that pui zel ka ring.

Tin, kan Finance Minister speech atang khan kan hmu a, nasa takin development na tur infrastructure back up na turin pawisa loan a ni emaw , source hrang hrang dap in pawisa nasa takin a chhawp chhuak a, hengte hi a ropuiin ka hria a. Tin,

nasa takin hetah hian risk pawh lak a ngai ang, kan pawisa te hi a nihna tur hmun takah kan hman theihna turin kan enzui a ngaiin ka ring. Tin, chutih lohah chuan health lamah khan han sawi leh ka duh chu kan reimbursement dan hi tlem chuan in strict zawk a kal pui a tha in a rinawm a, tin, travel damlo zinna kan authorize dan te pawh a dik zawka bill-te a tha in a rinawm a. Tin, hospital-ah kan authorize pekah rinawm thei ila, tin, khami economy measure ah pawh hian a bik takin sawrkar hnathawk te hi kan tan deuh chu a ngai a ni. Kan authorize aia sang a thlawhtheihna a han thlawh te pawh a chakawm a, hei kan hriat ang in kan Minister te, kan Chief Minister-te ngei pawh hi economy class ah te an kal laiin, kan Officer thenkhatte chu report a kan hmuh dan chuan business class ah te an zin, engemaw loh theih loh thil emergency thil te a nih chuan chu pawh chu acceptable tho in ka ring a, amaherawhchu, a theih chuan advance booking tih a mahni entitle anga zin zirte kha a tha hle in ka ring a. Engpawhnise kan financial situation hi chu tunhma te ai kha chuan a thlamuanthlak in a comfortable hle tawh niin a lang a. Hemi kan sawrkar kan Finance Department in a enkawl dan hi a lawmawm a, hetiang zela kan kal theih chuan kan State pawh nasa takin kan in vawr chho ang, kan development pawh a sang chho zel dawn niin a lang a, hei hi ka han sawi theih chu a ni mai e. Ka lawm e.

**DEPUTY SPEAKER** : Hun i hmang dik khawp mai. Dr. Ngurdingliana leh Pu Lalrobiaka an phar a, Dr. Ngurdingliana i lo sawm hmasa ang.

**Dr. NGURDINGLIANA** : Pu Deputy Speaker, ka lawm e. Nimin lamah tam zawkin an sawi tawh a, a detail lutuk in ka sawi dawn lo a, nakin lama sawiho atan te pawh khek ila a tha ange. A hmasa berin kan Finance Minister leh Finance Department a kan official te, Full Budget min pharh pui theih bakah, a vawikhat nan Non-plan/plan fin khawmin, he Fourteenth finance recommendation tha tak si, mahse hmang chang hre lo tan chuan hman sual theih deuh mai niin ka hria a. Chutiang hria chuan rem hre takin ti hian Mizoram in kumin 2017- 2018 a kan sum hman tur kawng hrang hrangah an rawn chhawp chhuak thei hi an hmangchang hriatna ah leh an taihmakna, an thawhrimna ah he House ah lawm thu ka hrilh duh ve a ni.

Pawisa Break up dan hrang hrang nimin lamah te pawh kan sawi a. Tin, Finance Minister in a a thusawi naah hian a rawn ti chiang em em bawk a, vannei ka tih chu kan sawrkar hnathawkte hi Pu Dy. Speaker, hei budget pumpui vaibelchhe 8803.10 ah hian an hlawh hi vaibelchhe 187.65 za zelah 35.21% a ni. Tin, hemi piah lamah

medical reimbursement chungchangah sawrkar hanthawkte tan vaibelchhe 98.51 crore an dah te, heng zawng zawng kan chhut hian he sawrkar hian a hnuaia thawk sawrkar hnathawktute hi a duhsak fal hle a, chumi in a a ken tel chu an hnathawh naah pawh tun aia nasa leh zualin kan tang teh ang an ti dinhmunah an din ve hi a va tha awm em, heti tak maia in duhsak sawrkar hnuaia an awm thei te hi tih a lo lang mai a hmasa ber ah chuan.

Tin, a dawt leh ah chuan capital expenditure han en hian a ngaihthat thlak em em a, hmasawna ruhrel siamna tur pawisa tam tak a zat pawh kan hriat sa vek tawh kha dah an ni ta. Tin, kawngpui siamthat nan te, a thar siamthat nan te pawisa breakup te pawh kan hriat kha. Tin, hemi piah lamah market loan vaibelchhe 4 leh NABARD atanga vaibelchhe 150 kan han lak tur te pawh hi a lawmawm ka tih rualin , NABARD atanga ` 150 crore kan lak turah hian,engatinge Health department hi kan lo telh ve loh aw ka ti. Nichin lawkah zawhna chhanna kan ngai thla a, PHC hmun tam takah doctor awm lohna ah te, phuhru turin tunah kan Minister zahawm tak khan doctor 25 lak theihna House Leader in nimin lawkah min pek thu te a rawn sawi a, kha mi bakah khan indaih lohna tam tak nurse, doctor piah lamah technician te. tin, tunah PHC thawm that ngai tam tak a awm a, sub- centre sak that ngai tam tak Health worker quarters siamthat ngai tam tak a awm a, tlem chu han dah sak ve ila chu a va tha dawn e, a ram pum huap a ni hei hi, keimahni bial chang a ni lo khawthlang khawchhak chhim hei hi chu ka ui pui hle a, mahse NEDP atang talin an ni Health department hi phuhruk dan dap thei ila chu a lawmawm ngawt ang.

Tin, kan Finance Minister leh Finance department in a RBI ways & means ah mitdel chungah an han kal san thei te hi sumpai enkawl chungchangah an thiam in an fel hle ka ti a, chhiar pawh a nuam a ngaihthlak pawh a nuam a ni. Police chungchangah leiba rulhna tur pawisa khati zat mai ` 1,206 lakhs te, travelling expense motor bill, motor leina tur te leh uniform pawisa hetiang tam tak an dah te hi a lawmawm a, a chhan chu kan Police te hi ka ti thin a, hei kan House Leader leh kan hotute duhsakna zarah, India hmarchhakah ah hian Congress hrulaitu kan ni ve tawh thin a, meeting nikhua a kan han kal hian State dang Chief Minister te, Minister te anmahni guard, vengtu te hi ka lo chik thin a, hmelah pawh min tluk lo phawt, tin, uniform smartness ah pawh kan inthlau lutuk. Kan police te hi chu taksa lamah pawh hleitling tak, tin, uniform pawh uluk taka

inenkawl, an silai te hi a kah te hi a nat hmel bik a ni. chuti khawp chuan discipline kan nei tha a. Amaherawhchu sum an indaih lohna hi a na em em a. Tunah Home department in sum an han nei ve a. Infrastructure lamah neih ang angin sum an han seng a. Keini demand area te pawh hmun thumah bahrik tha tak tak te, quarter te min han sak that sak a, hemi bakah hian bak an la ngah a ni.

Nichina member zahawm tak Col Z.S.Zuala sawi ang khan tunai hian an hmanrua te pawh hi thawm that an ngai em em a. Hei pawh hi pawisa tuna kan pek bakah hian a hmanrua leina tur leh thil dang dang mamawh tam tak an la nei a. Heng te pawh NEDP atangin Home te, Health te, School Education te hengte hi ngaihtuah chhonzawm ni thei chuan a lawmawm ngawt ang. Tin, Police chungchangah hmeichhe batallion neih hi a hun ve tawhin ka hria a. Kumin republic day a Nagaland hmeichhe Police rawn lam te kha kan en a, Mizo nula chu an ni lo in ka hria kan tia, kan inhnial kan inhnial a, Nagaland Police batallion kha an lo nia. An hawiher te kha a dik a, an smart bawk a. Parade ah pawh khan pakhatna an ni. An chhuang ve ngang a ni ang, state hrang hrangah kumtin hian an tir a. Khatiang ang khan kan hmeichhia te employment generate nan anih piah lam bakah hnam timawitu, state timawitu an nih ve theih nan Hmeichhe Police batallion pawh hi tun hnuah chuan hawn dan te pawh an ngaihtuah tawh mai thei a. A la awm lo anih chuan kan hotuten hei hi rawn hre bawk se tha ka ti a ni.

Tin, kan revenue expenditure hi kan bih a, a tam khawp mai a. Han chhut han chhut chuan capital expenditure a tam ber tum anih rualin revenue expenditure hi a kiam chuanglo niin ka hria a. Amaherawhchu a lo thlawna luang liam ni lo, mipuiaah sum tam tak a awm avang erawh chuan min ti thlamuang a, chutiang bawkin centrally sponsored scheme hnuaiyah pawh luangliam mai tura kan tih kha mipui hnen thleng pha deuh hlir kha a lo ni ve leh a. Hei hian revenue expenditure chungchangah pawh min hmuh fiah tir a. Kan Minister leh kan finance official te in rem thiam hle a ni. A tawpa ka sawi duh chu Pu Deputy Speaker, Economic survey ah khan niminah kan dawng vek a. Khatah khan banking chungchangah nikum march, 2016 thleng khan Mizoram ah Bank 185 kan nei tawh a ni. Nikum march ni 31 thleng khan a vaia heng bank 185 deposit awm hi ` 6423.18 crore a ni. Mahse heti chung hian bank tam zawk hi chuan an CSR kan

tih, corporate social responsibility kan tih hi zu theh chhuak tha duh mang miah lova. State dangah te chuan an CSR hi mipui tan hian an ui lo reng reng a.

Heti khawpa pawisa tling khawm tawh si, kan bank hrang hrang Mizoram Rural Bank hi ka hriat chin ve a ni a. Anni hi chuan an theh chhuak tha khawpin ka hria a. A bik takin kan nationalise bank te pawh hian tunai hi chuan han theh chhuak tha ve teh se, han phalrai ve teh se, ka ti a ni. chu chu tu te atanga hmalak tur nge chu ka hre lo.

Mahse kan hotuten heng hi lo hria ula, tunah company entirnan, NECS kan tih, hei Pu Robert Romawia Royte kan tih, a hming pawh lam mai ila, ani hian hna a thawk a, company an nia. Khami an surplus khan mipui rawngbawl nan tiin hei football club changkang tak a din a. khatiang khan kan company te pawhin an theih chuan kan bank te pawh hian tun aia nasa zawk hian han uar ve sela chu society, hnam thui tak min pui dawn si a, kha kha kan hotuten an lo hriat atan kan duh a ni. Sawi tur chu ka la nei a, amaherawhchu hun ka la tam lo mai ang e, ka lawm e.

**Pu LALROBIAKA** : Pu Deputy Speaker, vawiinah kan budget te sawi ve thei tura hun min pek avangin i hnenah lawmthu kan sawi duh a. Kan Budget hi budget tha, Mizoram State kan neih tawh hnua a tha ber ti pawhin sawi ila, kan sawi sualin ka ring lova. Chutih rual chuan kan Minister te, kan Parliamentary Secretary te leh Finance lama kan hnathawktute an efficient zia te a lang chiangin ka hria a, an chungah pawh lawmthu kan sawi duh a. A hmasa berin kan sawi duh a point te te in kan chuk lawr deuh ang a, hei hmasawn tur chuan remna leh muanna kan neih a ngai a. Chumi nei tur chuan sorkar a pawimawh rualin dan kengkawhtute an pawimawh em em a ni.

A sorkar tha ringawt mah ila dan kengkawhtute an that leh si loh leh 'lum tak leh puar takin awm rawh' tia an sin tur te, an eitur te kan pek leh si loh chuan hmangaihna thu sawi ang deuhin Darbenthek ri ang mai mai hi kan ni dawn a ni tih hi a chiang reng a ni. A bik takin kan Home Minister te efficient zia te vawiin ni thleng maiin kan ram ralmuang taka an awm thei te pawh hi kan Chief Minister zahawm tak, Pu Lal Thanhawla remhriat zia te leh dan leh thupek kengkawhtu Home a kan hnathawktute leh kan Minister te kan sawilang lo thei lo a ni.

Hei vawiin niah hian kan sawi duh chu Home in a duhsakna kan han ti dawn nge ni a ropui hle in ka hria a, hei Aizawl ah hian a mawilo lam nilo sela tunhma hun kal ta kum 8 hma lamah te khan Mizoram Workshop association ho in a an sawi chu,



‘Home department motor chu kan siam duh tawh lo’, an ti tawp mai a ni. Vawiin niah chuan a thuam thatna tur heti zozai mai kan sawrkar in an ruahman sak te hi a lawmawm hle in ka hria a.

Tin, a thawktute tan pawh phurna nasa tak anih ka ring a. An motor enkawlna senso atan ` 427.70 lakhs han dah ang chi te, tin, an training na tur atan thil chi hrang hrang travelling expenses tih te tam tak mai kan han hmu hi a lawmawm ka ti a. Kan sawi leh ang a, kan hriat vek a ni thova. Kum 8 kalta khan khatih laia kan sawrkar hotu lu ber chuan ‘ka fund te pawh helho min lak chhuah sak zo tawh e’ tih te, tin, chumai piah lamah chuan Aizawl khaw chhungah ngei pawh kan mi leh sa te kan police te tranining na tha lo taka an awm chungin hel ten training na an nei hial a ni. Chungte chu vawiinah hian sawi lan ve hrim hrim kan duh a. Vawiinah chuan kan police te nasa taka thuam that an han ni tawh tur hi a lawmawm ka ti a ni.

Tin, hei an clothing chungchang te leh thil chi hrang hrang ruahmanna han awm te hi ropui ka ti a. Kum 8 kalta te kan compare leh chuan an mamawh reng reng loh kelpal tam tak vawiin thlenga case awm. Tin, chu mai piah lamah chuan training-na tur atana tul em em lem lo ek in kal thei tih angreng lei tak teuh teuh mai te kha tam tak kan hmu a, a tawpah thirchhe hralha kan hralh leh tak mai te. Chutiang te tam tak a awm a tin, mawza te lah kha an to laileng khawp a, market-ah ` 60 awm vel kha ` 1000 chuangin kan han lei kha a ni a sorkarin, chutiang te chu a ni a.

Vawiinah hian kan sorkar langtlang tak leh kan sorkar chak takin hetiang police thuamthat tur atana heti zozai mai ruahmanna an nei hi a ropui ka ti a, a vanneihthlak ka ti a. Police ho te pawh an that ziate ka hmaa thusawitu ina a sawi ang khan, vawiinah chuan thuam that mek an ni zel a ni, chutiang chu a ni a. Chuvang chuan kan hotute, tin a bik takin kan Finance Minister te, an thiam ziate, heta tang hian a lang chhuakin ka hria a.

Tin tunhma deuh khan thil lar tak pakhat chu financial management an thiam lo a ni e, he sorkar hian, han tih te pawh kha party thenkhat atang chuan a lar khawp mai. Amaherawhchu vawiinah hian kan leiba kal dan a trends han chhuichian te, tin, ways and means vawiiina RBI atanga kan lak loh dante leh kan lak dan te han hriat

hian financial management ah hian, vawiin tluka he Zoramini a hetiang a nei hi a la thleng ngailo a ni tih hi kan sawi duh ve a ni.

Tin, pakhat lehah chuan kan sawi leh duh chu bill chi hrang hrang TA bill tih te khatiang kha tam tak mi rawn pe belh ta a, home ah pawh. Tin, NABARD atanga kan pawisa lak turte chi hrang hrang vety ah heti zat hi nisela, soil-ah heti zat hi nisela, a zat sawi lang lo mai ila, ti a daihzai tak leh thiam tak maia an rawn sem diah diah te hi a lawmawm khawpin ka hria a. NABARD loan chungchangah hian han sawitel veleh hram kan duh chu vawiinah kan hotute, kan Finance Minister te leh kan soil changtute min duhsakna avangin nikum lamah khan kei a hminga ka bial veah ` 300 lakh chuang zet mai rubber chinna tur mi rawn pe a. Chungte pawh chu vawiin ah hian sang tak tak hmuh nuam takin a awm tawh a kawng te pawh tha takin. Chutiang te chu kan ni a, hmun hrang hrangah khatiang kha an la ti lehzel dawn, kan la ti lehzel dawn a ni tih hi kan hotute ka atangin kan hre bawk a, a lawmawm a ni tih kha kan sawi duh a ni.

Tin sawi sen a ni dawn lova Pu Chairman, vawiinah NEDP atanga ` 750 crore lai mai kan han hmu turte a ropui ka ti a. Vawiinah hian kei kut hnathawk mi han in ti ve khanglang ila ka ni a, chumi avang chuan kut hnathawh te a nuam a. Tin, kut hnathawktu tena an thawh chhuah an thar man man taka han hralh han hmuh te hi a nuam ka ti thin a ni.

Vawiinah hian nichina ka sawi ang khan a hminga kan bial ve angah te pawh sum chang thlai an tharchhuah te chu vawiinah chuan an hralh chhuak mek zel a ni. Heng zawng zawng hi NLUP atang leh NEDP atanga sorkarin min duhsakna avanga lo thleng a ni tih hi kan sawi duh ve a ni.

Tin, Central sponsored scheme tih te, NLCPR tihte kan hmuh dan turte ruahmanna felfai tak kan hotuten an han tichhuak thei piah lamah langtlang tak leh nasa taka a chhawr thei tur tena an han chhawr theih tura chhawp chhuah a lo awm hi a lawmawm hlein ka hria a ni. Tin, kawng chungchang thuah hian kan kawng siamna tur atan hian sum dah vawiinah hian a tamin a thahnem hle mai a, a lawmawm ka ti a. Kan vanduai nge ni kuminah hian nikum atang khan ruah a tla nasa hle mai a November ni 4 thleng ni ta in ka hria, nikum pawh khan chhumlo chatlo deuh thawin ruah a sur a ni. Vawiin ni thleng hian nizan thleng khan a sur a ni i ti ang, chuti khawp a ruahsur nasa

avang chuan kawng tam tak a chhia a, chumi chu hre rengin kan hotute kan Finance Minister ten kawng siamna tur tam tak Serchhip-Bualpui road kan han tih te, Champhai, Zokhawthar, Chawngte a tam khawp mai kan sawi seng lovang, khang zawng zawngah khan hma an rawn la chhova. Sum tam tak tha taka thawh theihna turin an han dah thiam, an han dah thei te hi a lawmawm ka ti em em a ni tih kha kan sawi duh a. Sawi tur a tam khawp mai.

Tin, buhfai chungchangah te vawiinah harsatna kan tawk lova, gas chungchangah te, vawiinah hian vannei ka intihna em em chu Opposition ka ni lo hi vannei ka in ti khawp mai. Pu Chairman sawi tur a tlem dawn em mai, opposition han ni ila sawi tur hi a vang dawn hle maiin ka hria a, chuvang chuan vawiinah hian sawi tur a tam khawp a. Chutih rual chuan kan hriatreng tur leh mipuiten an rilru a awm atana kan duh chu, he budget kan sawi lai hian.

**CHAIRMAN** : I hun i hmang zo chiah.

**Pu LALROBIAKA** : Tawite in. Kan sawi mek lai hian kan hriatreng tur chu, eng hunah hian nge remna leh muanna te a awm thin a, tu hunah te hian nge hmasawnnate a awm thin? tih hi kan hriatrenga. Tin, tu hunah hian nge hel te an huangtau thin a, tu hunah hian nge hmasawnnate awm lova sum tam tak baffacos te anga an luanral thin? tih te pawh hi kan hriat a ngai a ni tih hi kan sawi duh a ni. He budget tha tak a hi ka rawn support a ni tih ka sawi a ni e. Ka lawm e.

**CHAIRMAN** : Pu Rinthanga.

**Pu K. LALRINTHANGA** : Pu Chairman, vawiin a Finance Minister in kan sum hman tur a rawn pharh chungchangah hian sawi tur a awm teuhin ka hria a, chuvang chuan hun kan neih ang angte rawn hman ka duh ve a. A hmasa berah chuan paragraph 23-ah khan NEDP sum hmanna tur langsar ber tiin rawn tarlan a ni a. NEDP hi tun sorkar hmanral tak chiaha kan sum ruahmanah pawh hian a tangkai hlein ka hria a, hmun tam takah, kan Agriculture Minister phei chuan thingtlanga link road kan neih te thawm that ngai, a khaw mipuiten a thawm thatna tur sum leh pai kan neih si loh lain tangkai taka hman kan duh bawk si a te siam that nan bolder phahna turte min han siam sak a. Chutichuan, tun 2017-18 kalchho mekah pawh hian ruahman tum chho zel niin ka hria a, lawmawm ka ti. ` 750 crores zet mai min han dah sak a. Thingtlangah eizawnnate kan

han siam a, kan thingtlang hnathawktute leh khawpui ami te pawh a ni tho ang chu, an hnathawhna kawnga tanpuitu tur sum leh pai hi an mamawh a. Entirnan, an thlai thar chhuahte phurh luhna, a hralhna tur atana phurh luhna te tin, chubakah chuan, a infrastructure, godown kan tih te leh wholesale market kan tih te kha an mamawh a. Chung buatsaihna tur atan chuan sum tam tak, Mizoram pumah hman theih ni dawnin ka hria a, lawmawm ka ti takzet a. Hetianga sum tam tak dah a ni hi thingtlang mipuite tan malsawmna duhawm tak a ni dawnin ka hria.

Para 24-naah khan, kawngpui awm sa siamthat nan vbc 239 leh kawng siam mek leh a thar siamna tur vbc 657.64 zet mai kan nei leh hi a lawmawm ka ti a. Ka ngaihtuah let a Champhai Vengthlang pheih a kawng a chirhdiak dah chawp a buh an phun te kha ka ngaihtuah let a, khalaiah khan kan lo a mang e, District Administrator-te pawh kha an a viau a ni awm mang e aw! ka ti a. Khatianga kal kawng ti chhetute kha man loh a an chhuah mai kha an vannei ngawtin ka hria. A party neitute pawh kha hnar hmuh vauh vauhna tur chi a ni in ka hria a. Amaherawhchu, a chhe zawnga activity neih ve hrim hrim hi an duh a ni a churang chuan, mizo mipuiin kan thinlungah kan ngaidam mai mai niin a lang a. Tunah chuan a chhe siamna tur te, a thar siamna tur te leh siam mek te siam belh leh na tur sum leh pai heti zo zai kan han nei mai hi a lawmawm ka ti takzet a.

Keini bialah pawh khuan, Vairengteah, ka'n sawi tel ve lawk ang a. Tlak lamah khuan second lane kan nei a, tlak lamah leh chhuah lamah kalkawng kan nei nual a. Second lane kan tih khu, Congress Party 1989 leh 1998 sorkar chhunga kalkawng laih a metal tawh khu a ni a. Chumi hnuah chuan siamthat leh a awm tawh lo reng reng a. A hnua kum 10 sorkar tawh te leh tuna kan sorkar tawh hnuah te pawh . Chung atan te pawh chuan tangkai takin a hman theih dawnin ka ring a, lawmthu ka'n sawi ve hrim hrim a ni.

Tin, UD&PA atangin khawpui kalkawngte pawh an siamtha thin a, Kawng pengthuamte pawh an siamtha thin a. Khu, Zotlang peng, Vaivakawn area chhunga kan peng chho ah khuan kawng chhak lamah in pathum a awm a, motor inpelh theih lohna hmun a ni a. In neitute kan dawr a, chutia kan dawrnaah chuan anniin min chhanna chu, "He kalkawng zauhna tur hi a hna keimahniin kan chan theih chuan kalkawng atan hian

kan ram hi kan pe phal” an ti a. Chungte pawh chu thawh theih a nih ka ring a, sum leh pai hetiang kan neih chuan, a lawmawm ka ti takzet a ni.

Tin, chumai bakah chuan, PWD-in kalkawng enkawl lai tam tak, National Highway-te a lo chang ta a, sum leh pai a thawhna tur nei mumal lovin an awm a, engemaw zat chu tunah hian central lamah project-te siamin, thawh turin tender te a lo awm chho ta a, chumi belh nan chuan kawng awm sa te leh kawng siam mek siamthatna tur leh a thar han siam belhna tur te kan han nei thei hi a lawmawm ka ti a. Kan bialah khuan North Thinglian kawng a awm a, a kalkawng chu lei tak deuh mai hi a ni a. Siamthat hi kan duh hle a. Rural Development atangin sum tlemte hmangin laih tawh a ni a. Mahse, pawisa a tlem avangin a kalkawng a te a, a chhuk chho a, sum leh pai tam dah theih a ni lova. Khu kawng khu siam turin PMGSY atangin an population in a phak bawkw si lova, PWD atangin han ti dawn ila sum leh pai hun kal tawhah an nei bawkw si lova. Helaiah hian sum leh pai vbc 657 mai bakah siamthat nan vbc 239 kan nei hi a lawmawm ka ti a. Hengte hi kan Finance Minister hian department-in an rawn dil hunah min lo hriatpui ta se a tha in ka hria a, ka'n sawi a ni.

Centrally Sponsored Scheme atan vbc 140 kan nei leh bawkw a. Chuti a nih chuan zaa sawm kha kan tum tur lo ni ta se, a let sawm chu vbc 1400 tihna a lo ni ta a. Hei hi hna tam tak thawh theihna tur ni in ka hria a, hetatang hian hmun hrang hrangah Centrally Sponsored Scheme kan tih te thawk thei turin ruahmanna a kal theiin ka ring a. Keini bialah te pawh indoor stadium sak te kan nei ve a. Kan Chief Minister zahawm tak hian project siam tir la kan lo theh lut ang e tiin hun kal tawhah chuan min hrih la. Kan siam a amaherawh chu, hun kal tawhah khan Planning Department lamah priority an lo ngah deuh avangin kan la hlawhtling hleithei lova. Heng atang te pawh hian kan lo hlawhtlin ve theih ka inring a, lawmawm ka ti hle a ni.

Police-te domestic traveling expense atan nuaih 473.01 dah a ni a. Hetah hian ka sawi duh chu, kan PS pakhat chu “Kan zinna a TA/DA te hi i bill ve ngai em?” ka ti a, “ Bill ngai lo, bill pawh a rawn hmin tak tak thei chuang lova, tun atanga kum 1 leh a chanve velah a lak theih dawn chauh ang a churang chuan ka bill ngai lo” a ti a ni. Chutiang khawp chuan hun kal tawhah khan police-te hian sum leh pai an nei mumal lova, an khawngaihthlak awm hle a ni. Tunah chuan, kan Home Minister-in a sawi ang khan, a tanpui nan kumin chhungin an bill te, a pek tur te an han siam sak bakah kuminah

chuan hetiang hian a hranpain budget-ah dah sak hial an lo ni hi lawmpui awm ka ti takzet a, chu chu ka han sawi leh a ni.

Market borrowing, 2017-2018 ah 40.87% ah a tlahniam hi a ropui ka ti. Niminah kan MLA zahawm tak Pu Rinmawia'n a figure in khawvel hmun hrang hranga kan sum leh pai awm dan kha a rawn sawi a, a lawmawm ka ti takzet. Mizoramah hetiang taka kan leiba zawi zawi a lo tlahniam tial tial hian a entir chu Finance Minister duhawm takin a thahnemngaihna azara lo tlahniam a niin ka hria a. Mi ti ti ka hriat thin chu tuna kan Finance Minister hi a thatna em em chu thil tih hleih theih loh a nih rual rual hian kan sum leh pai dinhmun hi siamthat duhna thinlung a nei a, nasa takin hna a thawk a, tih hi ka ngaithla fo a ni, lawmawm ka ti tak zet a ni. Tihian kan leiba pawh a tlahniam tial tial a (Pu T. SANGKUNGA AT THE CHAIR : I hun i hmang zo chiah.) chuti chuan kan ram tanah, kan state tanah hlawhtlinna duhawm tak a lo awm chho thei hi lawmawm ka ti a. Kan GSDP thanna pawh hi 13.05% ah a lo thang chho leh ta te hi lawmawm ka ti a. Hei chu han tarlan ve leh hrim hrim hi tha in ka hria a, ka hun pawh zo tawh mah sela.

Tin, food security ah central sawrkarin min ruahman sak bak, kan mipui zawng zawngte, chungkua zawng zawngte buhfai pek theih turin Finance Minister-ina ruahmanna a rawn siam leh ta hi ropui ka ti a. Chuvang chuan, lawmthu hi sawi loh theih loh ni in ka hria a, chung tete te chu ka han tarlang ve a ni e. Ka lawm e.

**CHAIRMAN** : Pu Zothangliana.

**Pu H. ZOTHANGLIANA:** Pu Chairman, ka lawm e. Kan budget hi a tha a ni tih a chianna chu tukin zing newspaper-ah te khan kan hmu nualin ka ring a. Political party President lar tak pakhat chuan vote zawnna budget a ni e, ti zawngin a rawn sawi a. Tha chu a ti ve tho si a, han fak viau kha remchang in a hre lo deuh bawk si a, chuvangin, tute emaw tihdan deuhin populist budget a ni e, ti zawng khan a rawn sawi a. Chuti chung chung chuan, a thatzia kha chu a rawn sawi lang nual tho mai a, a ti lawmawm viau in ka hria.

A awmzia chu, he budget-ah hian mipui lawmna tur a tam tihna a ni ber mai. Entirnan, NLUP-ah khan kum khatah vbc.100 – 300 vel te kum tinin dah thin a ni a. Khatih hunlai vela Chalfilh bial MLA bye-election neih zawhah khan, kan Ex-CM pakhat chuanin, “Kha bye-election ah khan Congress kan hneh lo a ni lo, NLUP kan

hneh lo a ni, NLUP puakrang in min tlr a, kan tlu phawk phawk mai a, keini in thingfakin kan hawlh ve naw naw a, a tih ngaihna a awm ngang lo a ni.” a ti thlawt a ni. Chumi awmzia chu, NLUP-te hi mi thenkhat te'n engtin tin emaw sawihdawm viau tum thin mah sela, Zoram mipui nawlpui tan hian a tha thlawt a ni tihna a ni. Chutiang chuan kan sawrkar hian mipui hrut kim policy a kalpui zel hi a tha a ni.

Ram leh hnam siamthatna atan, dinchhuahna atan a tul a ni tih hria in, kum 2016-2017 chho atangin NLUP in a hrinchhuah NEDP(New Economic Development Policy) a han kal chhohpui mek a. 2016-2017 chhung hian NEDP-ah cheng vbc.250 sawrkarin a dah a, hemi hmang hian tun apangin, a bik takin agricultural link road kan tih, kut hnathawktuten kan mamawh pui ber pakhat te hi hma tan a ni a, an thawk tan mup mup mai a. Zoram kut hnathawktute lawm, he sawrkar, Pu Lal Thanhawla sawrkar hian a siam leh mek a ni.

Chu chu kan ramin a mamawh leh a duh a ni a. Mipui hrut kim thei ber pawh a ni bawk a ni tih hriain, kan hotute, kan Finance Minister zahawmtakte, kan Parliamentary Secretary leh kan officer mithiam tak takte Pu Lal Thanhawla, kan hotupa kaihhruaina in NEDP-ah hian kum 2017-2018 ah pheih chuan hna tha tam leh zual, chak leh zual, hlawk leh zual zawka thawh a nih theihna turin tiin cheng vaibelchhia hlir 750 ngawt mai a han dah ta a ni a. NLUP-ah khan kum khatah vbc.100-200 velte dah thin a ni a, khati chung khan Zoram dung leh vanga kut hnathawktute chhungkaw hrang hrang, chhungkaw 1,30,000 vel zet mai chhawmdawl, tanpui an ni a. Lei rem an rah theihna turin rahbi tuk sak an ni a. Chuti anih chuan, NEDP a cheng vbc.750 pheih chuan hna hi a va han thawk nasa leh zual dawn em kan ti a ni.

Chuvang chu a ni ang, kan hotupa pakhat chuan, he House-ah pawh thu ve tawh thin a nih avangin a ni kha han sawi leh thin ila pawl lovin ka ring a, chu chuan, .....(interruption)..... thusawi tha kha a ni a, thusawi mawi lo a ni lova, a chanchin mawi lo lam pawh a ni lova, chuvangin, chanchin sawi nuam a ni a. A ni pawhin, he budget hi chuan mipui vote a huikhawm leh dawn mange, min tihsak nghe nghe a ni. Kum 2018 MLA (CHAIRMAN : Chair kan han inthlak lawk ange) (DEPUTY SPEAKER : Aw le, chhonzawm rawh le.)

Pu Deputy Speaker, ka lawm e. Hengte hian a tih lan chian em em chu, kum 2018 MLA inthlanpui lo awm leh turah khian, Mizoramah eng party mah term hnih

bak a sawrkar zawn ngai lo, tih ringawt mai bak sawi tur hre lo party te hian vote an khawn teh vak lovanga, mipui lawmna siam, mipui hrut kim zawnga policy kalpui mek, NLUP tha taka lo kalpui tawh a, a hrinchhuah NEDP tha lehzual a kalpui mek, Congress party zawk hian mipui vote a huikhawm leh anga, rorelna hi Zoram mipui leh hnam te tan tha taka kalpui turin, a term thumna atan, a zawnin a chang chho leh dawn a ni tihte hi a ti chiang em em in kan hria a ni.

Min lo chhah buai deuh chuanin, Pu Dy. Speaker, hun kha min lo adjust sak zel turah ka ngai a. Tin, thil lawmawm deuh mai pakhat chu, hei kan budget hi, kan hriat angin estimate a ni a, kan sum hmuh tura beisei leh ruahman te a ni a. Heng estimate zingah hian a bik deuhin CSS kan tih, Centrally Sponsored Scheme-te, NLCPR-te, EAP-te leh a dang engemaw zat hi chu beisei ah rau rau pawh, keimahni lam inbuatsaihna a zirin leh kan thawh that dan a zira, hmuh a hmuh loh theih a nih piah lamah, kan beisei zat tarlan sa aia tam daih pawh hi, kan thawh thata kan thiam phawt chuan hnuh loh theih a ni tih kan hre theuh mai a. Chuvangin, kan hotute hian remhre takin heng sum kan pawh loh belh theihthe hi, tha taka tam lehzual kan pawh loh theihna turin tiin ruahmanna tha tak mai an lo siam a. State matching share atan cheng vbc.140 lai mai an lo dahte pawh hi a thlamuanthlak hle in ka hria a ni.

Kawngpui a chhia, lei a chhia tih hi sawi rik tam fo a ni a. Kan hotute hian an hre lo a ni bik lova, an hria a, keini tak ngial pawh hian kan hria a, a chhe lai hi a awm a ni tih hi kan pawm a ni. Chutihrualin a chhe vek lo tih kan hria, kan thenawm State te leh State changkang leh upa zawk hmasawn zawk tak tak tawh te, kawngpui tam tak te nena khaikhin pawhin, chuti fahrana dinhmun chhia a awm chu kan ni bik lemlo a ni tih te pawh helaia chhia in ti em em a sawi thin thenkhatte pawh hian an hrechiang tho in ka hria a, an sawi ve awm reng a nih avanga sawi ve thin an ni ah te pawh kan ngai mai. Chutihrua chuan thu lawmawm tak mai chu kan sum enkawltuten hmangchang hre takin, fimkhur takin, uluk takin ngaithuahna an senga, kum hnih kalta chhung kha inren chemna hunah hmangin years of consolidation an ti a, chutiang chuan, kawngpui te, lei te chhia in thawm that a ngai tih hrereng bawk mah ila, loh theih loh te baka chu la khek hram hramin a hlawm deuh zawk a awmze nei tham deuh zawk siam that anih hi a hlawk zawk ang tih hria in, kuminah hian nasa takin chung atan te chuan sum thiam taka an lo manage thin rah lo langin thahnem tham tak mai an lo dah thei ta a , kawngpui



awmsa chei that nan, a maintain nan cheng vaibelchhe zahnih leh sawmthumpakua leh nuai sawmnga lai an dah a, chu chu nikum aiin za zelah zahnih leh sawmnga leh pakua laiin a sang, a pung a ni tih kan hria a ni. Hei bakah hian kawng laih tharna atana hman mek leh hman thar leh tur atan te cheng vaibelchhe zaruk leh sawmnga pasarih leh nuaih sawmruk leh pali dah a ni a, chu pawh chu nikum ai chuan za zelah sawmsarih laiin a lo pung bawk a ni a, heng te hian mipui min tthlamuan a, lawmawm kan ti a ni.

Kum 2008 kum tawp a MNF sawrkar mipui nin em em in he rorelna in a chhuahsan khan Zoram mipuite hi kan GSDP kan Gross State Domestic Product atanga chhutin ` 100 zel kan thawh chauh laiin ` 103 emaw zet leiba khan min kalsan a, chutichung chuan Congress sawrkar Pu Lalthanhawla Congress sawrkar, Zoram mipuiten duh taka an thlanin ro a han rel ve a, kum khat lek chhungin GSDP atanga chhutin kan leiba chu ` 100 zelah ` 90 ah alo ti tla hniam dawrh mai a, financial management thiamloh vang chu a ni hauh lo tih a chiang mai. Vawiinah pheichuan kum 2017 – 2018 budget ah pheichuan kan GSDP atang hian ` 100 zelah ` 40.87 ah chauh a tlahniam turin chhut a lo ni ta te hi a chhuanawm thlawt a ni. Chuan kan sawrkar laipui hian kum 2020 thleng khian kan Fiscal Deficit te pawh hi ` 100 zelah GSDP atanga chhutin 3 % a nih min phalsak a. Tin, GSDP atang a kan leiba hi ` 100 zelah 80 % a nih min phalsak bawk a chutihruah chuan GSDP 40.87 % ah kan lo tlahniam dawn a, kan fiscal deficit pheichu za zelah 0.79 % ah chauh a tlahniam turte hi kan hotuten financial management hi a sawiin sawi tlawr thiam ve viauin dak zat zat lamah chak viau lem lo mahsela, a takah hi chuan an lo thiam thlawt a ni tih hi a lang a ni. Pu Deputy Speaker, a thlamuanawm a ni, chuvangin Zoram mipuite hi Food Security Act hmanga kan Hon'ble Food Minister in a min enkawl danah te hian lawmthu sawi nachang an hre dawn a ni, tih te pawh hi a chiangin ka hria a, economic measure lamah pawh hian kan Food & Civil Supply Minister hi a ti tha a, a chhuanawm thlawt a ni. Nikum ai khan kumin ah ringawt pawh hian cheng vaibelchhe sawmnga leh pariat vel zet a ni ta in ka hria sum a lo tla hniama, a save a, (Deputy Speaker : I hun i hmang zo tawh a nia aw) tiang te pawh hi a remhriata local purchase hman atang tawha tih theih reng mahse hotu hmasa ten tih nachang an

hriat loh a kha a taka Zoram mipui tana hman tangkai avanga, Zoram mipui in hlawkna kan chan a ni a, heng zawng zawng te hi kan budget ah hian reflect vek a nih avang hian kan budget hi budget tha tak, mipui lawmna siam budget a ni a, mipui vote khawn budget a ni tih pawh hi a chiangin ka hria a, ka lawm em a, lawmthu kan sawi ve a ni e, Pu Deputy Speaker, ka lawm e.

**DEPUTY SPEAKER** : Le tunah tunge sawi ve leh ang le? Tuna ding chu in vannei deuh maithei ania, khi dar khat thleng hun a awm a. Aw, Pu Lalruatkima.

**Pu LALRUATKIMA** : Pu Deputy Speaker, ka lawm e. Tun tum kan budget session chu a hlimawmin ka hria a, helaiah hianin thutna pakhat a awl a chumi chu musical chair ang deuh hian thut kan in chuh deuh niin ka hria a, nidanga participate ngai vak lo te khan thahnemngai em em in kan participate a, thutna awla thut hi kan chak deuh a ni ang. Parliamentary Secretary thenkhatte a bik takin pakhat phei hi chu a active zual emaw tih mai tur a ni a, kum sawm kal ta a thilte kha bawngnhnute in in sawi mang silo a, kan zu in in sawi a tih ang deuh kha a ni a, khatiang ang kha kan ni a, thildang vak a lo ni awm lo e. Chuvangchuan helaiah hian in seat awl luah khah tir vat hi kan House Leader a tul dawn a ni, kan performance te a lo thlir reng dawn a ni tih te pawh ka ngaihtuahnaah a awm a, nia a lawmawm khawp mai a, Pu Deputy Speaker, vawiinah kan Finance Minister zahawmtakin a rawn put luh Motion of thanks sawina hun tha tak mai kan han nei hi a lawmawm ka ti takzet a, kan hriat tlan angin hun rei tak atangin full budget kan pharh thei tawh lo a, vote on account ten kan kal thin a, central-ah sorkar-te a lo inthlak a, kalphung thar te kan lo nei ta a, kum hnih chu full budget kan pharh thei ta hi a lawmawm a, 14<sup>th</sup> Finance Commission-in kan sum hmuhna tur hrang hrang a rawn ruahmanah hianin, nia kan sum thawh chhuahte, state-te leh state pachhiate kan la nih avangin a la bei tham a. Central Sawrkarah kan innghat lo thei lova. Amaherawhchu heng kan Budget hun kaltaah te khanin NLUP te, Pu Deputy Speaker, i ding lama mite khan kan han chhuang viau mai a. Vaibelchhe sang chuang fe kan sen chung pawh hian kan GSDP, Economic Survey-ah hian Agriculture and allied Sector chuan 18.75 % chauh kha a rawn contribute a ni. Tu mawh nge kan tih chuanin sorkar a nih rualin keini pawn mawh kan phur tlang vekin ka hria a. Service Sector-in 55.64 % daih a rawn la a. Helaiah hian GSDP a thang nasa a ni, hma kan sawn a ni kan han tih rual hian keimahni agriculture lamah te pawh tan kan lak tlana, kan inenfiah tlan kha a ngaiin ka hria a.

Tichuan kan Budget hrim hrimah hian Sawrkar hnathawk leh pension MR atan cheng vaibelchhe 4132.82 ruahmanah hian sawrkar hnathawk hlawhah cheng vaibelchhe 3187.65 dah a ni a. Chutah chuan MR Bill hi cheng vaibelchhe 78 leh nuai 10-a kha nikum lama kan sen tawh kha a ni a. Session zawhna leh chhanna atang khanin. Chulaiah chuan tam takin kan sawisel niin ka hria a. A dikna chin pawh a awm ang a, dik lo takin kan sawrkar hnathawkte hian MR hi an bill ka ring lova. Mi a hriselna kawngah a tlakhniam avangin inenkawl a ngaih avang a rawn bill an ni a. Tuman MR bill hi an chak hauh pawhin ka ring lo a ni. A tam kan tih lai hian vawiinah hian zu tha kan zuar e kan ti a. Kan hriselna leh kan nunnain a lo tuar ta a. Chumi enkawl nan chuan MR bill a lo sang ta deuh a nih pawhin tu dang nge mawhphurhna kan pek chuang ang le tihte hi ka ngaihtuahnaah chuan a awm a ni.

Nimin lamah te khan Health Care Corpus Fund-ah te khan Bank tha zawk, a pung tha zawkah te khan dah ta ila chu cheng vaibelchhe khat leh a chanve vel zet kha, a interest kha kan hmu dawn a ni. Apex Bank kan hman loh avang khan IDBI Bank-ah khan dah ta lo ila chu 8% IDBI pung ai khan Apex Bank-ah khan dah ta ila chu Cheng vaibelchhe khat leh nuai 50 vel kha kan hlep thei dawn a ni a. Khangte pawh kha eng nge ni, resource mobilisation chungchangah te pawh tan kan lak a tul khawpin ka hria a. Chutah chuan kan ngaihtlak tak angin heng ang zawng zawng hi 'chul rih kum' kan han tih, 'Year of consolidation' kan han puang a. Hmasawna ruhrel din kan tumna kawngah te theihtawp kan chhuah dawn, hma kan la dawn a ni kan han tih pawh kum 10 dawn kan sawrkar chhung hianin a tlai lu ta an la ti ang tihte pawh hi mipui atang hian a hlauhawm khawpin ka hria a. Chuvang chuan kan sawrkar hian Zoram khawvar hun hi min hruai thleng dawn lo mai emaw ni chu aw tihte ngaihtuahnaah chuan a awm a ni.

Kan hriat angin, thenkhat chuan tukin chanchinbu lamah mipuite vote zawna budget kan ti a, mipui hnen erawh kha chu a thleng tawi khawp mai a. Kan state own tax resource atang te, kan sum hmuh vena tur hrang hrang kan han en khan mipuiah chuan a pung tam love kan chhiah chi hrang hrangte kan han ti a. Amaherawhchu lei mante leh thil hrang hrang nikum lama kan sum hmuh atanga han chhut kha chuan a tam viau mai a. Khangah te pawh khan mipui tan chuan phurrit, nakinah a taka kan hman hunah chuan a la awm thei dawn nite pawn a lang a.

Chutah chuan MLPC Act-ah hian kum 2016-2017 chhungin 43 crore leh sing riat vel kha hmuh beisei a nih laiin kan khum daih tawh a. Kuminah chuan crore 51 leh a chanve vel kha hmuh beisei a ni a. Hei hi nakkum MLA Election kum a ni bawh a. He Budget nghawng lo chiah hian MLPC Act 2014 hi tihtawp tum niin ri ret ret te pawh a lo lang ta a, kan lo hre ta a. Chutiang te chu kan nih avangin kum thar lamah chuanin heta kan sum hmuh tur pawh hi nasa takin a lo tlahniam thei turah ngai ta ila.

Tin, Police te kan han thum tha a, a lawmawm khawp mai a. Nia kan ram dinhmunte kan hria a, venhimna lamah international border tam tak, thui tak nei kan nih avangin venhimna lamah tualchhung mai piah lamah kan mamawh a. Chungah te chuanin an TA te leh motor enkawlina chungchangah te pawh harsatna nasa tak kan tawh a. Kan MLA te zin tur ngeite pawn pilot an mamawh pawn Pilot vehicle man tur senso te tumsakna te pawh kha bo tawh se thain ka hria a. Chuvang chuan he kan sawrkar law and order-ah kan tha viau tia kan han sawi lai khan kan that lohna lai kha helam atang chuan a fiah ve viau mai a, TV lian tak ang khan khaw hal te, Biak In vawm chhiat te, Office suasam te, Pianphunga rualbanlo mitdel leh kebai te kawng zawh khum te, VIP in bula bomb puakte kha he kan sawrkar chhunga kan hnutchhiah tho a ni. Khang kha thleng se kan duh hauh lo tute mahin. Tute sawrkarah mah thleng se kan duh lo a ni. Chuvang chuan theihtawp chhuaha tihrehna kawngah khan tan kan lak a tul a. Chuvang chuanin theih ang angin heng ang zawng zawngah hian kan tan tlan a tul a ni.

He NEDP kan han sawia kha, Pu Deputy Speaker, cheng Vaibelchhe 750 khan hmasawna ruhrel (infrastructure) min thlen sela. Chumi a nih loh a NLUP anga kan in sa lem leh mai mai a nih kha chuan he ram hian hmasawna rahbi tuk zawng ni lova a mawng tawlh zawnga kan thang a nih chuanin tan, kan inenfiah hle a ngaiin ka hria a. Chak tak hian a ti thei mai lawm ni, a lo tiam tawh a ni bawh a. Sum enkawltu a ni bawh a tihte ka ngaihtuahnaah chuan a awm a. Chung ang zawng zawngah chuan kan ram tan kum khat chhunga kan hnathawh hian kum tam tak daih sela. He Zoram hian hmasawna rahbi chuang kai ila, chumi tur chuanin market economy hawi zawng khan kan kuthnathawktute leh kan ram hian tukverh kan hawn hi a tul tak zet zet in ka hria a. He sum leh pai tam tak kan Finance Minister-ina a rawn chhawp chhuah hi tangkai tak leh ram leh hnam tana chenpakawm hmasawna a thlen ngei theihna turin thahnemngai

taka a enkawl kawngah pawh tan kan lak tlan a tulin ka hria a. Chung chu ka rawn sawi ve duh a ni e.

Tin, thil lawmawm tak chu kawng chhe siam hnatlang bo tur kha lawmawmin ka hria. Kan Budget-ah a rawn tel a. Road block, kan hnatlang a, a Department PWD lamin refreshment an rawn tum a, a motor neituten hmanrua an tum a mipuiin tha kan thawh bawk a, kan hnatlang luih luih a. Tu vang nge? Eng vang nge? Engnge a chhan? tih chu mipuiin kan hria a ni. Chuvang chuan he House zahawm takah pawh Resolution kan pu lut a, muhil khaih tawh tum ang main (Deputy Speaker : I hun i hmang pel a, tihtawp tum rawh aw). Ka zo dawn chiah a, last sentence chiah a ni, Minute khat ka la nei a. Tan kan lak a tul a.

Chuvang chuan kan Aizawl khawpui-ah te hian kawng siam chungchangah te pawh Paver Block-te, Cell-filled Concrete Cement kan tih angte hi hmang ta ila chu chuanin eng nge ni, free maintenance-te pawh a siam ang a, bitumen ringawt hi chuanin a lo daih rei si lova. Hengte pawh hian tan kan lak a tul khawpin ka hria a.

Tin, kan Finance Minister zahawm takin September ni 30, 2013-a a lo tiam tawh ang khan CSS Hindi Teacher-te pawh kha kan sorkar chak tak hian a ti thei lawm ni? A lo tiam tawh bawk a, sum enkawltu a ni bawk a tih te ka ngaihtuahnaah chuan a awm a. Chung ang zawng zawng ah chuan kan ram tan kum khat chhung kan hnathawh hian kum tam tak daih sela. He Zoram hian hmasawna rahbi chuang kai ila, chumi tur chuan market economy hawi zawng khan kan kuthnathawktu te leh kan ram hian tukverh kan hawn hi a tul takzet in ka hria a. He sum leh pai tam tak hman tur kan Finance Minister-in a rawn chhawpchhuah hitangkai tak leh ram leh hnam tana chenpakawm hmasawna a thlen ngei theihna turin thahnemngai taka a enkawl kawngah pawh tan kan lak tlan a tulin ka hria a, chu chu ka rawn sawi ve duh a ni e, ka lawm e.

**DEPUTY SPEAKER** : Kan chawhma hun a zo a, member pasarihin kan sawi hman a. Kan chawl rih ang a, dar 2:00 PM-ah kan thu khawm leh dawn nia.

**2:00 P.M.**

**SPEAKER** : Budget sawihona kan chhonzawm ang a. Chawhma in mi pasarihin (7) in in sawi tawh a. Tunah tunge sawi hmasa ang a pariatna atan.

**Pu JOSEPH LALHIMPUA** : Pu Speaker, ka lawm e. Budget chungchanghian member zahawm tak tak ten lawmthu sawina tur leh a lawmawm zia, mipui budget a nih zia an rawn sawi tawh a. Thil thenkhat tawite in han tarlan ve ka duh a ni.

Pu Speaker, vawiina kan budget leh State leh UT in a pawisa kan ngah tak em em na chhan hi Congress kaihhruai UPA sorkar ruahman ang a 14<sup>th</sup> Finance Commission in recommendation a siam ang a devaluation state leh UT tan a share kan neih te, khatiang kha UPA sorkarin ruahmanna a lo siam atanga kan budget te pawh hi lo pung ta a ni a. Hei hi a lawmawm hle in ka hria a. A hmasa berin kan tarlang duh a ni.

Pu Speaker, hei kum kal mek te, nikum lamah te, kan Finance Minister leh amah tanpuitu Parliamentary Secretary in ruahmanna tha tak an siam a, kan Chief Minister kaihhruaina hnuaiyah. Central scheme a 10% matching share pek ngai thin ah hian a concerned department ten a hun taka an thehluh hi chuan ka hriat sual loh chuan matching share-ah harsatna kan nei lo in ka hria a. School Education Department-ah te, SCERT-ah te, Commerce & Industries-te, state leh central 90:10 a kan kalnaah hian state tum ve tur matching share hi min pe tha em em a ni.

Chutih mek laiin Pu Speaker, i veilama thu te leh pawn lamah chanchinbu leh thil dang social media-ah kan hmuh fo chu state in a tum ve tur a tum vek tawh hnu ah central in a tum tur 90% atanga pawisa tikhawtlai a awm avang hian SSA kan tih te, RMSA kan tih te hlawh te pawh hi a hun takah an la thei lo thin a.

Chutiang chuan state-in tun financial year kal mekah pawh hian mid-day meal scheme atang te, SSA leh RMSA-ah te pawh hian a tum ve tur 10% chu a tum vek a. Heng a tum theih chhan, state in pawisa kan lo neih tamna chhan hi UPA kaihhruai sorkarin Centre-State sharing pattern atan ruahmanna a lo siam vang kha a ni.

Tin, Pu Speaker, NEDP (New Economic Development Policy) chungchang hi sawi tur a tam hle in ka hria a. Tunah hian village infrastructure kan tih te, road infrastructure kan tih te; tin, chhuanchham leh dinhmun tleu tawh te khaikanna tur atana sorkarin NEDP atanga a ruahmanna zawng zawng te hi a lawmawm zia kan sawi seng lovin ka ring.

Hei bakah hian Pu Speaker, ka sawi duh chu, central-ah BJP kaihhruai sorkar a lo din khan, central scheme engemawzat hi a titawp a ni, saptawngin ‘de-link’

an ti a. Amaherawhchu scheme kal mek, in chhawng te pawh a zatve sak mek tawh a awm a. A installment lo la kal leh tur hmabakin hmachhawp kan nei tawh mai a.

Nimahsela central sorkarin a tihtawp miau avangin khatiang kal ngaihna hre lo hna laklawh a awm mek tam tak kan nei a ni. Chung atangte pawh chuan thil tam tak chu NEDP hian minrawn chhonzawm sak a, minrawn tihpuitlinsak a, a tawp min hruai thleng dawn ta a, a lawmawm tak zet a ni.

Heng te hi New Economic Development Policy, kan Chief Minister kaihhraina hnuaia kan Finance Minister ten ruahmanna an siam atanga min pek a ni a. Hei Commerce & Industry Dept. hnuaiah pawh, a bik takin han sawi ta ila tlemte.

Thenzawl ah sawn project pui tak mai, Handloom Facilitation hub kan ruahman a. Chumi lo kalna Aside scheme atangin ruahmanna siam a ni. Vaibelchhe khat chuang pawisa kan pe chhuak tawh a. Mahsela kha scheme (Aside) kha central sorkarin a tihtawp avangin chhonzawm theih lohin a awm ringawt mai a ni. Khatiang thil laklawh deuh deuh kha tunah chuan NEDP atangin chhonzawmna tur leh a tih hlawhtlinna tur te, a siam zawhna tur te minrawn ruahman sak a. Hetiang hian thil tam tak sawi tur a awm a. Chuvangin kan budget a kan hotuten New Economic Development Policy anrawn tih hi, ka tawng mawilo ni lo sela, mi te ber atanga state project lian ber thleng tihpuitlinna tur atana ruahman a ni a, a lawmawm hle in ka hria a, kan han tarlang duh a.

Tunah hian Education Minister hmalaknain district capital. Tunah model school te an siam a ni a. Chung model school te chu kan private school leh kohhran school tha zawkte nen a inel a, anni ai pawh a tha, state in a model tak tak a a neih tur a ruahman a ni. Chung school infrastructure atan te pawh chuan kan hotuten NEDP atangin ruahmanna min la siamsak leh zel a.

Tin, Higher Secondary School ah, Matric ah mi sing telin an pass a, Higher Secondary School luhna kan indaihlo thin khawp mai a, school thar din hautak zia kan hria a. Tuna existing school te pawh hi class room siam belh ila, tuna zirtirtu leh lecturer awm mek te pawh hian tun aia student eng emaw zat a tam pawh hi an enkawl thei ang tih kan hotuten an hria a. Chung atan te pawh chuan NEDP atangin pawisa min la ruahman sak lehzel a. Heng zawng zawng hi programme/policy ruahmanna tha a awm avang a ni a. Chuvangin kan sawi tak zawng zawng piah lamah khan NEDP chungchang

ringawtah pawh hian lawmthu sawi tur tam tak a awmin ka hria a. Chungte chu kan han tarlang duh a ni.

Tin, 2008 kum a kan Chief Minister Pu Lal Thanhawla kaihhruai sorkar a lo din khan kan state chuan kan GSDP atanga chhut a kan leiba chu za zelah za chuang kan lo nei mek a ni. Kan Finance Minister in budget a pharhnaah a sawilang tawh a. Tunah chuan 40% chang chang emaw chauh leiba kan nei ta a. Chutih mek laiin state tana rotling tur project lian pui pui, NABARD atang te, Bank dang atang te in kan la puk reng thei te pawh hi financial management kan hotuten an thiamzia a takin a langin ka hria a.

Hei hi mipui nawlpuiin kan chhut lem loh, kum 2008 sorkarna kan Chief Minister ho a kan siam a, za zelah za aia tam percent a leiba kan neih laia vawiiinah za zela sawmnga pawh tlinglo a an tlahniam te. Chuti chung a state hmasawna tam tak ruhrel la kal mek te hi a lawmawm takzet a.

Kan Education Minister hmalak nain education infrastructure siam nan Finance Department kaltlangin NABARD in loan tam tak min pe chhuak dawn ta a, tun budget ah pawh an tarlang te kha Education Department chu an lawm hle a ni. NABARD loan te pawh Education-in a lo hre ve ta te hi a lawmawm takzet a. Chungte chu ka han sawi duh a.

Tin, Pu Speaker, kalkawng tha lo chungchang hi an sawi fo mai a, dik pawh a dik a. Pathian leh kan hotute khawngaihna azarah ka zin ka zin ve a, ram chungah leh rampawn ah, state pawnah kan state ai hian hian kawng tha lo hi a tam hle a ni tih hi kan hriat a tha in ka hria a. Nikumah khan kan Chief Minister ruahmannain Manipur ah zirlai pawl inkhawmpui hmangin ka kal a. (Speaker : I hun i hmang zo.) Pu Speaker, ka zo tep e. Silchar atanga Manipur panna Highway kan kal a, kan motor then a ti chhia a, a then kan let tir a, chutiang chuan state thenkhat Highway-ah pawh kal hleih thei loh in a awm a ni. Kan rama kawng chhia kan tih tam tak hi PWD-in an enkawl ni lem lo tam tak hi kan sawi belh a. Tin, kan sik leh sa vang te, sum leh pai vang te pawhin PWD pawhin duhthusama an enkawl theih loh pawh a awm ang. Amaherawhchu, India hmar chhaka State tam zawk te nena khaikhin hi chuan kan kawngpui hi a tha hle a ni. Hmasawn zel chu kan la mamawh ang tih a rinawm a. Kumin kum tir lam khan Meghalaya-ah kan kal a, Bangladesh nen an in sumdawn tawna, Dawki Integrated



check Post (ICP) ah Commerce & Industry Minister zuin kan han kal a, Meghalaya atang khuan nitin truck 500 te 600 te Bangladesh-ah a lo kal a, chung a an phurh tam ber chu Meghalaya lung chang a ni. Chung an lung chang te chu Bangladesh in gas an nei tam bawk a, an lo ti dip a, an lo ti sawm a, chung atang chuan rora tur leh thil dang te a rawn thawn chhuak leh a Tripura te pawh khuan Bangladesh in Meghalaya atanga lung chang an lakluh rora tura an siam kha rel in an lo la lut leh a ni tih te an sawi a.

Ka ngaituahnaah chuan kan ram lung te a chang tawk lo a ni tih kan sawi thin a, state pawn atang hian lung chang tha zawk, phurh luh dan te a awm ang em aw? Heng lung chang tha zawk te hi phur lut ila, vawiin ai hian kan kawng te hi a tlo ang a tih te ka ngaituah a, chung te chu kawng chungchang ah kan han sawi a.

Tin, Pu Speaker, kawng chhiatna tam ber pakhat hi, MNF Sorkar laia BRTF enkawl kawng tam tak state PWD kuta kan lak let te avang leh State PWD in kan enkawl zawh mang loh chhan te pawh a ni tih hi thudik niin ka hria a, chu chu he House-ah hian ka sawi duh a ni. State PWD in kan enkawl zawh lo tam tak, Defence hnuai ah BRTF in a enkawl a awm a, chung te chu engvang nge, kawng tha kan duh zawk vang anih chu a rinawm chiah lova, state PWD kutah hun hmasa lamah kan lo seng lut a. Tichuan, state PWD hnuai a thawktute an khawl tha neih te pawhin a lo tlin lova, chuvangin harsatna tam tak kan tawk a, kawng chhia tam tak kan tih te pawh hi engvang nge tih te pawh hi kan chhut nawn tha in ka hria a, chungte chu ka han tarlang ve leh duh a ni. Vawiinah kan Finance Minister ruahmanna a village infrastructure siam thatna tur atana khaw tin maia sum leh pai a han dah te hi a tangkai em em a. Department tam tak in an tih theih tawh loh inkal pawhna step te, khaw chhunga culvert te, retaining wall leh khaw mal in a mamawh, department mawhphurtu awm chiah lo, hei hi tu tih tur ber nge tih te, khawi pawisa atanga tih tur nge tih pawh hriat loh te hi tunah chuan village rorelna ang tak tak khan a khaw mipuite, bialtu te leh tlawmngai pawl te pawh in kan vengah a pawimawh a ni tih te kan han sawi khawm thei a. Chumi tih na tur atana NEDP tanga pawisa min han pe te hi a lawmawm hle in ka hria a, ka han tarlang duh a.

Kan budget hi a tha hle a, kumin budget, tuna kan han sawi ho tak hrim hrim pawh hi hmasawanna tam tak, sawi tak ang khan, state tan pawh district leh khaw mal tan pawh hmasawanna tur pawisa tam tak awmna a ni a, ka sawi thiam ve dan berah chuan NEDP-ah hian, nitin eichawp zawng atangin state model infrastructure thleng kan

siam theihna tur pawh NEDP atanga ruahmanna kan han nei thei te hi a lawmawm ka ti tak zet a ni. Pu Speaker, ka lawm e.

**SPEAKER** : Pu K.S. Thanga'n a phar hmasa e.

**Pu K.S. THANGA** : Pu Speaker, ka lawm e. Hei vawiin ni ah general discussion hun thawl nuam tak mai kan nei a, lawmawm ka ti a. Sawi ve lo tur ka ni ang em aw tiin ka in ngaituah a, amaherawhchu midang te ang tho in sawi ve theihna right ka neiin ka hria a, chuang chuan ka'n ding ve duh hrim hrim a. Kan thian, kan member pui zahawm tak tak te khan an sawi tam viau tawh a, vawiin ah hian tam tak sawi ka tum lo a, amaherawhchu mipui han nghawng deuh leh thil pawimawh tam tak an sawi tawh na in, mipuiin a an hriat chian deuh atana ka duh te a awm ve a vangin ka han ding ve a ni a.

A hmasa berah chuan, regular budget vawiin ah kan han nei leh thei a, budget puitling, kan finance minister in a a rawn pharh thei hi a lawmawm ka ti hle a, tin India sorkar kalphung a in her danglam avangin tunah hian plan leh non-plan te awm tawh lo in budget kha a ni ta tawp mai a, chuang chuan sorkar hnathawk te tam tak harsatna awm thin, rilru a chi-aina awm thin, plan a hlawh la te hi non-plan a in convert duh ngawih ngawih te, khatiang harsatna te pawh kha Non-plan a hlawh lak a nghet bika in hriatna te kha tunah chuan engmah danglamna awm tawh dawn lova, chung ang te chu vawiinah hian he budget ah hian Mizoram a a vawikhatna atan plan leh non-plan te tih bo a rawn ni ta a, khang kha a bik takin sorkar hnathawk chung pawh a, rilru lam a thlamuanna nei lo a lo awm thin te tan pawh vawiin ni ah hian he budget hian zalenna dar a rawn vua in ka hria a, lawmawm ka ti hle a ni.

Hun kal tawhah khan, party pakhat, party te nau ve deuh te thuchhuah ka lo chhiar a, financial management ah he sorkar hi a hlawhchham a ni, ti ang deuh khan an rawn zia a, amaherawh chu vawiin a kan budget an han hmuh hunah chuan, khatiang ang kha an sawi leh ang em aw, ti ten ka ngaituah a. Chutihruah chuan, nimir lamah party hruaitu pakhat in press conference a nei ve leh a, hei hi chuan election oriented a ni a'n ti ve leh thung a, chumi awm zia chu, mipui te hamthatna leh mipuite duh zawngin budget hi an siam a, election an tin zawn hle a ni, ti khan a sawi chhiat lai berah pawh khan a thatna lam kha a han sawi a, Ram mipuite tana tha a ni tih kha a ti lang nghal hrim hrim

mai a, churang chuan party pahnih thu leh hla atang mai pawh khan, he budget that zia hi a hriat a ni.

Hei, hmasawna ruhrel lian pui pui mai dinna tur hi a in ruahman chho deuh ta khup khup mai a, kum thar atana capital expenditure tura vaibelchhia hliir 2414/- kan han neih tur te hi, heng kan ram angah hi chuan hman tham a ni dawn a, hei hian kan ram hi development ah hian nasa takin he sorkar hian ruahmanna lian pui puirawn siamin chak takin a tlanpui dawn a ni lang a a, nikum a 1309 crore ai khan he budget sanna hi 45.72% lai in nikum ai khan a rawn tam a ni a, chu chuan hmasawna ruhrel kan siam kal dawn a ni tih a ti lang hle in ka hria. Tin, sawi deuh pawr pawr mai ila, heng NABARD atanga kan loan lak te a lo tam ta viau mai a, a hma kha chuan year of consolidation kan sorkar leh kan finance minister te leh kan Chief Minister-ten a an puan a vang khan in renchem na lamah kan kal a, leiba rulh na lam te, sum renchemna te, kan kalpui avang khan pawisa te pawh kan fimkhur viau a, amaherawh chu, chu year of consolidation chuan vawiin ah hian nghawng a rawn neih ta a ni, tih hi tun Budget-ah hian a lo lang ta a. Tin, lawmawm em em chu Mizo lehkha chhiar thiam tawh phawt chuan an hriatthiam theihna turin mizo tawng ten khang kha rawn ziah chhuah a ni leh zel hi a lawmawm ka ti tak meuh meuh a ni. Kan police te hi kan ram vengtu te leh kan mamawhah chuan kan auh ber te an ni a. Tun Congress sorkar ni lo term hmasa ah khan police kha an la hnem em em mai a, battalion thum ngawt mai kha an han la a, a enkawlna lam kha a hautak hle a, mahse, chuti chung chung chuan anmahni enkawlna tur hian an uniform lamah pawh nuai zathum sawmli tih te, tin, vehicle atan te pawh nikum ami aiin nuai sawmsarih paruk ten a pung a, tin, arm and ammunition atan supplementary demand-ah te pawh nuai zahnih leh pathum te pawh an rawn dah a ni a.

Pu Speaker, hei hi ka'n sawi kai duh zawkna chu hmanah khan Rangoon-ah ka han kal a chutah chuan army officer retired tawh nen kan in kawm a, chuta kan in kawmna ah chuan an army tluk chhiat tawh zia, army anga an hospital facilities-ah te pawh damdawi min pe thei tawh lova, tin, an sipaite tan pawh silai an lei thei tawh lova, uniform te pawh an lei thei lo a ti a. Chutiang anih chuan an sorkar kha a lo corrupt lutuk khan lo kal rei thei kha an lo ni lo reng reng a, democracy rama an siam loh kha chuan mutiny kha theng thei dinhmunah khan an lo ding tawh hrim hrim kha a lo ni. Chutiang ang avang chuan vawiah khian democracy kawng te pawh khi an rawn zawh niin ka hria

a. Vawiiinniah hian kan sipai te, kan ram venghimtute tana hamthatna a lo kal hi a lawmawm hle in ka hria a. Hei hi ka'n sawi kai ve duh hrim hrim a ni.

Revenue expenditure lam hi lian hle in a lang a, amaherawhchu, heng revenue expenditure-in a ken tel hi kan hriat tlan a tan a tha a, heng kan MLA Fund mipuite tana a vaia luang ralah hian nuai sangli te a kal a, tin, hospital leh damdawiin chaw ah pawh nuai zariat sawmsarih pariat te a kal a, tin, kan nitin buhfai ei ah te nuai sanghnih te a kal a, tin, khawtlang roreltu Village Council hlawh ah te hian nuai sangkhat zathum sawmnga paruk te a kal a, tin, a tel lova kan awm theih loh kan nitin tui hman manah te hian nuai singkhat zathum sawmli pathum te a kal a. Chhiat tawk eng emaw atan pawh nuai sangkhat zasarih te ruahman a la ni fova.

Tin, electric eng tel lova nun te hi kan thei tawh lova chung te atan chuan nuai singhnih leh sangkhat te a la awm a. Sorkar sum puk interest rulhnaah hian nuai singli sanghnih zanga sawmli paruk teh meuh mai an han dah hian financial management thiam lo tan chuan heti zat zat leiba hmanlai atanga bat tawh heti zat sum hi an dah thei hauh lovang tih ka ring a. A ropui ka ti a, heng zawng zawng atan hian nuai singsingli leh sangnga leh zasarih sawmsarih panga leh point 46 ngawt mai a kal a, hei hi revenue expenditure chhung a khung ni si a hei hi mipuiin an mamawh a tana hman vek tur a ni. (Dy. Speaker : I hun i hmang rei hret). Pu Dy. Speaker, ka zo tep e, a pawimawh hlawn em avangin.

Tin, kan estimated fiscal indicator hi han en leh lawk ila. Revenue surplus hi vaibelchhia sangkhat leh zasarih sawmriat pasarih leh point sawm a ni a. Hei hi a ropui em em mai a, thenkhatten hei hi kan state thawh chhuah pawh a ni lova an ti a, amaherawhchu, hei hi chu kan hriat tlan sawi buai tumna mai mai niin ka hria a. India rama kan awm hian state kan nih angin India ram atang khuan kan ta a awm ve a, chu chu share of taxes te, excise te leh khatiang ang chi hrang hrang kha India ram atanga min ban a, min in independent tir te a nih ngawt loh chuan India rama kan awm man hrim hrim hi dan angin kan share hi a awm ve a ni. Chuta tang chuan pawisa hi a lo kal lo thei lo, chuvang chuan helaia kan state thawh chhuah ringawt a kha chhut theih a ni lo. India kan nih mana kan ta kan chanvo a ni. Chuvangin helaia kan surplus-a hi heta tanga chhuak a ni tih hi a diklo ti kan lo awm palh a nih chuan India kan nih chhung chuan kan ta a ni tih hi vawiiinniah hian kan hriat tlan atan ka'n sawi ve duh hrim hrim a.

Tin, Fiscal deficit-a 0.79 % ngawt maia vawiin ni a kan dinhmun kan siam hi a ropui hle a. Pu Speaker, vawiinni a ka'n sawi leh duh em em chu kawng tha vawiinni a kan nei chho leh tur hi a lawmawm ka ti a, kawngpui chei thatna vaibelchhe zahnih sawmthum leh pakua, kawngpui siam mek atan vaibelchhe zariat sawmkua pasarih leh pahnih, tun kum lo kal tur kum thar atan hian vaibelchhe zariat sawmkua pasarih leh point sawmli teh meuh mai kan Finance Minister hian a rawn dah a. Chu chu kan sorkar in kawng siamthat nan leh a thar siam nan leh a hlui chei that nan te an hmang dawn a ni.

Vawiinah hian heti chung a la lawm lo emaw kan awm a nih chuan, kha hmanni khan khulai kawng chei thatna tura sum kha a tam lutuk tih te kha kan han ngaithla deuhva. Ka ngaihtuah danah chuan naupang huaibak kawrthar min lei rawh ti a 'a lian awm hlei hlui ti a, a te kan lei ang a ti a, a te awm tit tet' ti ang deuh te pawh kha a ni thei awm mang e aw, te ka ti a. Chuvang pawh chuan heng thil ropui tak tak hi kan ramah a la thleng dawn a. Pu Speaker, kan hun a tawi a, kan sawi seng lo ni mai selang. Khang kan han sawi tawite atang te pawh khan kan ram hian hmasawna rahbi a rawn chuang thar dawn a, ke a rawn pen dawn a, kan year of consolidation leh kan economics measure hian nasa takin budget lamah hmasawna rawn thlenin ke a rawn pen a ni tih nasa takin a ti lang a.

He sorkar-in financial management lama an tih that a hi vawiinniah hian he ram mipuite hian malsawmna an dawn a ni tih hria in an in buatsaih ve thei tawh dawn a chu chu lawmawm ka ti a ni. Ka lawm e.

**SPEAKER** : Pu T. Sangkunga i lo sawm ang.

**Pu T. SANGKUNGA** : Pu Speaker, ka lawm e. Nichina din ka tum rauh rauh laiin i Chair-ah khan Deputy Speaker-in min han thut tir khauh mai a kan session-ah ka chair hmasak ber atan ka rawn thu a. A hnuhnung ber pawlah ka sawi phah ta hlauh a, engpawhnise ka lawm hle mai, Pu Speaker.

Kumin budget hian danglamna namen lo a nei a. Kan hriat theuh angin Railway Budget, non-plan budget leh plan budget kha general budget-ah a luh khawm rup kum a ni a. Hetiang hi historical event tak tak a ni a. Han din loh nan te pawh a uihawmin ka hria a. Khang chanchinte pawh kha Parliament-ah pawh a rik dawn tawh mang loh avangin han sawi te pawh ka chak a. Kan hriat theuh angin British India-ah khan Railway Budget hi a lian em em mai a. (75-85%) India budget pum za ah

sawmsarih panga atanga sawmriat panga hi Railway atan hman tur a ni tawp mai a ni. Chuvangin British sorkar khan Expert Committee W.M. Mitchell, Railway economist chair-na hnuaiah Railway Expert Committe a din a. Chu Committee chuan Railway Budget chu a hrana din a lo rawt a. Ni 24<sup>th</sup> March, 1924 atang khan Railway budget hi a hranin pharh a lo ni ta a. Amaherawhchu, nikum ni 21 September-a Union Council of Minister thutlukna angin kum 92 lai Railway Budget-a hranpa liau liaua an pharh hnu ah General Budget-ah a lo merge ve ta a, a lunglenthlak khawpin ka hria a. Suresh Prabu kha Railway budget pharhtu hnukung ber a lo ni ta a ni.

Tin, plan hi tunhma chuan development expenditure an ti thin a. A chhan chu development liau liau atan plan a nih thin avangin. Tin, non-plan hi development expenditure an ti ve thung a. Mahse plan & Non-plan hman pawlh te a awm a. Head hranah Stationery leina tur ve ve te a lo awm a. Hei hi simplify an duh a, tuna NDA sorkar tih tan ngawt khu a ni bik lova. UPA sorkar khan Expert Committee ‘C. Rangajaran Committee,’ a lo din a, heng head pathum hi merge khawm vek tur a ni tih 2011 daih tawh khan a lo recommend tawh a. Mahse inthlan te a lo hnai chho a, NDA sorkar khuan rawn ngaihtuah tharin Murli Manohar Josi-a, Member of Parliament, Estimates Committee chairman-na hnuaiah rawn zir chiang turin a lo ti ta a. Tichuan kha Committee khan a recommendation angin hetiang budget-a kan neih plan leh non-plan leh Railway budget te chu September ni 21 atang khan tih hran a lo ni ta a. Murli Monohar Josi-a chairman na hnuaiah hei hi ruahman fel a ni a. Tunah chuan general budget chauh kan lo nei dawn ta a.

Tin, railway Budget pawh chutia a lo bo takah chuan han sawi thuak thuak ila. India budget hmasa ber hi ni 26.11.1947-ah R.K. Chetty, Union Finance Minister-in a pharh a. Tin, Moraji Desai kha Union budget pharh hnem ber a ni a, wawi 10 (sawm) a pharh a. Tin, Union Budget mahni birthday-a pharh awmchhun a ni a. Leap year kum February ni 29-ah piang mahse, leap year kum wawi hnih ngawt 1964 leh 1968-ah a birthday-ah he Union budget hi a lo pharh a. Tin, British tih dan zul zuiin election laklawh emaw, kum laklawha budget pharh a ngai a nih loh chuan last working day of February-ah tlai dar nga ah Union Budget hi pharh a ni thin a.

Amaherawhchu, hei hi British-in an ramah chhun laiin an pharh a, Indiaah chumi ni vek tlai dar nga ah an pharh ve thin a. Chu tradition chu rei tak zui a ni a. Amaherawhchu, kum 199-ah NDA Sorkar, Union Finance Minister Yashavant Sinha khan hei hi rawn tidanglamin chawhma dar 11-ah budget hi a lo pharh tan ta a. Chutiang chuan inthlak zeuh zeuh a awm a. Kuminah hian NDA sorkarah tho thil inthlak leh in non-plan leh plan te nei hrang lovin budget thar kan lo nei dawn ta a. Mizoram tan pawh a that em em na nia ka hriat chu Planning kaltlang hi thil namenlo a ni a. Sorkar hnaa kan awm chhung zawngin kan sanction move hi kan Planning mithiam ten an lo exam chhung hi rei kan ti thin a. Tunah chuan khatiang kha kaltlang ngai tawh lovin department pakhat chauhvin kan proposal te an lo exam tur hi a lawmawmin ka hria a. Chuvangin, tuna kan budget pharh ni lo, nakuma kan budget pharh tur pawh hi inthlan hma a kan hman hman ngei ka ring. Department pakhat chauh kaltlang a nih awlsamna nasa tak a rawn thlen ka ring.

Tin, kan budget hi nichina ka hma ami ten miten an sawi angin Zoram budget-ah chuan a la that ber tum niin ka hria a. U.T. kan nih lai khan budget an han siam dawn khan u te ho khan sum hi an ren a, kan Budget size a lian thei lo. India President-in a lo sign thin a nih avangin tihdanglam theih loh a ni a U.T. budget kha. Kan pute kha Assam hnuaia tih retheih an ni a, an inren em em mai a, sing 2/1-a han tih pun hi an ui lutuk a ni, a tam an ti hma em em a. Chuvangin, kan budget kha a tlem thei em em mai a, chu chu kan tuar a.

Tin, state kan lo ni leh a, thil a lo harsa leh zo tawh a. Amaherawhchu, hetia kan budget lo len na chhan pakhat hi chu 14<sup>th</sup> Finance Commission-ah kan House Leader te, kan Deputy Leader te, kan Finance Minister te, kan Official te hmalak thiam vang a ni. Nidanga a sang pawl ni ngai reng reng lo kha 13<sup>th</sup> atanga 14<sup>th</sup>-a pung nasa ber chu Arunachal a ni a, China ramri a nih vang, a dawt Goa, a dawt leh ah keini kan ni a. Tichuan kan pawisa hi a lo pung nasa ta em em mai a ni. Chu chu kan thatna pakhat a ni a.

Tin, kan Finance Minister hian Year of Consolidation a tih avangin sum a ren a. (Speaker, i hun a zo va) Pu Speaker tawite, (sawi tur an awm vak tawhlo bawk a, reilote....ka hma a mite pawh khan minute nga te kha an

lakbelhin ka hria). He kan budget hlutna hi kan hriatchian leh zual nan han sawi nawn ve reng reng ka duh a. Capital expenditure nikum aia a punna 22.86% hi rura ka ti. Kumina capital expenditure pun dan hi Mizoram budget zawng zawngah capital expenditure tam kum ber a ni a, than kum ber a ni bawk a. Capital expenditure chu hmasawna liau liau atan hman tur a ni. Kawngah te, health-ah te engkimah. Chutianga crore 2236.62 net expenditure capital hnuai kan nei hi thil awm ngailo tawp a ni.

Chuvangin, kan Finance Minister leh kan House Leader te an fakawm em em a ni. Nikumah 1649 crore kan nei a, kha pawh kha kan hmang tangkai em em a. NEDP-ah pawh crore 250 kha a awm phah a ni. Tun hma chuan ka bialah khian Khawbung tih loh ah khi chuan LAD step hi siam a awm ka hre ngai lo reng reng. Tunah chuan Zawngtetui thlengin khawtinah LAD Step siam a awm vek dawn a ni. Chuvangin, hetiangah khawtina LAD step awm hi mak ka ti a. Khaw lian deuhah chuan pahnih te, pathumte a awm dawn a. Chu chu DLAO ten khawtin an sanction vek tawh a ni.

Tin chuloah, feh kawng laih hi a khat em em, tunah chuan feh kawng hi hmun tinah a phut serh surh mai dawn a ni. Nikumah NEDP atan crore 250 kan nei kha ania. NLUP awt em em tang si te tan NLUP-ah crore 27 lai kha a awm bawk si a, kha kha a ropui ka ti a. Kuminah hian crore 750 a awm dawn ta a. Chu chu mipui hian an chhawr tak tak dawn a ni. Tin, MLA zawng zawng in kan ngaih pawimawh chu Health leh Education a ni. Education leh Health Care-ah kan fund pawh i hmang thei mai ang u kan ti a, Health Department-a doctor post kan create tam zia te hi kan theihngihl lek lek a. Nikumah doctor post 88 kan create thar a kuminah 26 kha an clear leh a.

Tin, Nurse pawh nikumah post 45 an fillup tawh a, 25 tunah an create leh a, a buai deuh hlek a. Health Worker-ah hian 180 an ti fel tep a ni. Khatiang khawpa hma kan sawn theihna kha kan pawisa pung vang kha a ni. Chuvangin kan pute hmalakna kal zelah mahse sum enkawl an thiam loh avangin lei an ba hnem em em a. Vote duh vangin farmer-te electric leh tui hman man an awl nasa lutuk a ti a ni. Nizana ka chhiarah phei chuan Prakash Singh Badhal-te chungkhat hnai Manpreet Singh Bhadal Finance Minister a nih khan an state sum leh pai dinmun chhia siam tha turin



Union Finance Minister Pranab Mukherjee kha an va hmu a, ani chuan tih dan tur a lo hrilh a. An Chief Minister Prakash Singh Bhadral a va sawipui leh a, mahse a lo pawm lo lutuk a, tihngaihna a hre lova, a bang tawp mai a, an party a chhuahsan nghal a ni.

Hetiang khawpa Punjab an tlakchhiat na chhan chu Financial management an thiam loh vang a ni tih hi mitiin tunah hian an hriat ka ring a, lawmawm ka ti a ni. Leader tha leh Finance Minister inren thiam leh sum management thiam kan neih avang hian party thenkhat pawh an lungngai a ni. Tukin newspaper-ah pawh kan hriat kha an vote tur kha. Mipuiin inthlan leh huna an hre leh sa tawh in an ring a. Chuvangin hetiang sorkar kan nei hi lawmawm ka ti em mai a, ding lo thei lo niin ka in hria a, Pu Speaker, i khawngaihna zarah kan ding leh hram a ni. Ka lawm e.

**Pu VANLALZAWMA :** Pu Speaker, ka lawm e. I khaih hruaina hnuaiyah hian zalen takin member te hian thu kan sawi thin a a lawmawm tak zet a ni.

Chutih mek laia ka rilru lo awm chu, tun tum session hi a va dang deuh ve aw kan thusawi dan atang hian, Minister pakhat post ruak hi ngaihtuahna hian kan lo hmu tel deuh reuh thin a. Engpawhnise a tha thove, ka rilrua awm leh pakhat chu vawiin ah 2017-2018 budget kan sawi a, kar hmasa lam khan Governor thusawi kan sawiho tawh bawk a. Chutih mek lai chuan a then hi chuan Parliamentary ethic an tih hi kan ngaihtuah vak lo amaw ni chu aw ka ti a. Kum sawm kalta a sorkar han nawk te hi nuam hi kan la ti lutuk deuh a ni, sawi fel tur tumah awm tawh loh laia. Hengte an sawi lan leh fo thin hi tihte chu ka ngaihtuahnaah chuan a awm deuha mahse member in sawi tul atih chuan keini va khap rual a ni lova. Chungte chu thuhmahruai ang reng deuhvin han sawi ka duh a.

Kum 2017-2018 kan Finance Minister in a rawn pharh hi kei pawh ka lawm khawp mai a. Lawmawm ka tih em em na chu budget lam thiam lo pawh hian tia han chhiar mai hian hre ve deuh ruak hian ka hria a a kal dan tur leh a tuma hi. Tun hmalama budget kha hriatthiam loh kha ka ngah thin a, tun tumah chuan mawlte in felfai takin a rawn pharh chhova a lawmawm hle in ka hria a ni.

Thahnemngaih avanga thil engemaw kan sawi duh a chu. Kan budget pumpui crore 8803.10 tang khan NEDP crore 750 zet mai kan han dah te kha hmannah nimin piah khan kan naute thenkhatin an van dah tam ve mawle an ti a. E, ngawi teh u Pathianin rem a tih chuan nakum kum lelah kan sorkar ang a SEDP atan nuai 1000 chu kan dah thei tawh ang pawisa lo pung nen. Kha kha ka ngaihtuah dan te chu a ni tho bawka, a lawmawm ka tihrualin.

Tin, hmalakna tur tam tak an han tihah khan ka lawmna em em chu infrastructure development kan uara kha a tha khawpin ka hria a, ram hmasawna atan a tul khawp mai a. A sorkar anga kan mawhphurhna a nih rualin infrastructure development lam kan uar chhoh kha a tul a. Kha Member tam takin anrawn sawi a, khami kawngpui han siamna tur kan tih ang chite pawh kha a tha hlein ka hria a. Kan kawngte hi duhthu a sam tawklo em em a, chei deuha tha mai thei tam tak a awm a. Chutih mek lai chuan ka rilrua lo awm mek erawh kha chu hei hi dah tam ringawt mah ila, a tak takin engtingge kan hman tih laia kha chu kan sorkar lam pawn uluk deuh hleka enzui hi a thain ka hria a. Chumi a tel loh chuan a pawisa dah tam ringawt kha a tha ngawt lova, hei tunah pawh kan kawngpui tam tak Central lam atanga Contractor te an thlang a, a enkawlnaah hian pawisa chu a tam, a pawisa lamah kan buai em em ni pawhin a lang lo. Mahse, a thawktu thlanah te a fuh lo nge ni, tiang hian kan kawngpui tam tak hi a tha lo tlat a ni. Chuvang chuan, kan Finance Minister leh mawhphurtu dang dangte hian he pawisa kan dah hi engtingge hman anih tih laia hi thlir zui erawh hi chu a pawimawh dawn hlein ka hria a.

Tin, an sawi tawh nachungin han sawi leh hram kan duh chu Health Care Scheme hi. Hei hi a bik takin India Citizen theuh kan ni a. A hminga sorkar zem zen leh zenlo inthlau lutuk lai tih zimna tur tha ber ni pakhatin ka hria a. Helaiah pawh hian ka sawi tawhin ka hria a. Sorkar hnathawk leh kamding keini tepawh kan ni a. Engemaw avanga dam mawh hritlan kan tawh pawn ana kan tuar a, kan pawisa a hek lova, hna kan thulh anih pawn leave kan la mai a. Chutiang anih mek lai chuan sorkar zem zen miahlo te dinhmun kan ngaihtuah chuan an damlo va, hna an thawk thei lova, an hna an chan nghal a.

Chutih lain damdawi man an chawi bawk a, a double lutuk bik a ni, hengho ta tura hi tuna kan tih ang hi a tha khawp nachung hian hei ai hian pawisa hi dah tam leh thei ila, kha chawhma lamah a chhanna te pawh kan han ngaithla a. Khing Durtlang Hospitalah te pawh khum tlemte kha khatiang bill theihna an lo nei chauh mai a lo ni te kha a lo ni a. Khami a full tawh si kha chuan midang lo va in admit te tan pawh khan a lo tih hleih theih lohva. Hetah hi chuan pawisa dah tam leh zual hi a va tha em. Indian Citizenship nei theuh kan ni tlang vek a, a thenin kan damloh pawha medical reimbursement kan draw a, leave kan la, hlawh kan lak reng laia na kan tuar tih chu thu dang, an damloh veleh an hna an chawl a, an hlawh an chan nghal a. Chutah damdawi man an la pe leh nghal bawk, hengte ngaihtuah chuan helamah hian pawisa tam deuh dah pawh hi a va tul em aw tih kha kan ngaihtlak tawh hnu mah ni se han sawibelh ve leh kan duh lai a awm a.

Tin, chutih rual chuan kan sawi kai vak loh pakhat education lam hi helamah hian a lang hranpa vak lovin ka hria a. Kan Parliamentary Secretary, Education lam changtu pawh khan a rawn sawi nual tawh a. Helamah hian ngaihtuahna kan hman tam leh zual hi a va tha em. NLUP te kan ti a, kan eizawna tur leh ei leh bar tur haina tur kan ngaihtuah a. Kan eizawna lam leh kan hriselna lam pang tur leh kan lehkha zirna lampang tur hi a tul hlein ka hria a. Dik tak chuan ka ti ve mai mai thin a. Thingtlangah va kal ila Primary School te hi chu han hmuh mai hian a hriat mai a ni, khawlai lun lai takah a lo awm a, han enchiang ila a sak tirh ata rawng vawikhat mah tah loh tih te a hriat em em a ni. Chutihlain khawilaiah emaw chuan Department thenkhat chuan ramhnuai thingte pawh rawng pawh an lo hnawih thei lawi a. Chutihlain Department thenkhat erawh chuan luah hlek lo in khawdaiah in tha deuh an sa a, naupang ninhleiin a bangte an lo tawng kawlh deuh vek a, darthlang zawng zawng leh tile zawng zawng an lo vawm keh a. Chutihlai chuan tuk zana kan tu leh fate kalna sikul primary sikul te hi chu, sikul mai a ni lo a. Thil pawimawh tih nan a kan hman eng emaw hlek a vantlang inkhawm kan ti, party inkhawm kan ti. Chutah election conduct nana kan hman a hi, a tir te atanga rawng pakhatmah pawh tah loh, a chhuat te chu phut dup mai te a la tam lutuk mai te hi ngaihtuahna thar hman deuh a va hun em. Chu chu tun sorkar chauh pawh a ni lo. Sorkar kal tawhah pawh khan kan ngaihtuahna kan hmandan hi a dik lovin ka hria.

Niminah kan House Leader zahawm takin aikal lak chhan pakhat a sawi kha. In luah tur hmuh loh avanga aikal lak tih te. Heti taka education ngai pawimawh hnam leh ram kan ni si a, mahse thingtlangah va kal ila Education hian quarter hi a neih awm pawh hi ka hre lo va. H/S Headmaster tura kan in post chhuak hlei thei lo pawh hi mi in hnuai luah tur ringawt a Headmaster va nih te chu a zah pawh hi a zahawm lo lutuk deuh a, kal loh mai kha a zia zawk a ni. Chuti zawng chuan ka ngaihtuahna hi a kal thin a. Pu Speaker, chutichuan ngaihtuah ila quarter te pawh hi sa ve se, school building sa baw se.

Tin, hei department tam tak chuan IV Grade quarter sak nan pawh nuai 10 aia tam te an seng a ni. Hman deuhah Committee pakhat in kan han tlawh kual a PHE Tanky siam te. Chuta an pawisa hman kan han tih chian khan a chowkidar in tur te hi nuai 14/15 a lo sak te hi kan nei teuh a ni. Chutih mek lai chuan kan zirna in a kan building that loh chu thudang, Headmaster quarter tur tak ngial tepawh hi kan sa hlei thei lo va, ka sa lo tawp ti ila kan ti sual awm lo ve. Chu chu thahnemngaihna in helai education-ah hian ngaihtuahna thar i hmang teh ang u tiin ka han sawi ve duh a ni a.

Sawi tur tam tak a awm a. Thil pakhat kan sawilan leh duh chu naktuk lam te pawh a rem tho na in sawina a remchan loh takin. Transport Department hi hmanni khan thil pawimawhah kan thianpa a awm baw se a DTO Office ka han tlawh ve a. Pahnih a then kan tum mek an ti a. Hei hi hmanhmawh thlak hle in ka hria a DTO Office Aizawl bik pahnih a then hi. A chhan chu an workload han en hian District 8 kan nei a, 7 a workload ai hian Aizawl DTO Office a an workload hi a sang in ka hria. An hotupa kha kan thut chilh a thingpui te min khilai kha a duh ve miau si a. Kan in sak a, ka khawngaih khawp mai a, amah pawn pension hnaih lama awm nan chuan chi loh ang reng deuh a ni, a ti a. A then License ti bo an rawn sawi, a then in kan motor kan register thei lo an ti. Kan accident, chumi khami chuan tichuan Police in min lo ti si a, engtingge ni ang. Thu kha a tam lutuk a DTO Office-ah te khian. Khi khi chuan thil dik lo pawh, thiltih sual palh te pawh a awm rem rum ang tih tepawh a hlauhawmin ka hria a. Chuvang chuan khi DTO Office te khi Aizawl District bik hi hmun hniah a rang a rang a then hi kan Minister chak tak pawh in ngaihtuahna a hmang tho chuan ka hria a. Tih makmawh niin ka hria a, khing te khi han sawi kai leh hram ka duh a, kan member sawi hmasa ten an sawi lo lam nisela.

Pu Speaker, thil pakhat kan sawi leh duh chu Police lam hamthatna tur te kan han ti a. Kan han in fak a a lawmawm khawp mai a. Thil tam tak, a hming a kan bial ve saw Police Headquarter lam hi a ni a. Va kal chang pawh hian an lawm baw na chung khan lawm mang lo te pawh saw an la tam viau a ni tih te he house hian kan hriat ve hrim hrim hi a tulin ka hria a, chu chu kan sawi duh a. Chutih mek lai chuan nichina a ka sawi zawk kha, he house zahawm tak hi party political platform nen hian kan thliar hrang lo lutuk deuh em aw te chu kan ti leh deuh baw thin a. Chungte pawh chu kan sawi ri leh duh hrim hrim a.

Tichuan, he budget chungchangah hian ka conclusion ka sawi duh chu Pu Speaker, nichina hmalama ka sawi ang deuh hlek khan. he budget that leh that loh tak tak hi chu tunah hian a la hriat loh in ka hria a. Shillong a lehkha zir a kan awm ve laiin kan thiante thenkhat chaw eiah kan sawm ve a, kan neih ang taw taw in kan siam ve a. An haw pah khan kan thenawm ten kan thiante chaw ei a kan sawm kha in chaw ei chu in puar em? an lo ti a. Kan thianpa pakhat khan ngawiteh tunah chuan kan puar viau a, mahse naktuk zing chaw ei dawnah kan puar leh puar loh chu a hriat ang a tih ang deuh hian, he budget that leh that loh tak tak hi nakum tun ang hunah hian a hriat ang. A pawisa chu a tam a ni mai thei. Kan hman dan kha a lo lang tawh ang a chungah chuan. Budget tha tak anih leh nih loh chu nakum March thla hian a Chiang Chauh ang tih kha a budget sawisel lam ni lovin, chu chu kan ngaihtuah danah pawh awmzui se ka duh khawp mai Pu Speaker, ka lawm e.

**SPEAKER** : Sawi tur dang kan awm tawh lo turah ka ngai a. Tunah chuan Finance Minister wind-up turin kan sawm ang a. Tin, chumi zawhah chuan House Leader hian a sawi ve leh a tul dawn a, a pawimawh em a budget lian a ni a. Tunah hian kan Minister zahawm tak Finance changtu Pu Sawta wind-up turin sawm ang.

**Pu LALSAWTA, MINISTER** : Pu Speaker, ka lawm e. Kan MLA zahawm tak tak 21 ten vawiina general discussion-ah hian thu an sawi a. An sawi a tha tlangpui khawp mai a. Sorkar tan pawh tangkai tak tak tur an rawn sawi a. General discussion chungchangah hian helai kan in enkawl ve na kan rule 147 na hian mawl te in tihian a sawi a ‘The Finance Minister shall have general right of reply at the end of discussion’ a ti mai a. Hun pawh ka la rei vak lo ang a. Amaherawhchu kan member ten an rawn sawi

a, thahnemngai em em a an sawi han kal pelh duak duak erawh chu ka tih tur niin ka hre lo va. Han sawifiah ngai te pawh a awm bawk a.

A hmasain Pu Speaker, he House-ah hian UT kan nih tirh 1972 khan department zawng zawngin an hman tur atan, ka pu pawh hi member i ni tel mai thei '72 kum khan. Mizoram pum hman atan khan nuai 1792 budget kha an lo nei ve a. A crore zawnga sawi chuan crore 17 el awl a nih chu. Vawiinah chuan a tam ta hle a, hun te pawh a lo liam rei tawh a. Chubakah thil man sang pawh a lo ni tawh a, a awm viau tak na in, tunhma te ngaihtuah chuan kan budget size hi a lian ve ta hrim hrim a. Point ang deuh hlekin han sawi zung zung ila. A sawitu kan member zahawm tak te sawi chhuak kher lovin. Plan leh non-plan chungchangah khan Demand for Grants-ah hian kan han keu phawk hian khawiah pawh hian a hmalam pang ami hi chu a hnung anga la lantir kha a ngai a. Chuvang chuan Plan, Non-plan tih kha a la rawn lang thliah thliah ang a. Mahse ding lampang ami nakum financial year 2017-18-a kan hman turah kha chuan state pawisa leh CSS leh a total, chauh kha a lang tawh a ni.

Amaherawhchu kan member te hi an zahawm khawp a, hetiang bu chhah pui te leh bu keu tur a tam karah khan Er.Rinawma khan, “Engatinge non-plan hi a la rawn lan talh?” a ti a, a lo en ngun khawp a niang chu. Ni e, Annual Financial Statement phok 5-naah khan kan lo la ti lang palh a. Mahse tih lan loh theih loh a ni a, a kum piahlam ami kha a rin tawm dawn avangin. Phok 5-naah hian Non-plan Revenue Deficit Grant tih hi kan la ti lang a. Han tih lan loh theih loh pawh a ni lo va, vawikhat chiah a lo lang a ni mai thei a. Mahse heng min lo chik sak avang te pawh hi a lawmawm ka ti hrim hrim a. Hemi bu pumah hian chuan kan thliar hlawk tawh a ni. Kumin BE (Budget Estimate) atang hi chuan Plan/Non Plan a awm miah tawh lo kha a ni a. Economic measures chungchangah hian economic measures hi kan thiam ang angin kan ti a. Sorkar hnathawk an tangkai hle a, tan pawh an tang nasa a, mimal taka min rawn hmu a, ‘midang awm loh lain ka be duh che, kan economic measure atan heng hi ka rawt duh a ni,’ ti a rawn ti ngat ngat duh te pawh hi an tam ve a ni, kan kal dan phung tam takah pawh hian. Chung te pawh chu kan lo pawm zel a.

Economic measures kan tih na ah hian Year of consolidation kan tih te, Economy measures kan tih te, heng ang chi zawng zawngah hian keini hian,

hma sawn lovang u khai, hma sawn lovin inrenchem ngar ngar mai ang u,' ti zawng hian kan ngaihtuah ngai lova. Tul lova kan senso kan pumpelh theih zawng hi kan thiam ang tawk tawkin kan ngaihtuah a. Chuvangin kan Chief Minister zahawm takin kan Consultative Committee member zahawm tak, opposition lama kan hotupa Pu K. Sangthuama rawtna atangin, Consultative Committee a a rawtna atangin Cabinet Sub-Committee on Economy Measures hi kan din ta a, kan hmang tangkai khawp a, vawiin hi kan thleng a ni tih pawh kan hre ve a. Amaherawhchu a ti tak tak tu zawng zawng chu sorkar hnathawkte, mipuite pawh kan ni ang chu, khang te avang khan kan pawisa dinhmun te pawh zawi zawi chuan a lo tha ve hret hret ta a ni.

Tin, kan Economy measures zingah air travel-ah kan Chief Minister hovin economic class ah kan thu a, officer thenkhatte first class ah an thu tih kha, khatiang zawngin kan ngai miah lova. Keini helama tun dinhmuna han ding a Minister te hi chu kan zin tur te pawh kan lo hre lawk tlangpui a. Officer te hi chu central lam atanga Ministry ten an koh thut avanga ticket awm tawh loh hnu a executive class chauh lak a tul chang te hian an kal lo thei thin si lova, khang kha kan thik miah lo. A pawimawh ber zawk chu hnathawk turin an kal tih kha kan ngaih pawimawh lai a ni a. Amaherawhchu a tlangpui thu in kan Chief Minister ber in min ho naah economic class hi kan lo kal dan thin a nih avangin tumah hian hrehawm kan ti lova, kha lai kha sawi lan ve a tha in ka hria a.

NEDP chungchang hi Pu Speaker, nichinah member ten thahnemngai takin an rawn sawi a, a faka sawi pawl te pawh an awm a, tlema min lo la chhiar sak fak lo te pawh an awm a. Chumi ah chuan han sawi ka duh chu, niminah khan hemi Economic Survey 2016-2017 tih hi kan pe chhuak a. Tin, hemi lo ah pawh hian a lanchhuahna chu a tam mai a, pheh 356 atanga 360-na thleng khan tun kuma NEDP-a kan pawisa hman mek leh nakuma kan hman tur kha tarlan vek a ni. Han chhiar chhuah tak mai hi ka nap a, mahse hun a duh rei dawn a. Amaherawhchu a pawimawh zual hi tlem tlem hi chu sawi chu a tha in ka hria NEDP chungchangah hian. A chhan chu budget general discussion a nih miao avangin kan budget chhungah hian engnge awm a, engtia hman tur nge

maw ni le tih te, helaia a vote tu ten kan hriat bakah Zoram mipuiten min hriat sak hi a pawimawh a. NEDP ah hian pawimawh zet zet a lo awm fur mai a, tun kumah pawh hian a awm teuh mai a, amaherawhchu kan chhiar seng lovang ka tih tawh kha Pu Speaker.

Tunlai khawvelah chuan kan thalaiten internet hmangin engkim an tih tawh avangin internet buatsaihna atan ICT department-in nuai 250 hmangin kumin chhung hian internet hmanga a hnathawh dan te pawh hi improvement te an siam dawn a tih te a awm a. Tin, Health care lamah Falkawn lama kan hospital chungchang te. Tin, Aizawl City Center, New Market-a hmun hnawk leh rimchhe zet mai te pawh saw siamthat na tur atana Aizawl City Center a buatsaih te. Tin, Aizawl traffic jam hrehawm lutuk sutkianna tur atana hnathawh nan tih te, heng hi a tam mai a. A pawimawh lo a hleih hi a awm lova, amaherawhchu hengah hian a pawimawh ber chu kan Group Opposition Leader in a rawn sawi kha a ni a. Tumah hian kan haiin ka hre lova. Pawisa hi tam hle mahse kan hman dik loh, kan hman tangkai loh hi chuan kan rilru tichhetu mai a nih theih avangin hei hi kan Chief Minister ho hian kan hre khawp a. Chuvangin a tam thei ang ber hi chu infrastructure ah hmang ila, facility buatsaih sak nan, kan loneitu, kan ran vulhtu te facility buatsaih sak nan hmang ila chutah chuan anni chuan thingtlang loneitu, kuthnathawkten, loneituten khaw 10, khaw 20, khaw 30 khatiang intiamrual ten khawpui lam ami Aizawl, Lunglei, Saiha khang ami te pawhin an lo hriat a, Mizoram in chapter thar, bung thar kan hawng ta, chutah chuan a tihpun lampang a lo nih a, kan tih pun, kan tharchhuah tam hi a hralh leh na tur te buatsaih a nih na tur atana a mamawh chi ho kawng te, an dahkhawmna tur kudam te, cold storage te. Tin, khawla buaipui ngai chi a nih chuan ran chaw tur atan vaimim herna tur chi te, khang ang chi zawng zawng te pawh kha sorkarin kan bitum ang a. Kut hnathawktute erawh chuan a thar chhuah an bitum ang a, chumi te lo coordinate leh lo organize kha kan mithiam leh kan mi hausa te leh a ngaihna hria te khan an lo luhchilh ve thung dawn a ni. Khati khawpa remchanna awm kha kan Mizo thluak hian a pha chiang em a, chuvang chuan kan hlawhtlin ngei ngei hi kan ring a. NEDP ah chuan pawisa sem lampang a awm lo, thil sem dur dur lampang a ni tawh lo ve. Kan Chief Minister in a tih



dan ang takah ‘tang’ kan pui dawn a, tang kan puihna tur atan chuan mi in engang pawhin thar tam mahse a dawt leh tur a ngaihna hriat miah loh chuan a tawih ral mai ang tih a hlauhawm a. Chuvang chuan khami atana a kalkawng lo buatsaih a company te pawh auh eih kha a ni a.

Pu Speaker, hetah hian sawi tur pakhat lian deuh mai ka nei a, sawi ngei a tha in ka hria a. Duh bik riau tu engemaw commodity kan tih ang hi chu fimkhur a ngai. Chumi awmzia chu sawhthing te hi duh bik riau tu in a duh loh chuan hnawk a ni. Alu te, purun te, bekang te, be te, antam te hi chu a hnawk lo, miin min pek pawhin kan hmang tangkai. Mahse kan ngah avang ngawt hian sawhthing hi thenawmpa hnenah, ‘hei bag 2 hi chu ka lo pe ve ang che,’ ti ringawt ila chuan a lo duh vak loh chuan atan chuan hnawk a ni mai. Chuvangin hetah hi chuan kan sorkar a kal fimkhur a, duh bik riau tu in ‘cheng 50 in kg-ah ka lo lei sak ang,’ che kg-ah a tih lai khan, a lo tharchhuah tawh hnu, a seng zawh vek tawh hnu ah, a dah vumthur tawh hnu ah ‘Bangladesh in an thar hnem em mai, Maharastra in an thar hnem em mai, cheng thumin aw,’ a tih chuan, mittui tla chung a cheng thuma a hralh a ngai tlat mai a ni. Cheng thum pawha a lak duh loh chuan, a paih ringawt pawh kha hna a lo tling tawh a ni. Chuvangin, in tin in kan duh, mihring tin in kan duh ang chi purun te chin tur hi a tam em em. Ran vulh tur ah pawh bawng te, vawk te, kel te, ar te, khang kha a tam em em a, kha kha NEDP in kan tum a ni. Chumi tipungtu ten an kalkawng, an harsatna infrastructure tam tak hi sutkian kan tum a, a sem lam pang ah erawh hi chuan loh theihloh a NLUP-a mirethei, kan unau te ngawih ngawih khang ten an lo din chhuah pui ve theihna tura kan tih hi kan tih makmawah kan ngai a, kan flagship programme a la ni reng a ni NLUP hi. Chuvangin, khalai kha kan sawi Chiang duh a, sawi tur a tam mai a.

Tin, member pakhat khan lottery chungchang kha a rawn sawi zeuh a. Hei hi Rev. Lalengkima’n “Muhil aiin muhil der kaithawh an har,” a tih ang deuh a ni a, hre reng chung pawha sawi lui talh hi kan awm ve tho a. Lottery ah hian tawi te kan sawi ang a, ka demand ni ah pawh a tul chuan kan la sawi leh tho ang a.

Ticket hralhna zawng zawng hi vaibelchhe 11,834 leh nuaih 22 a ni, a sang khawp mai. Chuta kan chan ve chin chu vaibelchhe 25 nuai 45 chauh a ni. Hei hi kum thum chhung 2012-2013, 2013-2014, 2014-2015 chhung ami a ni, Engatinge chu chauh

in chan a tih chuan lottery hi man tur a tih a ni, man tur a nih avangin min an lei ngam a ni. Ticket manah ringawt hian cheng vaibelchhe 9,460 leh nuai 58 pek chhuah a ni a, chute chung a cheng nuaih 11,834 atanga 9,460 leh nuai 58 han paih chuan a bang chu a tlem tawh khawp mai. Chuti chung chuan kan budget aia lian lottery ah pawisa a awm a, 'hei hi engtingge a bo,' tih leh thin hi miin lottery an lei chuan a price a ngai, an man a ngai, chutah chuan kan pe chhuak a ni. Chu chang a ni lo a, printing cost te hi a lo awm ve a, tin, chhiah kan pek na te pawh hi a lo awm a. State ah hian Maharashtra te, West Bengal-ah te, Punjab-ah te hian chhiah kan pe a, kan chhiah pek ringawt pawh hi vaibelchhe 139 leh nuai 14 zet a ni. Chuvangin, heta kan han sawi thin hian hre reng chung a tih luih tlat hi chu a mak mang e aw; Engatinge hei hi vawiin ah hian kan sawi kan sawi nachhan chu kan budget hi vaibelchhe 8803 chuang hret a ni.

Chutihlai chuan lottery ah hian vaibelchhe 11,834 chuang a ni. Mahse lottery a kan neih kha chu keini chan tur kha a tlem lo thei lo a, distributor ten state panga/paruk ah min hralh sak a, engkim an buatsaih sak vek a, chuta tang chuan keinin dan mumal tak in, 'heta chin hi chhung lut ru,' kan tih anrawn chhung lut mai a ni.

Kerala te angin kan state chhungah lottery hi a tih hleihtheih tlat lo a, kan lei duh vak lo a, chuvang chuan state hrang hrang lei duh te hnenah kan zuar a. Tuna kan han ngaihtuah hian kan Chief Minister ho pawhin, 'hetia sawisel kai tak chung a lottery neih te pawh hi a tih chi dawn em maw ni le,' kan han ti tak na in, 'engmah tehchiam ti lo a Directorate te reuh te kan nei a chuta tanga an run theih chuan distributor ten engkim a hah, a zawrh man zawng zawng, engkim mai an lo buaipui hi chuan kum thum chhunga nuai 2545 te kan lo hmuh ve theih chu a tha alawm; te chu kan han ti leh baw a. Engpawhnise kha chu thu tang mek a ni a, CAG report-ah te pawh a awm avangin khalai kha kan sawi lang zawk a.

Tin, kawng chhia chungchang hi tun kum budget tharah pawh khan kan ngaimawh a, kanrawn ti lo thei lo a, climate change hi kan tuar ta hle mai a, hei ruah sur hun pawh a kan ngaih loh ah hian ruah hi sur leh thin a. Tunah pawh chu min vau ut ut a ni a, a ri ut ut mai a. Chuvangin, han siamna hmun a awm thin loh avangin kawng te chu siam loha a awm a, motor a kal reng baw si chuan a lo chhe tial tial a, hei hi hun danglam tak kan tawng a ni tih kha ka sawi tel duh a.

Tin, Fourteenth Finance Commission chungchangah, 'hengte chu kum pangai reng, tih dan pangai reng tho a ni lawm ni, an ti a, dik reng tho a. Amaherawhchu, Fourteenth Finance Commission-in kum nga dan atan a rawn tih kha Thirteenth Finance Commission ah te pawh kan lo nei tawh a. Amaherawhchu, Fourteenth Finance Commission in a rawn recommendation ah hian kan neih thin, kan chan thin tam tak min hren sak ve thung a. Tunah hi chuan a devolution a zirin khatiang khan tuna kan budget ang hi kan han nei thei ta. Mahse, nei ve thei tho state tam tak India ramah hian vawiina kan dinhmun anga ding ve pha ta lem lo hi an awm a ni tih pawh kha min hriatsak chu tha ka ti a.

Tin, an han sawichhuah leh zeuh thin Health Care chungchanga corpus fund enkawl chungchang leh interest rate chungchang kha min hriat sak ka duh a. Finance ah hian Secretary hovin Committee mumal tak an awm a. Chu Committee chuan an mamawh dan a zirin quotation an han ko a. Bank lamin an rawn chhanah khan, hlawk viau tura an rawn chhan khan, thenkhat a hniam chuan a hniam zawk pawm loh theih loh a ni a, mahse a hniam avang ringawt khan han la vak dawn se Bank thenkhat capacity khan a lo pha leh lova, keinin duh ang tawh rate nei tlat kan nih avang khan. Tin, thenkhat rate hniam deuha te pawh kha, khami hun lai khan khatiang khan an rawn chhan tlat avang khan, midangin an chhang bawh si lova. Keni khan corpus fund kan mamawh lai a nih si avang khan 8% te khan kan han pe thin a. Kha kha, mechanism mumal tak a lo awm ve a. Finance department-a kan officer te an fimkhur em em a, a hun biktea koh koh ngai chi te a lo ni a. Tin, kan koh pawh khan miin an chhan loh tlat chuan tihngaihna a awm lova, an lo chhan pawhin kan duh ang zat min pek theih loh kha chuan Bank capacity a zir te kha a ni ve tih te kha min lo hriat sak ka duh bawh a.

Tin, 'budget tha' tia min han fak derna te pawh kha a lawmawm a, a tak tak pawhin ka lawm hle a ni. A chhan chu, hemi a nih theihna chha hi kawng tam tak awm karah kan Chief Minister hruaina vang a ni a, kan Chief Ministerin min hruaina ah hian, tha nia kan hriat, Finance leh Planning Officer ten kan han sawiho a tha a kan hriat hi chik taka ngaihtuahin min pawmpui a awm a, min pawmpui lem loh, kan lo ti ta lo kha a fuh ngawt mai, kan tih te pawh a awm a. Kan Chief Minister hruaina hi budget tha kan neih theihna chhan a ni.

Chubakah Pu Speaker, a thawk hah hi an awm a ni. Finance department ah officer leh officer lemlo te pawh, Planning department a officer leh officer lemlo te pawh an thawk hah em em a. Hemi bu hi Pu Speaker, a chhah hle a, phok 400 dawn lai a ni a, hengte hi karlohah min siam fel sak thei a. Hengte pawh hi Planning lam tih a a bu chhah ber ang te hi Finance lam tih a ni a. Hemi kan Annual Financial Statement Bu pawh hi hmuhdawm tham a nihna chhan chu, a hnungah hian a lem, pie chart nen thlap, hei hian min tichiang kuar mai a. Hetah hian hlawhah engzatnge kan hman, major work ah engzatnge kan hman, minor work ah, interest payment ah engzatnge kan hman, khang zawng zawng kha chiang em emin a lang kuar mai a. Hengte hi hah taka thawktu awmla se chuan tih theih mai chi a ni lova.

Member zahawm tak Pu Ruatkima'n a pawisa lam hi awm thin mahse, hna hi a that chuan loh chuan' a tih kha tupawhin kan pawm a, hei hi mipuite nen a thawhho na hi kan duh a ni. Mipuite hian hei hi ka ta a ni an tih a, 'participation of the people' nen kan tih tak tak hi a tulin ka hria a, Hei hi tun kum atang te pawh hian tih theih nise chuan kawng te pawh hi Mizovin ramri chin kan nei vek a, chung kan ramri chin kan tih angah chuan kohhran nge ni mawh kan phurh tir dawn ? Village Council, Local Council nge, YMA thleng pawhin chung te pawh chuan kawng maintain na ah hian min han pui se pawisa sen a tlem zawk dawn baw si.

Anmahni lam atana hnathawh tur lo awm baw si khan kan kawngte hi chhe hman lek lovin cement in han bel zung zung mai se, a pawisa pawh dah nghal hmiah zel mai ila, kan sen tur awm anga kan hriat ang ang kha, chungte pawh chu kan chak a, tih theih ngei pawh hi kan beisei a. Tin, tunlai chhanah hi chuan bitumen kan tih alkatra ang chi ai hi chuan cement kan tih anga hna han thawh hi a awlsam zawk a. Kawng hi a mak khawp mai a, nimpiniah lawka football leng leka kawng chhia kha kar hnih khat hnu ah chuan thlangra a lo tiat a, a hnu leh kar hnihah pheih chuan dung chen chen, lian pui pui kha a lo ni tawh mai a.

Chuvangin sap in 'a stitch in time saves nine' an tih ang deuh hlekin a hun taka mipuite nena kan thawhho a, annin an lo tih zat zat kha chuan a tha hle dawnin kan hria a. Chuvangin hei hi NEDP core Committee-ah te pawh kan sawi zing a kan Chief Minister ho hian. Hei hi kan la tih ngei ngei tur, kan ram tana ta tu nihna leh hna pawh a sawt tak tak na atana pawimawh niin ka hria a. Tin, hemi chungchangah hian miin water

connection an nei a, water connection an neih dawn reng reng chuan a kawng tihchhiat man an chawi thin a ni. Kawng tihchhiat man an chawi hi an siam leh chhung hi a rei khawp mai a. A chang chuan kum khat te, kum hnih te, chu aia rei pawh chu a awm thin a ni.

Chutichuan a kawng tihchhiat chhung zawnga tuartu kha mipui kan ni, tlan thin ho hi ka ni tlat mai a ni. Chuvangin heng te pawh hi system thar buatsaih a, kha kawng lai chhetu khan nge siam dawn a veng neitu Village Council lam nge, YMA nge? Kha khan cheng tlemte in a thehluh pawisa pawh kha han hmang se kawng kha kumtluana nuamin kan kal mai tur ani a. Tuin emaw connection thar a neih vang ngawta kum hnih, kum thum dawn lai mai kawngchhia a kan han kal mai thin kha chu a system dik loh vang mai mai a ni a, system thara kan kal theih kan beisei a.

Tin, State Planning Board hi la awm zel tur a ni ang em tih chungchangah khan central-ah chuan Planning Commission chu a awm lo ngei a; mahse kan pu hova kan ngaihtuah hian State Planning Board awm lo tur hian kan ngai ngam lova. State Planning Board hi chu a thluak bawm, enge Mizoram in kan tih ang a, tun atanga kum 15, kum 20, kum 30, kum 100 ah tih min lo thlirpui a, thluak tak tak hmanga an tih hi a tulin kan hria a. Kan mi tangkai leh kan mithiam te, University lama mi te, mithiam hrim hrim te kan kawi khawmna hmun a nih avang hian State Planning Board hi chu central lamin 'ti suh u' an tih pawhin federation nation kan neih avangin, federal state kan neih avangin thluak bawm neih zel hi chu kan la duh in kan hria a, chu chu kan sawi lang tel duh a, Tuna an awm angah hian lo hmu mawh deuh palh pawh a awm theih a, an tul vak emaw ni le? An ni lo pawh hi enge an lo tih ve le lo tih mai palh pawh a awm mai thei a, mahse heng zawng zawng vawiina kan paper ah pawh hian an lo thawh pawh a awm mai thei a. An thawh hi a tam em em a ni tih Pu Speaker, kan sawi tel duh a.

**Er. LALRINAWMA** : Pu Speaker, khawngaih in kan lo sawi lawk, nichina kan Finance Minister zahawm takin a sawi kha nimina ka sawi chiah kha a ni lo deuh a, nimina ka rawn sawia kha chu Explanatory memorandum on the budget 2017 - 2018 tih a phok ngana a grants in aid from centre tih (a) na non-plan account-ah khan vaibelchhe 2496.80 leh (b) na ah plan account ah khan vaibelchhe 1874.60 budget estimate 2017-18- a la lang lai kha ka rawn sawi lai taka kha chu a ni e. Hemi bu lo zawk hi min rawn chhang daih a, khalai kha ania, min lo hrilhfhiah theih chuan a lawmawm ngawt ang.

**Pu LALSAWTA, MINISTER** : Pu Speaker, a ni lo zawk ka lo en a, a lo ni ve chiah tho mai si a, chuvangin non-plan a pawisa hmanna tih chiah kha a lo ni ve tho mai si a, kha vang khan Er Rinawma hian a lo bih chiang lutuk a, keini hian kan lo bih thelh palh a ni ka ti a, mahse tuna a rawn sawi kha a pawimawh a. Tunah chuan plan leh non-plan a awm tawh lova, kan lo en nawn leh ang e.

Chutichuan Pu Speaker, engvanginnge Mizoramah hian mipuite hi kan ngaih pawimawh em em kan ti a, sorkar te hian sorkar tha nih te hi kan duh em em tih zawhna hi a awm thei a. Pacific Ocean ah te, Indian Ocean-ah te khuan sorkar a awm miah lo. Awm lo reng reng, sorkar a awm lo, khuti khuan a awm tawp mai a ni. Mizoramah hian sorkar kan neihna chhan chu mipui kan neih vang a ni a. Mipuite tana thawh that a, mipuite an hlim hi kan duh a ni. Chuvangin NEDP-ah pawh hian kan tum ber leh kan target chu Mizoram mipui nuai 12 tlinglo hret hi kan tih hlim a, tih hausak a, tih nawm kan duh avangin project mumal tak neiin heti hian NEDP policy hi kan han buatsaih ve a ni a. Hemi kawngah hian mithiam tam tak kan ruai a, pawn lam mi te, kohhran mi te, mi thahnemngai tam tak pawh, chuvangin kan tih chhan ber, thenkhatten ni lo lek lek zawka mipui hip an tum a ni an tih hi a sawitu lam an chianglo mai zawk niin ka hria. Mipui hip hi kan tum a ni, mipui hian min duh se kan duh a ni. Mipui hian Pu Hawla Congress sorkar hi duh se, duh tlak in awm bawk ila tih hi kan duh ber avangin kan theihtawp kan chhuah a ni e.

Tin, central scheme thenkhat hi a tawp tlat mai a, hnathawh laklawh laiin, Tourism department-ah pawh tukin zinga kan ngaihthlak tak te pawh kha a tawp thut mai a. Kan lo thawk laklawh tawh bawk si a, harsa zet mai ania, a site ah te pawh chutiang chuan JNNURM ah pawh chutiang tho chuan a lo tawp a. Thenkhat hi chu recurring expenditure awm chi a ni lemlo bawk a, sorkar hian nei leh neilo chung pawhin kan ti hram dawn emaw ni kan ti bawk a, kan han ngaihtuah bawk a. JNNURM-ah chuan nuai 10 vel chu provision kan han siam ve a. A dang hi kan thei zel ang em tih chu sorkar thu thu a ni a, hotute nen kan la ngaihtuah tlang turah ngai ila.

Khatieng case harsa pui pui kha a awm ve a; tin, central sorkar hi an lian a, an ngaihsanawm rual rual hian mak ve deuh chu Pu Speaker, Education kan enkawl lai khan tuna Hindi Teacher ho ang te pawh hi an hmaih fo mai a ni. An lo hmaih leh thin a, ‘kan lo hre miah lova ni’ an ti a, ‘Aw! hre lo turin in hriat loh hlauin lehkha pawh kan

rawn thawn tawk tawk thin che u a, keimahni pawh kan lokal a, hetiang a budget-a dah loh leh rik ngawt mai thin chu,' kan ti a, "A in tlem em a ni, nangni leh Nagaland deuh chauh hi Hindi zir in ni a", min ti leh ringawt mai thin a, an ropui viau lutuk lo. Keini hian helaiah hi chuan efficiency ah hian kan khum thei a ni tih kha a site chungchang ah te, JNNURM tawp hmuk chungchang ah te, Tourism department han tawp hmuk ang chi ah te pawh khan, min an lo ti laklawh tawh a, a chung an lo khuh tawh a, in an lo rel tawh a, a sen tur zawng zawng an seng a, mahse luah tlak lawi si awmlo anga in dah te pawh kha thil awm thei a ni a.

Hengah hian central an nih vang ringawt khuan thil engkim khu a fel bi biai lo a ni tih kha he House zahawm tak hi kan hrilh hre ve duh hrim hrim a. Tin, sum ringawt nilovin tih chungchangah khan leh heng kan pawisa hmannaah hian School Education te hi a pawimawh a, Health Care lampang te pawh hi a pawimawh a, Health department te pawh hi a pawimawh tih an sawi kha, kan tawm vekin ka ring a. NEDP-ah bawh khan kumin chhung hian School Education ah hian ` 490 lakh kan dah a, tun kumthar lo awm tur 2017-18 ah hian ` 1000 lakh kan dah bawh a. Chutichuan wawi khat, thawk leh khatah engkim hi a tih theih bik lova, kan thiam ang ang leh kan tlin tawk ang ang chuan kan ngai pawimawh a ni tih Pu Speaker, kan sawi duh a.

Tin, Education chungchang hi tawite han sawi a tha in ka hria a, Mizoramah hian Education hi department zawng zawngah chuan a tak taka kan hlawk berna vek niin ka hria a. Ka pu, nangpawh khalaia i thut theihna chhan kha A, Aw, B atangin i tan vang a ni. A, Aw, B hre miahlo ni la helaiah hian i thut ka ring lova. Helaia wawiina kan House-a thukhawm zawng zawng pawh hi A, Aw,B bul tanna Education chawilen kan nih avanga kan thiam ang tawk te te in A pawl, VII kan pass emaw, pawl VIII kan pass emaw, pawl X kan pass emaw, BA kan pass emaw, a aia sang pawh. Education hian Mizoramah hian hma hi a la nasa a, department mal la dawn ta ila Mizoram siamtu ber hi enge kan tih chuan Education hi tih loh theih a ni lo. Chuvangin kan sorkar hian kan ngai pawimawh lo ngam reng reng lo a, ngaih pawimawh a thang chi a nih tih pawh kan hria a, theihtawp chhuah hi tul kan ti a ni.

A tawp berah chuan ka la sawi lo deuh hlek a, a tawp dawnah chuan ngaih pawimawh hi a inang lo a ni. Ka thianpa pakhat chuan 'kan Headmaster hian A, Aw, B hi a letlinga chhiar hi a ngai pawimawh em em mai a, a letling hian kan thiam fai vek a,

kan han byheart hneh em em khawp a, chu pawh chu a duh tawk lova, a ti. 'A hnu ah chuan A, Aw, B han tih a tlar 4 ang kha a chhuk zawngin ama tlar te te kha min han tih tir leh a, A, Aw, B na na na hi chu kan han hre hneh khawp a a ti a. Chutiang chuan ngaih pawimawh hi a in anglo khawp a ni he khawvelah hian.

He sorkar hian mipuite tan an than chhuah chhoh theih nan, an lo hausak ve theih nan tih hi kan ngai pawimawh a. Kan pawisa neih ang ang pawh hetiang hian kan han remkhawm ve a. Engemaw hunlai kha chuan ek in kal thei te kha kan han ngai pawimawh em em a, kel palte pawh kha, khalai kha sawi suh u kha an han ti deuh tak na in, ngai pawimawh in an lo thu ah kha chuan han sawi ve hi a tha in ka hria a. A, Aw, B letling a ngai pawimawh tlat chi te pawh kha mihring hi a awm ve theih ania. Chuvangin keini ngaih pawimawh ang hi tu sorkar pawh hianrawn ngai pawimawh se kan duh takzet a.

**Pu LALRUATKIMA** : Pu Speaker, khawngaiin kan Finance Minister zahawm tak kha kan ngen duh a. CSS hindi teacher chungchang kha September 30,2013 a Chanmari hall a tiam tawh ang khan minrawn ngaih pawimawh sak ve hlauh se a va tha dawn ve an ti a ni, ngen ngawih ngawih mai.

**Pu LALSAWTA, MINISTER** : Kha lai kha kan sawi chiang ang e. A video kha ka nei a, ka thiante nen kan thlir a, an mi sawi ang, intiam kam leh insawiba ang hi chu ka ni miah lo. Ukil ka ni a, ka sawi tur chin hi chu ka hria. (interruption) Kan duh alawm, anni aia tam pawh hi kan duh, Hindi thiam zawng zawng hi Mizoram sorkar hian la vek thei ila kan duh. Chuchang ni lovin sorkara thawk chak lo pawh, sipai bang zawng zawng pawh Hindi thiam zawng zawng te pawh hi lak kan duh alawm. Chuvangin khalai kha chuan kei min bei min bei lo se an tih fuh zawk ka ring rum rum thin a. Kei Education pawh chang pha ve tawh lo, helaia .....?

**Pu LALRUATKIMA** : Pu Speaker, thil tithei dinhmun a ka lo din hlauh chuan ka hre reng ang che u. Ka theih tawp ka chhuah dawn nia tih chu i sawi kha maw le, a video-in kan kawl fur ania.

**SPEAKER** : Thusawi laklawh lai chuan tibuai tawh lo rih i la maw. Information pawimawh tak tak anih lemluh chuan.

**Pu LALSAWTA, MINISTER** : Theihtawp hi kan chhuah a, kan Chief Minister pawhin theihtawp a chhuah a, kan Governor pawhin theihtawp a chhuah a, kan



Education Minister zahawm takte, Parliamentary Secretaries te pawhin theihtawp an chhuah a. Theihtawp hi kan chhuah a ni, theihtawp chhuah hi phat rual a ni lo. Khalai kha kan sawi duh a.

A tawp berah chuan he House zahawm tak ah member ten thahnemngai tak in an sawi thliah thliah vek a. An ngaih pawimawh te leh rawtna tha tak tak an nei thei hi ka lawm a, chuvang chuan anmahni kan member zahawm tak takte hnenah he House kaltlang hian lawmthu ka sawi a ni. Ka lawm e.

**SPEAKER** : Tunah chuan kan House leader kan sawm tawh anga.

**Pu LAL THANHAWLA, CHIEF MINISTER** : Pu Speaker, Finance Minister zahawm tak hnen atangin, a tul zawng zawng, a tul aia tam mah mahse pawimawh si kan ngaithla tawh a. Sawi vak tur ka nei hranpa tawh lo a ni. Helaia Minister seat ruak hi Pu Speker, Opposition lam atang khan an rawn hmu lian hle mai a. Lokal hmasa sa kan pe mai dawn em ni? Lo phei hmasa sa pek mai kha ka duh mai a in remtih chuan.

Pu Speaker, Finance Minister leh a thawhpui leh official thiam tak tak thahnemngai tak tak tawiaawmtu ten budget tha tak an rawn buatsaih a, a fun kim hle a. Tin a sawitu zawng zawngin tha tilo pakhat mah an awmlo a. Hotu lam atanga tha an tihte an rawn support te angte phei chu keini tan chuan a lawmawm tawpkhawk a ni ringawt mai a ni.

Amaherawhchu duhthu a sam thei lova, sum leh pai, kan source te kan hre vek a. Tin, a hmandan tur ang guidelines thatak a awm tihte kan hre vek a, chumi hnuaiah chuan Finance Minister zahawm takin Parliamentary Secretary te nen theihtawp chhuahin tianga sawisel bo titih thiamve manglo pawhin kan han thlir a, hriat nuam tak mai hriatthiam nuam tak mai budget kan han nei te hi thil lawmawm tak a ni a. Tin, kalphung thar awm kum a ni a, plan leh non-plan awm tawh loh khatiangte kha thil thar a ni a, mahse thil thar hnuaiah Member zawng zawngin a tha an tih theih khawp budget an rawn siam thei hi, thil ropui tak, thil lawmawm tak a ni a. Heta mawhphur zawng zawng hnena lawmthu sawi a tul takzetin ka hria.

Tin, planning commission kan la nei zel tul dan kha kan Finance Minister zahawm takin a sawi tawh a. Planning commission a awm tawh lova central ah mahse a

ti a pui deuhthaw leh a ai awh hi a awm tho a ni. Chu chu keini pawn kan dawr berte zinga mi a ni a sum leh pai chungchangah chuan.

Tin keini State ah chuan kan ngaithla tawh a mipui lam tang kan ni a, he sorkar hi mipuite a neitu an ni tih hi inhria se. Tin, he sorkar hi anmahni tan a ni a, an mahni ta a ni a, an mahni siam a ni tih hi an hriat theihna turin, kan hotuten hma an la a ni. NLUP kan tih te pawh hi a hlawhtling lo a nih pawhin, keini chu kan hlawhtling. Mipuite hnenah kan tiam ang kha kan en theih avang hian kan lawm takzet a Pathian hnenah pawh lawmthu kan sawi a ni. Remna leh muanna kan nei a, a lawmawm a, chumi hnuah chuan rambuai kum 20 avangin ei leh bar, sum leh pai nei lovin saruakin khaw khawm avangin kan khawbu zawl atangin ran rual angin saruakin khaw tharah min khalh khawm a, chutah chuan ei tur kan nei lo a ni. Chuvangin, eitur kan neih theihna turin kan hotuten ngun takin an ngaihtuah a. Remna leh muanna kan nei a a lawmawm e, Pathian khawngaihna, amaherawhchu, kan mipuiten eitur an neih si loh chuan engtingge ni ang ! Tin, khawbu zawl atangin ran rual angin min khalh khawm a, remna kan lo nei a, mahni khaw bu zawlah vek kir leh kan duh a, insakna tur rap in chhe tak tak awm a ngai. Chuvangin, kan hotuten rangva inchung tur a mamawh apiang hnenah kan sem ang an ti a. Tin, eizawna ngelnghet an neih theihna turin, chutih hunah chuan ` 30,000/- theuhin rahbi kan tuk sak ang, eizawna duhzawng, an mamawh ang chi te an thlan apiang kan pe ang kan ti a, min hmusit hle a ni. Party dang zawng zawng khan min hmusit a, min ti el a, hetiang hi khawvelah a awm ngai lo, vote khawna mai mai a ni an ti a. Mahsela, Pathian lamtang programme hi Pathianin hun a tih ah chuan a ti hlawhtling thin.

Remna leh muanna kan tih te pawh mi in an awih lo, mahse, Pa hun tiam a lo thlen chuan, Amah nen kan inkarah kan Chiang a, huaisen takin tuboh leh dolung inkarah kan kal a. Pa, hun tiam a lo thlen chuan Congress sorkar kha a sorkar namthlun remna leh muanna a awm theihna turin lal thutthleng midangte hnena kian thei khawpin Pathianin Congress party kha min chawimawi mai a ni. A takin kan hmu a ni, tuma phat theih a ni lo. Tin, Congress sorkar kha ti rawh u titu an awm a nih chuan Pathian thlarau thianghlim lo chu titu an awm lovang.

Chuvangin, NLUP-te, rangva inchung sem te pawh hi Pu Speaker, Pathian lam tang a ni. Mi liante, mi hausate, mi khawsa theite a zawng lo. Ka tawng an huat thu

suh ah Lal Isuan heng ka unau mi te ber a tih te, hmeithaite, pachhiate, kut hnathawk mite, mi chhumchhiate nen lam a zawng a ni, NLUP hian. Chuvangin, Engkimtithaia'n a rawn ti hlawhtling mai a, kan hun hmasa lamah pawh sing tam tak chhungkaw hnenah rangva inchung tur kan pe thei a. Chhungkaw sing tam tak hnenah eizawna ngelnghet an neih theih turin rahbi tukna ` 30,000/- theuhin kan sem thei a ni, kan tanpui thei a ni.

Tun tumah pawh kan hotuten an ngaihtuah leh a kha bawk kha kan la mamawh a ni min ti. Tangka hlutna a lo tlahniam a, sorkar hnathawkte pawh an hlawh wawi 3/4 a lo pung tawh a chuvangin, tun tumah chuan nuaih 1 i ti ang an ti tawp mai a ni. Nuaih 1 khawi atangin nge a lo kal ang kan hotuten an hre lo. Mahsela, NLUP kan tih hi Lal Isua lam tang a ni tih kan hriat avangin huaisen takin min kalpui a, Pa hun tiam a lo thlen chuan a takin nuaih telin kan sem thei a, rangva inchung tur pawh tun thlengin kan la sem a ni, a mawmawhtute hnenah chuan, Rural Housing nen lam.

Chutiang chu a ni a Pu Speaker, kan Finance Minister zahawm takin a sawi tawh ang khan, he ramah hian mi hausate, mi thiltitheite kan ngaihtuah teh chiam a ngai lo, sorkar pawh an mamawh tehchiam lo. Mahse, sorkar mamawhtute chu hmeithaite, pachhiate, lo nei mi te, kut hnathawk mi te, chhumchhiate an ni. Chunggho tan chuan he sorkar hi nghet takin ding sela ka ti mai a ni. Mi hausate, mi liante tlawn a inhlawhfakna zawn zawn te leh in tlawnsiak reng reng a khawsak te kha an tan a nuam lo. Chuvangin, mahni khawbu zawlah theuh thlamuang tak leh lungawi taka an khawsak theihna tur hi kan hotuten an duh ber a ni, chu chu kan hotuten an tum a ni. Chutiang chuan tunah hian kan hotute hmalakna hi malsawmin a awm mek a ni.

Prime Minister special package a ni na a engatanmah kan ngai lo. A sem tur, tanpui ngaite tanpuina tur kan neih kha kan duh tawk der, setana special package chu ni se kan la lovang. Chutiang zawk chu a ni. Chuvangin, a source a te hi kan buai lova. Tin, mak deuh mai chu Pathian kut hotuten an hmuh ka duh a. Mi nuaih 13,000 vel zet tanpui ngaite kan tanpuina tur khan kan mithiamten vbc 1500 central sorkar atangin kan dil a ni, kum 5 chhunga kan hman turin. Mahsela, mak danglam takin chung lampang thiltitheihna a nih loh chuan tu thiltitheihna nge ka hre lova, ringlo mite thinlungah hna a lo thawk a vbc 1500 kan dil lai khan vbc 2813 min pe ringawt mai a ni. India sorkarah a la thleng ngai lo. Vaibelchhe 1000 kan mamawh chuan vbc 2000/3000 kan dil

a ngai thin. Chuvangin, NLUP kan tih ah te hian thil naran mai a ni lo, chung lampang a inrawlh a ni tih hi ka pawm dan a ni a, chu chu a dawngtute pawhin an pawm dan ni se ka duh a. Tin, a hlawhtling lo tih te pawh hi mimal ngaihdan a ni. A dawng hlawhtling hlim tak tak hi ka zin pah mai pawhin ka hmu em em.

Tin, keimahni lamah chuan kan hlawhtling hrim hrim. Kan intiamna pel rawkin chhungkaw nuaih 13,000 chuang hnenah tun kum 5 chhung khan tanpuina kan pe a ni. Chuvangin, a hlawhtling ziktluak leh ziktluaklo chu a dawngtute mawh a ni tawh a ni. Chuvangin, Pu Speaker, NLUP kan tih te pawh hi kan Finance Minister zahawm takin a sawi tawh ang khan, keimahni, heta sorkar-a a hming a thu te kha ni lovin zokhaw lama kan mipuite tan zawk a ni tih hi Chiang Ila. In puhmawhna tur leh indemna tur chi pawh a ni in ka hre lova. Tin, a source of fund hi khawi ami nge, eng package nge tih lamah hian kan buai reng reng lo. Tanpuina tur kan neih khan kan duhtawh der, kan hlim em em a, kan lawm em em a ni.

Chuvangin, tunah pawh hian NLUP kan tih pawh hi nichinah kan hotu pawhin a sawifiah vek tawh. Hei hian kan chhonzawm a ng a, tanpui ngaite kan tanpui ang a, a intahtawlin, a volume erawh chu inang chiah si lovin tanpui ngai hi an awm reng dawn. Chungte chu kan tanpui chhonzawm zel theihna turin kan hotuten khatiang khan ngaihtuahna an siam a ni. Khang zawng zawng kha kan hotute han sawi khan a huam tawh avangin a bak tehchiam sawi ka tum lo a ni.

Tin, vawiinah hian kan hriat tur chu he ram khua leh tuiah hian Pathiain min dah a, tih tur neiin min dah a ni. Mahse, chumi kan tih tur chu kan tih theihna turin political atmosphere te pawh hi siamthat a ngai a, engtinng e ni ang tih te pawh kan ngaihtuah a ngai a. Hei central-ah NDA sorkar-ah BJP khaihhruai, tun an sorkar hmasa khan MNF unaute hi member an ni a. An tlak takah khan an chhuahsan a, tunah an lo sorkar leh ta a direct-in member an ni thei ta lo nge ka hre lova, helaiah BJP unit an awm ve tak avangin, NDF-ah tunah hian member an ni a.

Hengte hi nihna emaw thuneihna emaw sorkar duh vang ringawt emaw a um vak vak chi a ni ang em aw! tih te hi ngaihtuah a tulin ka hria a. U.P, India rama state lian berah hneh tumin an han sorkar a, chuta Chief Minister tur chu mi dang dang an neih laiin Hindu kulmuk puithiam an thlang mauh mai a ni chumi ina a thu han sawi hi, Hindu kha ka sawisel lo, mahse, an kalphung kha a ni ka zuk sawi ni. Secular state kan ni a,

sakhaw lampang a nekchep zawng emaw, a duh lo zawngin emaw ka sawi dawn lova. Mahse, a kalphung hi ringtu kan nihna zawng atangin kan ngaihtuah ngai em? tih hi min ngaihtuah tir a. A mihringte chu mithiam tak tak an ni, anmahni chanchin pawh ka hria. Mahse, Chief Minister an nih atanga darkar hnih, khat lek chhunga a thil tih chu Allahabad khawpuiah slaughter house pahnih an khar nghal a, Mosolman tam takin eizawna an nei lo nghal a ni. Tin, a statement hmasa berah chuan UP leh India ram hi Hindu rama ka siam hma chuan ka chawl lovang, a ti. Chuvangin, tawngtaina nena fimkhur taka kan kal a ngai a. Chutiangte thawhpui chu, khawvel thilah kan ropuina tur ni mah selangin, sakhaw thil lamah kan ngaihtuah a ngaiin ka hria a. Chu chu he House zahawmtakah hian ka'n sawi chhuak duh a ni.

Chutiang chu a ni a, chuvangin, politics kan tih hi, keini ringtute chu khawvela kan awmchhunga eizawna ringawt hi a ni lo. Hemi khawvel piah lama kan thlarau nun thleng hian, politics kan tih hian keni ringtute chu a nghawng a ni. Rambuai laiin na takin kan hmu tawh. Chutiang chu a ni a, chuvangin, kan politics kalkawngah hian kan in ngaihtuah hle a tul a. Vawiinah hian a party ang zawngin an chakna state ah chuan an chak khawp mai. Mahse, state 5 inthlanah khan 3 ah khan an chak lo a ni. Chutichungin, democracy an pawngsual a, an sawrkar ta tho a, state 2 ah chuan. A takin kan hmu a, phat rual lohvin. Chuvangin, kan politics kalchho zelah pawh hian ngun taka kan ngaihtuah a ngai lo'm ni tih hi ka ngaihtuah a ni.

Chuvangin, vawiinah hian helaiah chuan tualchhungah, local taka kan kalphung a inan lohna avanga engemaw inhnia na te kan lo nei a nih pawhin, a pumpui a ringtu kan nihna ah hian kan zavai hmakhua hi kan ngaihtuah tlan zel hi a va tul nasa leh zual dawn em tihte, kei teh lul hian ka'n ngaihtuah ve a. Chu chu helaiah budget kan sawina ah, opposition lam atang pawhin kan Finance Minister fakna aw te, tha tihna aw te kan han hria hi thil lawmawm tak a ni a. India ram Assembly ah hian a thleng zen zen lo. Amaherawhchu, helai hi, ka sawi leh sawi hnu, ringtu kan nih tlan a nawmna te ti langtu a ni a. Khatiang khan vawiinah pawh hlawhtling takin budget kan rawn pharh hi, Finance Minister ni pheii pheii la chu nuam ka ti ngawt ang. Tumah sawichhetu leh sawiseltu an awm lova, duhthawhtu pawh an awm lova. A duhthawh ber chuan, hetiang hian a tha khawp mai, a ropui, a lawmawm, a hmandan hi fimkhur ni se tih a ni mai a. Kha kha chu hriatsa vek a ni.

Tin, hei hi kan han hman tan anga, House member zawng zawngte ka sawm duh chu, kan ramah hian sum ngainatna a nasa hle a ni. Chu chuan kut tling lova sum lak pawisak lohna hi a ti tam khawp, vantlang mipuiah pawh a ni a, sawrkarah pawh a ni. Hei GP Fund hi, kan Finance Minister-te leh Department-a a thawhpui te'n a mamawh zualte hnenah an han pe a. Heng an pekte pawh hi, hetah a hnuailamah an lo pek chhuah dawnin engemaw percent an lo dil tihte kan hria a ni. Finance Minister zahawmtak nen hian thang kan kam a, a la per rih lo a, tun thleng hian, chutiang thleng chuan kan ven tlan a ngai. Corruption free, India rama model state a nih hi kan duh a. Chutiang ti thei tur chuan, Pathian khawngaihna in, ka fihlim a, kan hotute pawh an fihlim a. Chuvang chuan, helampang zawngah pawh hian House member zawng zawng hi min venpui turin ka duh a ni, ka sawm a ni. A chhan chu, chutiang lekah pawh chuan khatiang kha a ni a. Vawiih hian sum ngainatna lamah kan tlulut mek a, chu chuan kut tling lova sum lak pawisak lohna hi a ti hluar em em a ni. Hei development lama hman han lak dawn pawhin harsatna siamtu pakhat a ni ve a ni.

Tin, sorkar chhungah pawh hian, theihpatawpa kan mitmei reng pawh hian a fihlim hlei thei lo. Pho ro chu a la hla khawp, a zung kan han phawi tan a, mahsela, hengte pawh hi hrehawm tak a ni. Hmanni ah ka sawi tawhin ka hria a, he House zahawmtakah hian, kohhran upa Group A Officer ni bawk si, han dismiss te hi hrehawm tak a ni. A hrehawm ngawih ngawih mai a ni. Kohhran upa, hlemhlet avanga han suspend ngaite hi hrehawm tak a ni, rawngbawltu pawimawh tak takte. Mahse, chuti chung pawhin, clean and effective administration siam kan duh avangin a sang tel chungah kut kan thlak a ngai. Thil hrehawm tawpkhawk a ni, mahselangin, corruption-free sorkar siam kan duh a. Kan tan tlan vek pheichuan, ringtu za a za a inchhal ngam kan ni a, engahnge maw he India ramah hian model state kan nih theih lohvang le, a mipui lah nuai 11 pawh kan la tling bawk si lo, tihte hi ka ngaihtuah a. Chuvangin, kan vaia kan tan tlan phawt chuan ram ropui tak kan siam thei anga. Finance Minister-te leh a thawhpuite, efficient takin, budget tha tak min pek hi tha taka Mizoram pumpui tan, a bik takin, mipuite tana kan hman tangkai theihna tur atan a kan zavai a thawktu tur kan ni a. Hetah a hminga ruling party kan awm avang hian keini hi a neitu bik, a pawimawh bik kan ni chuang lova. A bikin, helai a member zawng zawng 40-te hi kan mawhphurhna a inang vekah ngai ilangin, chutiang chuan thawk ila chuan tun ai hian kan progress hi a

effective zawkin ka ring a. Chutiang tur chuan lawmthu sawi pahin kan sawm nghal a ni e, Pu Speaker. Ka lawm e.

**SPEAKER** : Aw le, vawiina kan tih tur chu tluang takin, Pathian hruaina in kan han tizo leh thei ta a, a lawmawm hle a. Kan bang rih anga naktuk ni 22.3.2017, nilaini zing dar 10:30 ah kan kal khawm leh dawn nia.

The sitting is adjourned (3:50 PM).